

景元鈔琴川志

辛巳春日

七十八丈王慶芝題



景元鈔琴

川志

庚辰壯月

畫友書端




琴川志序



知常熟州事淮南盧君嘗以古者郡國有圖風土有記所以備一方之紀載今之志書即古之圖記也其可廢乎哉然常熟舊志自宋兵南渡版籍不存至慶元丙辰知縣孫應時始編次為書其後縣升為州歷年浸遠而是書之存焉者寡且丙辰以後續其所




未備者後未有其人允缺典輿乃亟訪
孫令所編而重正之今十有五卷仍其
舊名而題之曰重修琴川志予得而
讀之然後知夫之善為政也夫士之
善為政者必先其所急以及其所緩
為之衣食以厚民之生為之教化以
泝民之德獄訟以戒其不率賦歛
以正其不均此最其所急而不可緩



者也至於攷其人物之愚智風俗之
盛衰以及生產之同異山川之險夷凡
此之類蓋差可緩而不可廢者也故
用車於一州者得通敏有為之士則
將裁正乎緩急之間而不謬其序
區以乎先後之際而不失其宜矣嗚
呼名君之在常熟其殆庶幾於
此者乎常熟為吳之支郡以言其

人物列如秦伯之所遊去差項籍之所
霸也以言其風俗則有言游公子札之
文雅朱買臣陸機雲兄弟之馳
驟范蠡希文張季鷹之慷慨高舉
也以言其生處則陸海鹽締鍛冶
之饒聞於東南也以言其山川則有海隅
烏目之形勝大江東海之要害也若此數
事蓋皆為政者之不可以不考焉者也



於是君之下車蓋逾年矣凡州邑
之所宜急者亦既定舉而先之而
不廢其所緩歷攷前數可以成乎
是書生所謂通敏者為之士哉昔周
官職方氏掌天下之圖典其財用穀
畜之數要周知其利害則志書考蓋三
代為政之法而後世尤謹著之以為政
寔今君之為廼能先民之所急而後

及乎是故曰善為政也書將錄梓
以行君命士友陸景元來謂予曰子
執筆史館之言為宣城華為我序
之予雖不識君然聞君之為政是亦
頗悉故直出所聞以授之使後之人觀
之亦足以感發而興歎矣君名鎮字
子安以領兵元帥兼知州事云至正乙
巳正月望日金華戴良序

重修琴川志

姑蘇為吳王之故都今為畿輔之大郡若常熟則為郡之大縣
自春秋距今千六百餘年其壤地之間建置之沿革風物之變
遷與夫事跡之涉於理亂善惡之繫於勸懲可書者宜若不可
勝紀余家世東海南渡初曾叔大父光祿公仕于吳因寓于此
余端平乙未方自淮來依宗黨始至嘗問客曰縣名常熟其義
安在其始何時客應之曰紹興縣宰題名云梁改南沙為常熟
命名之義則不知也又問有圖經可以參攷否曰所誌亦同有
故老可以質問否曰無可與語者及觀陸澄吳地記有吳郡常
熟縣之文則齊代已有常熟之名非改於梁也吁宰是邑生長
是邑雖更易之歲月名稱之意義且不及知它復何望焉此前

人失於紀述故後人無所稽據遂使名都大邑傳信失實良可
歎已龍泉鮑君廉米綰縣章每以圖志未詳爲闕典於是與邑
之秀民鍾君秀實胡君淳旁搜博采攷古訪舊裒輯會粹討論
是正以增益其所未至迨再考後始能成編列爲十門條分類
析固不敢謂盡無遺闕然視舊志則粗備也管周官職方氏掌
天下之圖與其財用穀畜之數要周知其利害蕭何收秦圖籍
具知天下阨塞戶口多少疆弱自非郡國有志風土有記何因
而然茲事於縣政若緩而實切蓋傳今貽後所關者大鮑君可
謂知所先務矣寶祐甲寅中元日胸山丘岳叙

總序


郡有志邑亦有志志非史也所以述史而備記也聖人之於史








亦惟述而不作况邑志乎琴川舊志荒落丙辰慶元孫應時修
飾之更八政庚午嘉定葉凱始取而廣其傳時久人殊事多闕
且軼覽者病焉於是叙縣以表之有邑此有長有長此有丞下
於丞曰簿尉酒稅是爲縣官鎮有監寨有巡各屯乃職以贊其
長故次之以叙官邑于虞山之陽鄉招真行山之南境則之秋
報而西迤興福行山之北境則之宣化而北山縣之鎮也故次
之以叙山縣有海嵎南沙常熟之異名又別曰琴川其義蓋內
取七港外取五浦要亦專指水爲言而溝洫之利以之江海之
防以之故次之以叙水邑爲沮洳之區田疇衍沃而病於經界
之久壞端平始釐正之畝步既正賦役向平故次之以叙田中
興重在江防禁旅舟師雲屯許水近又增福山新軍而縣之弓



兵寨兵亦所不可廢故次之以叙兵山川蓋靈秀所蓄也虞山
瑰竒琴川清澈其鍾而生之者亦必有異矣故次之以叙人人
固有之物亦宜然土地所出風氣所宜殆不一種故次之以叙
物內之道宮梵宇槩見述縣之目其以靈異著于鄉都間古迹
頗可覆而邑人奉西方教者尤夥故次之以叙祠若夫斷碑仆
碣之僅存新珉近琬之方揭棲墨于垣塗粉于柎亦足為千古
之證也故以叙文終焉博學宏辭科迪功郎新浙西安撫司準
備差遣褚中撰

且輝曾香所為長吟繼以未之有也其地有青牙池有金不
而却如而不和也邑志中琴川靈秀著於人入叔章之關











重修琴川志目錄

卷第一

叙縣

縣境

縣城

坊巷

社壇

館驛

橋梁

營寨

池

縣治

門

廟學

公解

亭樓

倉庫

義阡

鎮



市

酒坊

卷第二

叙縣

縣界

卷第三

叙官

縣令

主簿

監鎮

卷第四

三崗

鄉都

縣丞

縣尉

巡檢



叙山

卷第五

叙水

江防

水利

涇

卷第六

叙賦

田

戶口

役錢

海道

湖

塘

地

稅

常平義倉

拍店

酒課醋息

商稅

上供

錢庫

職田

縣役人

鄉役人

卷第七

叙兵

許浦水軍

顧逕水軍

寨兵

鋪兵

卷第八

叙人

進士題名

人物

卷第九

叙產

卷第十

叙祠

寺觀

冢墓

卷第十一至十三卷


叙文

碑記

卷第十四至十五卷終

題詠

拾遺



按琴川志自宋南渡版籍不存其後慶元丙辰縣令孫應時嘗粗修集迨嘉定庚午縣令葉凱始廣其傳至淳祐辛丑縣令鮑廉又加飾之然後是書乃為詳悉自是迄今且百餘年顧編續者未有其人而舊梓則已殘毀無遺矣靖惟是州虞仲子游文化之地不可無紀爰屬耆老顧德昭等編求舊本公暇集諸士參攷異同重鋟諸梓其成書後凡所未載各附卷末總十有五卷仍曰重修琴川志其續志則始於

有元焉至正癸卯秋七月初吉守禦常熟領兵副元帥兼平江路常熟州知州盧鎮謹識

重修琴川志卷第一

叙縣

古制五鄙為縣此遂縣也四甸為縣此州縣也王畿千里分為百縣縣有四郡此畿縣也時縣大而郡小至春秋楚莊王滅陳遂縣陳則縣為尤大戰國相侵大國分置郡邑縣鄙秦分三十六郡以監天下之縣而縣始統於郡矣是制一定迄今如之茲地之為縣也自晉始而海虞南沙常熟凡三易名其更革當紀其沿革當具其建置本末當攷其事目小大當詳俾考古以訂今者於此乎有稽焉故作叙縣

望常熟縣

唐為擊經及九域

宋朝祥符圖

漢會稽郡吳縣有虞鄉乃

縣地也吳孫權時嘗置虞農都尉於此晉武帝大康四年始

建為海虞縣仍屬吳郡按晉招真治碑海虞縣者則虞農都尉太康置其宰成帝咸康

七年分海虞置南沙縣屬晉陵郡今縣北三十里齊以南沙為

常熟縣今崑山縣一百三十里常熟故城是也前志及紹

冢在吳郡常熟縣海虞山記乃齊永明間陸澄所作則在齊已有常熟之名曰梁改恐誤梁因之及置信

義郡隋平陳郡廢縣屬吳州并所領海隅前京信義海虞

國南沙入焉治南沙城按梁書梁初分婁縣置信義郡大同初復分信義置崑山縣隋初廢信義

入常熟時崑山亦廢故信義為常熟地至開皇十八年復置崑山縣信義當歸崑山又按吳郡志崑山西二十里有村曰

信義土人或說為鎮義據此二說則信義非常熟地矣然前

志縣有信義坊又舊琴川橋亦名信義必有其故更俟博攷

至唐高祖武德七年移於海虞城至齊門九十里即今治也若縣所

以名之義則未有攷意者海虞以山南沙以地而常熟則或

以土壤膏沃歲無水旱而名歟楊備詩有歲歲多收常熟田之句意亦可見命縣境有常

熟山在縣北三十餘里本名銅官山唐天寶中改為常熟山則山蓋是因縣為名耳又別名曰琴川此

其顛末也縣治前後橫港凡七皆西受山水東注運河如琴弦然今僅有一二通流餘皆堙塞或云五浦注江

亦若琴弦或又云取言游弦歌之意然弦歌乃武城事於此言之則成附會矣

縣境

縣在郡東北百有五里東西九十里南北一百里是為提封

之境東五十里入崑山縣界西四十里入江陰軍江陰縣界

南五十里入長洲縣界北五十里至揚子江以江為界

是為四正之境東南九十里入崑山縣界以花瀆口為界東

北一百一十里入崑山縣界以浪港浦為界西南一百一十

里入常州無錫縣界西北一百七十里入江陰軍江陰縣界

是為四隅之境至杭州四百六十五里



縣城諸城附

縣有城古制也張璠為福祿令治為百城最呂又為綿竹令政為諸城首古今地理志縣以城名者不一常熟縣城其廢已久而墅落諸城名尚可攷前志云縣界相傳有城十二而舊所載者石城金鳳城尚墅城九里城凡四而已訪之近地有鵝城扈城朗城莫城餘未知其詳今縣東三十里有陶城閭城郭城利城皆有遺址而陶城尤大與莫城等合前志所載九城共十有二城縣接江陰東西相距僅百三十五里南北七十三里而城若何其多耶按唐廣明中盜賊羣起詔諸道州縣於墅落許立城堡集民兵自衛城多或恐以此

縣城 前志云縣城周迴二百四十步高一丈厚四尺今

不存

石城 吳越春秋夫差興樂石城越絕書曰石城闔廬所置美人離城也吳地志云吳王離宮越王獻西施於此今縣北五里有石城里

金鳳城 在縣西北四十里

尚墅城 在縣北十八里

九里城 在縣北九里

鵝城 在縣東南

扈城 在縣北五里

朗城 在縣東南

莫城 在縣南十二里

前志云莫城俗傳是莫耶鑄劍之所亦謂之劍城今有小廟云莫邪大王是也或謂之鎮鄒城有塘曰莫門塘縣東四十里又有莫城按寰宇記漢莫寵所築以捍海賊因名

陶城 在縣

郭城 在縣

利城 輿地志云晉元帝以海虞縣北境之土山立利城以處流民

今門 建炎間令李闥之建

東曰行春 在縣東由三里橋虹橋梅里出許浦至江水曰東橋

西曰秋報 在縣西由嶽廟虞山小山葛墅河陽蔡舍慶安出江陰軍界門外即尚湖水曰西柵

南曰承流 在縣南由三里斜橋出吳塔至長洲縣界入府水曰南柵

北曰宣化 在縣北由虞山北出頂山至市橋鷄籠墓出尚墅

東北曰介福 在縣東北由五里牌丁涇塘尚墅出福山至江水曰北柵


坊

市必有坊尚矣裴中令之集賢坊白太傅之履道坊昭君坊之繁盛處士坊之淒寂皆足以觀里仁驗民風也前志載常熟凡十二坊曰言偃文學德政和風惠政隱僊崇德化合信義開元清真常平今皆不存或謂昔之坊今悉為巷如子游巷意即言偃坊歟而今之坊十有三則又各有其義

製錦坊 在縣治之右與飛鳥坊相對舊名太平坊

飛鳥坊 在縣治之左與製錦坊相對舊名仁壽坊

富民坊 在縣東



春風坊

在縣東北以崇教興福寺故名

興福坊

在縣西何家橋

壽安坊

在縣西北以冷副端兄弟連登科故名

叢桂坊

在縣西北通慧日寺

衍慶坊

在縣西北以錢丘富諸寓公皆居此故名

聚星坊

在縣西北以曾丞相居此故名西出秋報門

袞繡坊

在縣西北以崔紫微居此故名

紫微坊

在縣西北以登虞山故名

虞山坊

在縣前以縣學居其左故名本名學道坊前令王煥建後令別楠改今名

巷

紀瞻之居烏衣巷顧雍之居黃鸝巷皆因圖乘而傳縣有子游巷故後世以子游為吳人者以巷而知也

吳國言公東巷

吳國言公西巷

市心巷

青果巷

新街巷

金駝巷

廟巷

鎮橋北巷

白家巷

朱師巷

曾家巷

邵巷

何家巷

冷家巷

捕盜巷

廟學

黨有庠遂有序二十五家里門有塾古之鄉校也郡縣分而
 鄉校廢宰百里而興學者載於歷代之史不過數十人他無
 所見然大槩則亦鮮矣宋均在辰陽禁絕淫祠修立學舍仇覽在蒲亭子弟羣居遣就黌舍劉染

在新城朝夕勸戒大作誦舍范寧在餘杭興學養士捐俸給助馮伉在醴泉著諭蒙書訓迪學子令遇在餘姚首崇學校教勸生徒義安在吉安清歌弦管行釋奠禮景毅在高陵修立文學禮遜化民嗚呼此世道之所以
 不古也常熟縣學在縣東南二百步夫子廟居其中大成殿額乃宣

和中按祥符圖經至聖文宣王廟在縣南五十步以今地勢

攷之不合然夫子廟其來久矣而學宮之制未詳慶元志略
 不及之獨堂宇舊棟題至和者二得非慶曆有詔逮至和始


創學歟淳熙十年令曾祭加葺名講堂曰進學紹熙元年令

葉知幾更曰明倫舊有齋九曰崇德時習好謀朋來利仁隆

禮育英守卓隆德後所存四齋曰尚志尚德尚賢尚文端平

初元令王燭以其卑陋湫隘積久滋弛日惟覆壓是懼且廟

處于學併雜喧溷尤非所以尊事先聖乃因故址闢而新之



放郡庠之制東為廟廟之前為殿門又前為櫺星門兩廡繪

從祀徒吳公祠于殿後東建六先生祠堂瀛溪周先生

明道程先生西為學前為學門中橫經仍

曰明倫東西兩廡各列職事位一於其旁次為隸業之齋凡

六曰志道據德依仁游藝曰稽古藏祭器祭服官書曰象賢即小學也專以

教育言氏子孫別為廩給明倫堂後為直舍齋廬暨庖廩器

具增造悉備總為屋百二十楹加於舊者幾半而高闊壯麗

則非舊所可髣髴也增置學糧至千斛訓導課程秩然有序

學之庶事於是畢舉而講學修身所望於學者則甚切矣詳見

臨印魏樞密了翁記

吳公祠

吳公祠慶元三年令孫應時建為屋三楹在明倫堂之東偏
朱文公為之記至寶慶間令惠疇以其卑狹乃更建于學之
東門廡堂室幾三十楹識者復議其位序矣宜且規模高廣
殆過於殿尤為非禮至是令王爚既遷禮殿乃徙是祠于殿
之後始為宜稱故其上梁之文有曰自東自西兩巖廟學之
制在前在後兼妥師友之靈蓋叙其實云

社壇

常熟社壇在縣西一里三十步莫攷其創築之始紹興甲戌
令任古淳熙辛丑令陳映嘉定辛巳令葉凱皆嘗修治然規
模粗備禮制終未盡合加以地勢拘逼湫隘特甚嘉熙改元
令王爚乃因故址闢而新之東西二十丈南北十七丈按政



和祀式參以朱文公問荅及武昌記所載爲五壇四壝東社西稷居前北向東風伯西雨雷師居後南向與社稷相背中隔以墻壇皆三成前二壇趾各方二丈五尺兩成三成各殺尺崇二尺復三壇址各方一丈六尺兩成三成各殺尺崇八寸壝四門社稷各壝方四丈五尺高三尺五寸瘞坎二居壝外之西北風師爲一壝方二丈八尺高二尺五寸雨雷師同爲一壝高如風伯而方倍之半居壇之南南北各爲齋廬三間西北爲大門扁以社壇袁甫書繚以周垣甃以堅甃而相以松栗與土之所宜木於是始稱國家欽崇命祀之意知府事敷陽王尚書遂爲之記

公廨

單父之堂言游之室廣昌縣之廳事山陰縣之門堦見棠思召千古如存長百里者求稱其居可也

縣廨多治平間屋廳之東北有琴堂紹興中令孔瓚重修
淳熙中令劉穎改爲學愛甲辰令曾繁新作寢室舊有
君子堂共賦堂歲久多圯廢慶元戊午令孫應時乃一
新之又於廳之東創笑軒葺其後圃爲亭曰友山西爲
夾墻繚寢室後以通西偏爲亭於西北曰是亭亭之南
即共賦堂堂後累石爲山竹木陰翳與君子堂通嘉泰
壬戌令何充重建縣廳頗雄壯開禧戊辰令葉凱於隔
舍之南闢軒曰簾晝寶慶丙戌令惠疇於後圃創景言
間紹定辛卯令史彌厚治東圃建堂未名後令戴衍扁

曰讀書堂嘉熙丁酉令王燭因學愛堂之舊重行改創
易曰道愛淳祐辛亥令別楠治西圃移讀書堂於其中
有亭曰直節遂廢東圃云

丞廳在縣治之東淳熙初元丞張孝重建廳事其燕坐曰
涉筆曰篤素

簿廳在縣治之西與丞廳相對淳熙間簿蕭達重修廳事
有燕坐曰愛蓮靜暉寄隱淳祐辛亥簿唐世忠復新其
堂榜曰均政

尉廳在縣治之北二里隣順民倉紹熙中尉趙笈夫所創
一廳事後小閣曰樂山向西諸峰屏列几案間改曰挹翠
後為隣居障蔽無復曩時之勝易曰斗室北有小圃圃

有二亭曰藏春曰野趣歲久堙蕪而尉廳亦頽圯矣淳
祐戊申尉周介夫葺而新之廳廡堂宇視昔加壯廳之
西偏軒曰梅隱後圃臨流築亭曰濯纓

館驛

市有候館周制也漢十里有亭唐三十里有驛皆所以為徃
來者次舍廬宿也竇兢為鄆令增修郵舍張希顏為萍鄉令
完葺驛傳史類稱之驛舍之修理是亦足以觀令之政云

縣東驛

在縣東南

琴川驛

在縣南承流門裏西向漕渠舊址曰南
亭嘉熙初元令王燭增闢一新榜今名

甘棠館

在迎恩橋之東後更名八仙館紹
熙五年令葉知幾更曰和旨堂

弦歌館

在縣西南二十步縣令葉凱
更名百花堂今為賞心亭

亭樓

于東陽嘯詠於涵碧亭李虞城遊憇於蠡丘館世率謂其游亭館而廢事然觀柳子厚論作邑者以為氣煩則慮亂視壅則志滯君子必有游息之物高明之具使之清寧平夷常若有餘然後理達而事虛則夫嘯詠游憇之地所以養其清明而為政之助也若夫楊烟為盈川令多治亭臺書榜美名則非為政之所急矣

宣風樓

在縣治西紹熙辛未令曾慎建紹熙四年令葉知幾更曰慶豐自此至賞心亭皆權酤之所

燕喜樓

在縣東

旨清樓

在縣西北

春風樓

在縣東迎恩橋南

賞心亭

在縣西即舊絃歌餘

極目亭

在虞山上乾元宮前前眺平疇一目無盡雙湖橫陳詣山歷歷可數最為登覽之勝舊曰望湖令徐

久鐸更名

縣樓

承平時所建頗壯麗紹興二十一年太守徐琛募額

道間令趙善括易以林東篆刻石于廳事側慶元己未春令孫應時修之左右各有亭左曰御筆手詔右曰寬恤事件

橋梁

嘗觀宋天聖三年蕪湖令董黃中浮橋政成仁宗嘉其有愛民之惠詔縣民愛護以圖永便則知縣有橋梁所以便民也為令者亦不可不於此究心焉

縣橋

在縣治前十五步

沈家橋

在縣西俗呼為染子橋



琴川橋在縣治直南跨運河舊名信義淳熙十年令

迎恩橋在縣治直東

文學橋在縣東北百五十步舊名言偃橋俗呼醋庫橋在縣

東北一里而前志併二橋為一未知何故

通濟橋在縣東北俗

瞿橋在縣東北舊志有隱仙和風二橋其名

廣惠橋在縣東北舊名通泰紹興間錢氏新之少卿陳棧書其名曰廣惠俗呼通江橋前志耆老猶記海船

常至邑郭故邑市有通江橋

慶仙橋在縣西南

顯星橋在縣東南二百五十步父老相傳昔有星墜地為石尚存今在橋之東大數十圍深不知其根故以

名橋旁有涇曰落星港

善利橋

昇仙橋

孩兒橋

順民橋

何家橋舊名和嘉

東何家橋在縣東北舊名和豐

望仙橋

八字橋

太平橋

鎮橋

焦家橋

范公橋

草橋

龔家橋

王家橋

中和橋

魚行橋

天心橋

金家橋

小虹橋

黃柏橋

包家橋



俞家橋 在縣西北

倉庫

唐令籍帳傳驛倉庫河隄雖有專當皆縣令兼總之宋淳化三年嘗詔縣令之任風化所由耳躬撫字縣令不許監筦倉庫竊謂凡為縣者固不當以貨財為累然倉場庫務所合糾察昔胡綱為河內令每親詣縣倉人以善政歸之則以高雅自將而不屑屑於此者亦非縣令之所貴也

順民倉在尉治之東東臨漕渠治平二年令向宗旦建郎

為之其屋南北西為列紹熙四年常平使者徐誼給錢

修其西慶元三年丞傅良新其北四年令孫應時新其

南嘉熙元年令王爚以比年食米之餘散蓄塔院為非

便乃包東北舊征官廢解地入焉增創教屋十間然後
寬綽有餘矣

常平義倉在順民倉之北廡

省庫在縣廳之右

苗倉庫在縣廳之左

國用庫在縣中門之西廡

務

酒稅務在縣東北坊橋規模整備比年醞造爲數不及於
前務止爲收稅地醞造乃移就縣之景言閣猥雜喧併
甚失建立初意而縣務遂成虛設於是日漸傾仆悉不
暇問凡舊屋之櫛木換易竊取殆無復遺餘矣

外福山慶安梅李許浦四鎮各有稅務類供郡之版
計前此郡惟責團解於縣鎮有逋欠悉置不問故鎮
官恬弗加意月解久益不登縣之難支亦其一也嘉
定間令葉凱歷陳其弊於郡乞勒各鎮徑自發納郡
守林侍郎采慨然從之惟福山以兼酒故尚仍舊貫
至淳祐初令趙師簡復有請乃如三鎮例酒稅併自
納於郡焉

市易務在尉解西南後廢爲民居今猶有市易務巷

軍糧庫在縣治西南後廢

醋庫今但存醋庫橋

營寨

縣掌游徼兵古制也晉志縣令統賦曹掾史兵曹都亭皆主
縣兵宋制縣有戍兵則兼都監次兼監押後復兼軍正之職
而營寨則各有其地焉

營

開江營錢氏有國時所創宋因之有卒千人爲兩指揮第
一指揮在常熟第二指揮在崑山按朱長文志錢氏置
都水營田使以主水事募卒爲都號曰撩淺當是時欲
富境禦敵以是爲先務宋天禧天聖間吳中水災命發
運使張綸同郡守經度於崑山常熟各開衆浦以導積
水景祐中范文正公來治此州值歲歉深究利病以謂
淞江不能盡洩震澤之水當疏導諸邑河渠東南入淞

江東北入于楊子與海於是親至海浦開浚五河論者
沮之公力破浮議疏濬積潦民受其賜云後大理寺丞
環周言平江低田多爲水浸蓋諸浦中白茅浦最大今
爲淤塞望令有司於農隙開決俾北派流通實無窮之
利詔漕臣措置旣而副使趙子瀟知平江府蔣璨言昔
人於常熟之北開二十四浦疏而導之江後爲潮汐沙
積而開江之卒亦廢乃詔察院任古覆視及古至常熟
言五浦通江委是快便今乞止於常熟招填百人此蓋
知五浦之利害者蓋五浦皆注于江東則白茅浦東北
許浦正北福山浦西北黃泗浦奚浦五浦常浚則潦無
漲溢之虞旱獲灌溉之利邑名常熟實本諸此者老猶

記海舶常至邑郭故邑市有通江橋而許浦過梅里鎮
潮汐迅急鎮橋之下往往壞舟至開月河以殺水怒至
紹興丁卯康舉之作招真庵記猶云邑去江不及程陂
湖畎澮之積自南至者傾馳入于江江潮既應則迅瀾
倒流逆于市橋之下二水相制移時不能去意者開江
之卒屯無所役專以更迭浚治五浦前人經畫之意深
矣自朱勔進花石綱盡奪諸營卒以往而二邑之開江
營遂空紹興初猶有老弱居之後徙入州至今府之役
隸往往有開江兵士之目而此邑之營地爲尉司教場
久矣自丁卯至今五十年五浦淤塞已甚至或委曲如
一線水旱之患歲臻識者嘆恨焉尉司舊教場在順民

倉後又有捕盜院在通濟橋之東北今皆廢
寨

許浦水軍寨在縣東北七十里乾道六年初自明之定
海分屯于此是時也正值孝宗銳意中原而以海道爲
虞故用馮湛計使度地形便以立此軍先是建炎紹興
隆興用兵時水軍嘗戍江陰亦頗分守福山及許浦爲
要害之地方湛分屯之初許浦極深闊實可藏戰艦東
出海門料角之間勢與膠西相直然比十餘年來許浦
淤塞戰艦非鑿塢不可容非潮盛不可浮浦外沙渾亦
益隆起潮雖盛大艦裝重亦不能出海道有變其應接
非便也議臣或請稍分屯顧逕識者謂今顧逕雖形便

安知不復為許浦之湮塞要之江沙往來開塞不常未
如定海依山立寨正瞰深海為天設之要地也水軍凡
八十人平江府給其錢常熟崑山吳江輪給其糧中外
諸官皆受糧於官庾此獨煩縣自載而輸之軍彼得制
其槩量大為三邑之害前令何充有請於朝令軍中遣
隊將受糧於官庾其害遂息軍人利其水脚之費亦所
樂為吳江崑山陰受其賜
許浦巡檢寨土兵一百四十四名額
福山巡檢寨土兵一百四十四名額
白茆巡檢寨土兵一百四十四名額
捕盜院元在通濟橋東今廢

尉司教場在縣即古開江營基也舊在順民倉之北

義阡

賑貧恤孤瘞骸掩骼仁政也宋元符崇寧詔旨具在固為政
者之所當先焉

養濟院在縣

一在東北
一在西南

漏澤園在縣北宣化門外

義阡在宣化門外明府塘橋之北嘉熙元年令王燭市民

地為之四繚以墻前列棧門凡葬者占地廣尺修

尺屬其事報慈命僧生掌別創屋三間以居之又買田

陸拾貳畝米肆拾貳碩歲收為給養費詳見勸諭文并

規約

勸諭文云古人之法必犯大惡則焚其屍今風俗之弊子孫曾不以為異只是習慣不以為事今有狂夫醉人妄以其先人棺槨一彈則便為深讎巨怨及親按其遺骸納之火中則略不以為恠可不哀哉右河南程先生語世人有沒於遠方者子孫火焚其柩收燼而歸葬夫孝子愛親之肌體改斂而葬之殘毀他人之屍在律猶有嚴禁况子孫乃悖謬如此其始蓋出於羗胡之俗浸染中華行之既久習以為常見者恬然曾莫之恠豈不哀哉右溫國司馬文正公語吾邑本先賢故里近畿樂郊宜其道義興行風俗醇厚養生送死不背禮經而焚屍一事反視他邦為甚如

無錫江陰近在隣境亦聞未嘗如此

因仍習倣安以為常不孝不仁莫

大於此只緣善教不明佛法滋熾日沾月染民胥從之佛本胡人火化乃是其國之俗凡有死者聽命緇徒廣為齋設雖重費而弗靳至於謀葬則百端算較眾口沮難甚至惑於陰陽之說又以因葬致禍為憂大抵只欲一舉遺骸徑投烈焰以為省便之計不惟問闔貧細為此雖潤屋儒冠亦鮮有墳墓之可守者豈不痛哉夫生民與禽獸異中國與夷狄異正以其人倫之親恩義無盡而先王制為喪禮因其天性以節文之衣衾棺槨以謹其終事葬埋祭祀以久其哀思一有不至則吾心為之不安此生民所以為貴而

中國所以爲尊也彼胡羌之俗譬若禽獸浮屠氏立教固已背棄倫理絕滅種類則其死後以天生地長可貴之身取快於灰飛煙滅而甘心者不足恠也若乃吾民家家氣脉世世流通有子有孫慎終追遠此乃天經地義之常永無息歇何忍舍正道徇異教陷爲禮法之罪人而終不知懼耶且生而爲人身體髮膚孰不愛惜今旣幸免毀傷歿以正命而瞑目之後爲之主者反不與之保全衛護使同飛走之羣終受炮炙之禍雖是父母亦置不卹有人心者一念及此寧不內自摧怛而亦何顏戴天履地乎是非順逆有不難見令爲吾邑之民痛傷久矣詢之故老邑舊有

義阡九數處歲久堙廢無從修復雖見有叢冢又以囚死或客死者埋瘞其中故吾民耻列於此今謹倣周官墓大夫之制遵國朝漏澤園之令別卜義阡一區專爲細民宅葬之所環以百堵限以重門又爲之建屋市田以贍守者凡可爲經久之計無不用其至是用諄切告戒開曉爾民使知正道之當由異教之不當徇而無以令之言爲迂焉昔程純公之宰晉城也俗尚焚屍純公教諭而禁止之民咸信從令雖德薄莫望前賢然拳拳愛民者實與純公愛晉城之民同一心也爾民其尚聽之庶幾下以成移風易俗之美土以廣昭天漏泉之澤若死若生兩無所憾所

有司馬溫公程先生勸戒二條義明意切讀之感動
備揭于右方云右今勸諭各宜知悉嘉熙元年八月
日承議郎知平江府常熟縣主管勸農公事王燭

池

放生池舊卽破山興福寺白蓮池爲之乾道間令趙善括
改就東塔崇教興福寺

洗馬池

在縣北六里父老云紹興初尹團
練者屯兵防江洗馬於此故名

三角池

在縣北十二里

興賢池

在虞山乾元宮嘉定間鑿
池得石有興賢池三字

鎮青田

鎮烏石鎮唐時有之鎮名其始於唐歟

福山鎮在縣北四十里臨江

慶安鎮在縣西北八十里臨江本石闥市舊有石門今不
存

許浦鎮在縣東七十里臨江紹興間於此置鎮

梅李鎮在縣東三十六里慶元志云吳越錢氏時遣二將

梅世忠李開山戍此以防江北南唐之兵居民依軍成

市因取二將之姓以名其地故云梅李市元豐間始爲

鎮舊智林寺佛殿拜石刻作梅李乃至和中題則里當

作李明矣後版曹易李爲里恐是一時之誤遂因之或

引史記注吳地記泰伯所居之梅里及皇覽說泰伯所

葬之梅里與今梅里並列爲三者殆弗深攷

常熟鎮在縣東百二十步今廢縣猶有鎮橋在焉

塗菘鎮在縣東南一百五里元豐間去鎮爲市

市

祥符圖經所載常熟縣舊有七市今存者四耳續增直塘楊

興二市

縣市今廢

梅李市今爲鎮

石闢市今爲慶安鎮

練塘市在縣西南去縣三十六里

支塘市在縣東北去縣百里

甘草市在縣東北去縣百五里舊志云甘樹市

塗菘市在縣東北去縣百五里舊爲鎮元豐間改市

楊尖市在縣西南去縣四十五里

直塘市在縣東南去縣九十里

崗

按吳郡志常熟有三崗福山崗徘徊崗塗菘崗

酒坊

縣有外坊十一輸課雖不繫于縣然私釀犯禁縣得理焉故

附見

戶部酒坊四名以贍軍吏部揭闕課入版曹而兩浙漕臣

領其事月解詣漕司

塘頭

河陽

原塾

支塘

本府酒坊五許民間買撲或郡自遣吏給本措置課入輸

郡

梅里

尚墅

徐鳳

塗崧

陸河

馬軍司酒坊二殿司馬軍出戍金陵軍中自遣牙校蒞酒
政後亦許民戶買撲

莫城

五林

以上諸酒坊課額盈虧縣皆無與各分疆界彼此
酒不越境境內或有私釀則訴諸縣縣為懲治而
已

重修琴川志卷第二
叙縣

縣界

第一界

顯星橋至南柵過跨塘橋街東北至縣前西入壽

安坊堦東直止東子游巷街南轉東南青果巷迎

恩橋西止丞廳南止縣學西

第二界

跨塘橋街西直上西何家橋丁家茶坊入壽安坊

堦西止西子游巷街南直上善利橋至錢通判宅

止西柵

第三界

顯星橋東直上文學橋東堦入巷街南止東塔寺

後河南河北



第四界 塔後西起坊前東止東柵北止北水柵

第五界 東子游巷街北起止瞿家橋西南止丘監丞宅街

東一帶西北過橋直下至廣惠橋西塊街北向西

轉北止尉司街西直上邵家巷東止北旱柵東

第六界 北旱柵西起一帶止東南包家橋西一路止葛莊

基西南止陳茶鹽街北止教院後門北公街

鄉都

九鄉五十都

按郡圖經舊十二鄉有太平欲行昇平三鄉元豐九域志併為九鄉

感化鄉在縣西北 管都七

第一都

管里四 虞山 武昌 新興 小山

鄉村

山前 湖村 寶嚴寺前 小山 下祁

管民田一萬八千四百八十一畝五十四步半係中

則

諸色官田八百九十七畝一角半步

第二都

管里三 小山 崇信 日安

鄉村

塘頭 顧莊 野塘 東水頭 河泊市 湖莊

管民田二萬四千二百九十二畝一角三十一步係

中則

諸色官田一千二百一千八畝二角五十八步

第三都



管里四 日安 崇信 安仁 昭墟

鄉村 東西花林 夾舍 道林 沙堰 孫舍 城 綴市

充陂 鄒莊 周莊 柴村

管民田二萬九千二十畝一角二十四步係中則

諸色官田六百九十四畝三角五十一步

第四都

管里四 昭墟 崇信 顧山 柏城

鄉村 楊尖 黃屯 後莊 馬市 杜朱堰 石塘 陳塘 宗母宅 羊莊 西石靖 白塔堰

管民田二萬五千二百二十一畝三角三十步係下

則

第五都

諸色官田二百五十五畝一十三步

管里三 小山 遺愛 日安

鄉村 麻鞋村 李甜市 東石請 陳黃 支市 毛巷 嶺村 晏莊 錢市 晏村 大和 鍾綴

管民田三萬五千九百四畝三角五十二步係下則


諸色官田七百六十六畝三角二十步

第六都

管里六 宣慈 小山 國昌 西陽 通道

鄉村 下市 陸市 于塘 東于市 潘塘 童莊 伍市 中澳

管民田三萬五千七百二十六畝一角八步係下則



諸色官田八百八十八畝三角二十二步

第七都

管里三 翔鸞 通道 宣慈

鄉村 錢莊 顧莊 蔣祁 頂山 塘宅 蔣舍 林莊

管民田二萬六千三百一畝三角四步半係下則

諸色官田七十一畝一角二十一步

崇素鄉在縣西北 管都三

第八都

管里三 山陽 元陽 河陽

鄉村 河陽坊前 陸塘 英舍 東徐 西徐 西莊 魏莊 朱村 徐岸 東邵市 西邵市 張市 黃村 祁村 至塘 虎忽 水北 蔡舍 袁市

怯村

管民田四萬四千六百五十一畝四十一步係中則

諸色官田三百一十一畝三角三十六步

第九都

管里三 元陽 新莊 歸仁


鄉村 湖下 河陽山前 河陽橋 中澳 下澳 田莊 厚村 邵巷 焦宅 陶蘆舍

管民田二萬六千六百五十二畝二角二十六步係

中則

諸色官田二百八十七畝三角

第十都



管里三 南金 歸仁 修仁

鄉村 北莊 蔡舍 孔涇 凌莊 蔡村

管民田二萬一千九百四十五畝三角五十二步係

中則

諸色官田一千二百八十九畝一角四十七步

南沙鄉在縣西北 管都七

第十一都

管里三 敬真 永定 修真

鄉村 烏村 徐舍 闕莊 東邵舍 金莊村 慶安寺前

管民田二萬八千六百八畝三角四十三步半下則

諸色官田二千八百四十七畝二角五十四步

十二都

管里二 修仁 昌陽

鄉村 沙港 泗江 高市 新村 界涇 東檀祁 西檀祁

管民田二萬五千二百七十八畝一角四步係下則

諸色官田二百三十四畝三角三十三步

十三都

管里三 昌陽 陳致 修仁

鄉村 新莊 陳陸園 楊澳村 黃泗浦 王十二店村

管民田一萬五千五百六十一畝二角三十三步係

諸色官田八百五十六畝一十八步

十四都

管里三

修仁

陳致

伍相

鄉村

蘆舍
草長

奚浦橋
毛巷

榮莊
戴巷

尹涇

姜村

管民田二萬二千八百二十四畝二角九步半係中

則

諸色官田六百二十四畝四十五步

十五都

管里五

宮城

開元

永昌

崔明

伍相

鄉村

孟市
候村

尹市
盆社

邵塔
西官城

新安

李埭

管民田三萬二千八百四十二畝五十四步係中則

諸色官田六百一十八畝一角三十九步

十六都

管里三

江平

永昌

何墜

鄉村

東皇村
桑舍

景市
西山村

李烏村
蒲林

潘祁

下臯

管民田三萬三千七百三十六畝一角五十八步係

下則

諸色官田三百七十三畝三角三十五步

端委鄉在縣東北 管都六

十七都

管里四

宮城

太平鄉

靈芝

言偃鄉

鄉村

吳涇
桐巷

孫巷
謝莊

西楊橋
蘆浦

鰻魚浦
陶山

陶舍
西山

管民田一萬九千三百九十三畝一角四步係下則

諸色官田七百一十一畝一十六步

十八都

管里二

慕善 承化

鄉村

河灤 崔浦橋 吳涇 新漕 安樂

管民田三萬四百一十四畝三角三十八步半係下

則

諸色官田一千四畝四步

十九都

管里三

承化 永安 崇德

鄉村

黃鶯村 耿涇 野兒漕 中沙 崔浦

管民田三萬三千四百二十四畝二角十二步係下

則

諸色官田三百畝三角二十六步

二十都

管里三

永安 太平 崇德

鄉村

馬暢 徐六涇 千步涇 黃泥村 鄔溝 太平寺 瓦浦

管民田五萬四百四十九畝三角一十七步係中則

諸色官田三千二百二十七畝三角四十九步

二十一都

管里三

崇善 青山 承化

鄉村

大坐 花莊 新產 陶舍 高墓 東馬暢 青村 杏前

管民田五萬六千八百一十五畝一角七步半係中

則

諸色官田一千六百一十七畝二十四步

二十二都

管里二承化 慕善

鄉村

花莊 水門塘

花社

檀林

陸莊

福山 柵前

管民田二萬七千七百二十五畝二角五十二步係

中則

諸色官田四百五十一畝三角四步半

開元鄉在縣東北 管都四

二十三都

管里五

和興

欽豐

孝義

孝慈

翔鸞

鄉村

尚舍 後舍

河市 閻閭

西下市 陸莊

高市橋

付子

管民田三萬四千九百九十一畝二角四十四步係

中則

諸色官田五百二十六畝二角一十五步

二十四都

管里五

翔鸞

孝慈

懷遜

興國

承化

鄉村

陶莊 東下市

葉莊

九折

周市

辛莊

下莊

管民田四萬六千二百九十七畝二角一十三步係

下則

諸色官田一千三百八十三畝二角二步

二十五都

管里二

懷遜

懷仁

鄉村

哮喘塘

陳莊

辛舍

黃莊

九里

薛莊

東顧莊

西顧村

雉浦橋

宮璉

鄭莊

西曹莊

三村

瞿舍

管民田一十一萬二千五百三十九畝四十一步係

上則

諸色官田七千七十六畝一角三十四步

二十六都

管里三

習善

德仁

太平

鄉村

菰里

東漕莊

陶涇

李村

馬及

管民田七萬三百三十二畝三角三十二步係中則

諸色官田六千九百一十七畝二角八步

思政鄉在縣東南 管都五

二十七都

管里四

集賢

道義

永安

招德

鄉村

楊塘

真門

長毫

北舍

沈塔

管民田九萬二千七百二十二畝一角三步係下則

諸色官田六千六百二十畝一角五十五步半

二十八都

管里一

昭德

鄉村

東西李墓

南港

北港

季渭橋

管民田四萬七百八十八畝二角三十二步半係中

則

諸色官田二千七百六十六畝三角四十四步

二十九都

管里二 昭德 習善

鄉村 羅濁 包糜 逆上 白蕩橋 賀杉橋

管民田五萬二千一百五十九畝二角五十一步係

中則

諸色官田三千三百九十八畝三角二十步

三十都

管里二 新安 昭德

鄉村 新產 五浦 黃泥村 唐浦 官竹園
徐六涇 朱堰 翰村

管民田四萬四千六十七畝五十七步係中則

諸色官田二千三百四十七畝三角五十一步

三十一都

管里五 昭德 楊王 高浦 白艾 金涇

鄉村 高浦 金涇 白艾 海頭
宮莊 凌莊 黃沙村

管民田四萬八千七百八十二畝三角五十四步半

係下則

諸色官田五千一百一十六畝五十八步半

雙鳳鄉在縣東南 管都十二

三十二都

管里二 集賢 昭德

鄉村 沙營 海頭 西桑林
高可甲 包橋

管民田五萬四千一百九十八畝三角二十三步係

中則

諸色官田五千九百八畝三角一十五步

三十三都

管里一 清化

鄉村 大河 西廟莊 下大河 東桑林

管民田三萬一千六百六十七畝一十八步係中則

諸色官田五十六畝一角七步

三十四都

管里三 集賢 清化 永甯

鄉村 上錢涇 東顧莊 黃涇
撐脚浦 下錢涇

管民田四萬四百七十四畝三角四步係中則

諸色官田四千六百九畝一角五十六步

三十五都

管里四 清化 陌莊 錢涇 嚴舍

鄉村 甘草 澁湖 成村 彭李
堰頭 陳穆

管民田三萬九千九百八十八畝三角三十二步係


下則

諸色官田五千五百三十四畝三角五十八步半

三十六都

管里三 北浦 嚴舍 錢涇

鄉村 高蘆 大浦 東嚴舍 泊莊



管民田五萬四千七十六畝三角三十一步係

下則

諸色官田一千六百七十五畝二角五十四步半

三十七都

管里五 石堰 輪洞 福順 夫差 保安

鄉村 穿山 石堰 塗菘

管民田四萬四千四百四畝一角三十六步係下則

諸色官田四千一百八十五畝一角二十九步

三十八都

管里三 無愁 集賢 石城

鄉村 桂村 漕湖 徐鳳 蘆菘 東了涇 八赤 南港 北港

管民田五萬三千五百六十九畝一角四十一步半

係下則

諸色官田五千七百七十九畝一十二步

三十九都

管里六 石城 進賢 七浦 揚波 散坵 陳莊

鄉村 西了涇橋 雙鳳村 沙頭 曹莊 大莊 眉涇橋


管民田七萬一千七百八十六畝二角四十九步半

係中則

諸色官田一萬四千三百七十九畝二角三十五步

半

四十都



管里二 吳塘 進賢

鄉村 直塘 三橋 瞿涇 斗門
朱巷 任陽

管民田五萬九千九畝一角五十二步係下則
諸色官田二萬一千三百二十六畝二角五步

四十一都

管里一 集賢

鄉村 支塘 坊前 赤沙 河舍

管民田三萬六千七百一十六畝三角三十一步係

中則

諸色官田二千一百九十八畝二角一十七步半

四十二都

管里二 集賢 吳塘

鄉村 周莊 馬莊 下廟 羅磨 畧舍 周涇
黃村 下莊 宣塘 市宅 秋塔 馬涇
張塘

管民田一十二萬九千六百二十二畝二角八步係

中則

諸色官田三萬七千六百八十三畝二角一十五步

四十三都

管里 進賢 吳塘 莫邪

鄉村 莫城 潭塘 洋澳 時澤 舍澤 黃涇
朗城 薛澤 三家村 畢澤

管民田七萬五千一百一十一畝二角二十六步係

上則

色官田二萬二千五百一十三畝二角二十八步
積善鄉負郭并縣南管都二

四十四都

管里四 懷仁 東沼 青村 郁澤

鄉村 五瞿 過莊 祐村 斜橋 青亭
呂舍 張港 於沾 沼頭

管民田十萬五千九百三十七畝一步係中則

諸色官田九千八百一十五畝三角五十六步

四十五都

管里二 扈城 石城

鄉村 陳市 瞿市 茆市 錢市 興福寺前
大步 觀莊 瞿家店

管民田二萬一十七百一十六畝二角三十二步係

上則

諸色官田八十九畝一十八步

歸政鄉在縣西南 管都五

四十六都

管里五 青村 齊門 孝廊 安仁 儀鳳

鄉村 惠洞涇 南塘 斜橋下塘 金市 藕蕩
柴涇 時村 尚湖 戈市 下莊

管民田五萬一千三百八十六畝二角二十四步係

四十七都

諸色官田二千八百二十三畝三角四十六步半

四十七都

管里三 孝節 儀鳳 義遜

鄉村

尚湖村西 鄒黃墓

胥磨 練塘市

諸岸

管民田二萬三千七百七畝五步半係中則

諸色官田五百八十九畝三角一十步

四十八都

管里二

義遜 懷仁

鄉村

陳埭 朱巷 石灰渭 荻村

東顧莊 蔡姑 平市 顧涇 錢舍 蔣店 陶舍 吳塔

管民田六萬六千六百一十七畝二角五十步係

則

諸色官田三千五百七十九畝二角三十八步

四十九都

管里三

義遜

三遜

誠信

鄉村

前周 韓莊

西顧莊 西蔡姑

李祁 宛山

東祁 鶴窠

惠舍 烏嘴

管民田三萬五千三百四十二畝三角三十二步係

中則

諸色官田五十九畝四十步

五十都

管里四

承節

誠信

三遜

義遜

鄉村

楊兴市南 西舍

錢塘 東舍

瞿里 馬疇

蒲陂 惠市

管民田一萬九千一百四十一畝一角一步係中則

諸色官田二畝二十步

重修琴川志卷第二

卷第二


卷第二

卷第二

卷第二

卷第二

卷第二



重修琴川志卷第三

叙官

縣令古子男也齊晉曰大夫魯曰宰楚曰尹秦曰令漢大縣置令小縣置長晉洎隋皆然唐始專名曰縣令其官屬漢則有丞尉名爲長史署諸曹掾晉置主簿錄事記室功曹之官而無丞尉梁隋以來復置丞尉設曹佐唐有丞尉錄事主簿司功司倉等官皆分掌一縣之治此歷代沿革然也乃若治縣之諸則學道愛人格言具在而邑先賢言游之施於武城者尚可攷故作叙官

自虞農都尉廢乃由太康爲縣置宰以來攷之傳記戴顥何子平李暎周思輯之外無聞焉殆攷之未博歟宋朝太平興

國三年錢氏納土令是邑者蔣文懌為之首至俞彥璵凡六十四人前志僅存姓名階位而到罷歲月則不也乃博求故實隨所得注其下嗣有見則補之若紹興二年施堽而來以迄于今則壁記班班矣故今編年具列且間附其所建置以詔求遠至於時事之或相關繫者亦併著之

縣令

前朝

戴顥

按南史戴顥求為海虞令出官吳下上人共為築室聚石引泉植林後隱白鶴山

何子平

按史作海虞令

唐

李暎

元和中見新開常熟塘碑

周思輯

給事中守常熟縣令咸通十三年見破山龍堂記

祀白龍于破山寺

宋

宋朝縣各置令縣大以有兵馬者以京朝官或三班知縣事咸平中詔令兼兵者陞朝為都監餘為監押慶歷以後始用文臣以知縣兼兵事崇寧二年行三舍法諸縣令佐簿尉並帶主管學事宣和三年罷紹興十三年復帶淳熙三年不入銜紹興二十一年令曾慎題名記略云常熟舊毗陵郡南沙縣梁改為常熟自梁迄偽吳尹是邑者姓名莫紀宋朝太平興國中錢氏以圖籍歸始於縣令蔣文懌至元豐初知縣劉拯求得其姓名凡四十二人列之板榜自此來者則書之

宋縣令題名

南沙望邑而縣令題名不載於史張旭一尉之微妙於草聖猶傳於後而況子男之職烏可無

聞哉宋自錢氏納土令是邑者蔣文懌為之首
以至俞彥嶼凡六十有四人皆不著其到罷年
月故無得而稽焉紹興二年施堽寔來迄于今
歲月井井觀其題名則其賢否可得而知也

太平興國三年
錢氏納土

蔣文懌

朝奉郎試大理司直行常
熟縣令兼監察御史太平
興國四年止七年見龍母
墳堂記

遷白龍歸頂山寺

崔彤

李璨

夏侯延祐

朝散大夫行上柱國淳
化四年見仁王院帖

裴署

承奉郎守大理評事知縣
事監酒稅茶鹽至道二年
見重修仁王禪院記修延
福院記作守光祿寺丞

王世昌

秘書省校書郎

盧永

李獻誠

張川和

太子中舍

許駢

衛尉寺丞

張士廉

承奉郎守秘書省著作佐
郎太中祥符三年見龍堂
碑陰文 懷州人左史攀
五世伯祖

韓宗幹

張舜

韓常

吳繼宗

胡順之 著作佐郎天禧中見寶嚴寺記

李文盛 國子博士

胡晏 太常博士知縣事兵馬監押天聖三年見淨慧院帖

朝奉郎屯田員外郎知縣事兼兵馬都監騎都尉天

聖四年見乾元宮紫微殿記又五年見破山梁僧道

戒記


楊寵 大理寺丞

張霖 太常博士

李衡 太子中舍

何知至 屯田員外郎

楊文敏 太子中允 胡宿有送行詩



陳漸 殿中丞

梁佐 贊善大夫

張士程 殿中丞

晁宗恪 贊善大夫

范琪 朝散大夫行太常博士知縣事兼兵馬都監管縣界

塘岸公事騎都尉慶曆六年見寶嚴院佛殿記

馬取 國子博士

江中孚 殿中丞

桑澥 宣德郎守尚書都官員外郎知縣事兼兵馬都監管

勾塘岸公事騎都尉至和初見乾元宮修造記又嘉

祐三年見勝法寺新十方記

張貴和 駕部員外郎

成偉 衛尉寺丞

孟著 殿中丞 光祿寺丞 知縣 兼兵馬監押 嘉祐七年見 淨慈寺帖

向宗旦

宣奉郎 守太常博士 知縣 事兼兵馬都監 及管河塘 溝洫 公事 治平二年見 順民倉記 又治平三年見 瑞石庵記 作守祕書丞

建順民倉

陳知白

朝奉郎 駕部員外郎 見 王琪送圓照歸瑞石詩碑

饒珙

祕書丞

李執柔

大理寺丞

李佑賢

太子中舍

王子韶

太常丞

趙君章

寧海軍節度推官

崔貽孫

太子中舍

劉拯

將仕郎 守祕書省著作佐 郎 元豐二年見 頂山登路 記 作宣德郎 淨慧院元 豐六年狀 稱知縣 宣德 奉議郎

宋順國

奉議郎

王植

通直郎 元祐二年見 明因 寺改禪寺記

林會

通直郎 元祐五年見 破山 重刊二詩碑

項瞻


承議郎

吳勉

奉議郎

朱之劭

承議郎



徐齊 承議郎

胡庶 宣德郎

柳恣 宣德郎

趙岷 承議郎 崇寧丙戌至大觀改元見跋趙清獻公詩

傅裔 承議郎 知縣兼管學事勸農公事兵馬都監及管縣

馮躬亮 承議郎 界河塘溝洫事武騎尉大觀三年見頂山龍祠記

黃昌衡 衡前志作行 宣德郎政和四年見壽聖院及永慶寺結界記

朱彥求 奉議郎政和五年見新建宣惠侯廟記

李光 宣教郎政和七年見東嶽行祠記又政和戊戌見勝

法寺詩刻及智林寺題壁上虞人官至參知政事謚莊簡

宋晦 通直郎

吳祖仁 奉議郎

高大中 朝奉郎

石集 承議郎

建炎以後

淳熙八年令陳映續題名記略云映不倭來年所始閱次中興以來為令者至映人名氏授受月而日之鏡石壁端以告來者


高宗即位于南京 李闓之 右朝請郎前制止稱建炎間每縣添置武尉一

二年

丁未



三年	車駕初幸杭州領	韓世忠自海道張	兵從縣赴郡會張	浚勤王之師李閻羅	兀术犯吳李閻羅	屯兵于縣	紹興元年	二年	施堦	右通直郎知縣	主管勸農公事	兼兵馬都監	六月至四年四月
三年	俞彥嶼	左朝奉郎	歲月莫改仍	前志列于李	豐之次			三年	高				
四年	罷武尉							四年	陳適	右通直郎			七月至五年八月
五年	夏元亨	右奉議郎						五年	祝邦翰	右奉議郎			九月至七年
六年								六年					



七年								七年	上官世美	右宣教郎			四月至十年
八年								八年					一年四月
九年								九年					
十年								十年					
十一年	詔李椿年行經界							十一年	劉寬	右承議郎			四月至十三年
十二年								十二年					三月
十三年	諸縣令佐簿尉復							十三年	許聿	右宣教郎			六月至十五年

十四年

十五年

十六年

十七年

十八年

十九年

二十年

二十一年

孔瓚


右通直郎
四月至十七年
八月

王筠

右承議郎
十一月至二十
年十一月

曾慎

右通直郎
十二月至二十
二年八月



二十二年

二十三年

二十四年

二十五年

二十六年

二十七年

二十八年

二十九年

三十年

任古

右朝散郎
十二月至二十
五年十月

修社壇

柴叔仁

右奉議郎
正月至二十
七年正月

王子渭

右通直郎
五月至三十
年六月

莊班

右通直郎
六月至三十
一年

子甲

三年
四年
五年
六年
七年
八年
九年
淳熙元年

始分定海水軍屯于許浦

王宗巳

奉議郎
十二月至淳熙元年六月

院
差監登聞鼓

趙善括

左奉議郎
六月到任七年八月以賑

有勞特轉
一官十一月
差通判平江府

劉頴

承議郎
七月到任二年

酉乙

未癸

三十二年
三十一
二年
乾道元年
二年

沈功永

左宣義郎
七月止十二月

慎知柔

左通直郎
十二月至三年

鮑格非

左從事郎
三月至二年

唐光謙

左奉議郎
九月至乾道二年二月

孫份

左宣教郎
五月至三年九月



二年

三年

四年

五年

六年

七年

八年

以水利有勞特
轉一官至三年
七月

令佐簿尉主管學
事不入銜

陸瀛通直郎
七月至五年九月

何濛奉議郎
九月至七年五月

林京通直郎
九月至十月

陳映通直郎
十二月至八年
九月

九年

十年

十一年

十二年

十三年

十四年

十五年

十六年


曾榮宣教郎
五月至十一年
十月

晁子温通直郎
四月至十四
年四月

修學
重建跨塘橋
重建縣衙寢堂

陸相通直郎
八月至十五年
七月

周復承直郎
四月至紹熙元



戊庚

卯乙

紹熙元年

二年

三年

四年

五年

慶元元年

二年

三年

四年

年正月

程準宣教郎以文名
四月至二年四月

姚僎宣教郎
十月至三年四月

葉知幾儒林郎辟差
三月至慶元
二年四月

二年四月

孫應時通直郎以文行
名四月至五年六月

創言子祠于學

有惠愛既滿太守
挾私憾以倉粟累
欠三千斛見問士
民感德擔負願代
輸不聽竟坐貶秩
罷至今人思之



酉辛

丑乙

六年

嘉泰元年

二年

三年

四年

開禧元年

二年

三年

五年

縣重建城隍廟

朱燾通直郎
六月至八月

邵公翰通直郎
十月至六年
八月

何充宣教郎
八月至三年正月

婁孝則宣教郎
五月
四年十月

王良臣宣教郎
正月至十月

何叔忱宣教郎
二月至十二月

葉凱宣教郎辟差
二月到任嘉定

重建縣廳申請許浦軍
糧就倉支給創望湖亭

修學

辰戊

六年 五年 四年 三年 二年 元年 嘉定

二年四月以平
反冤獄得旨
任滿與陞擢直
遣在任轉通直
替郎三年三月

修社壇

徐次鐸宣教郎
以文名
二月

月到任
離任
年

趙師耀宣教郎
八月到任
七月

年十二月差
通判廬州

申請三鎮稅錢
自行納郡
刊琴川志

七年

錢厚宣教郎
十二月到任
以文名

離任
八年三月避親

趙崇志奉議郎
八月到任
至

滿替
十一年九月

九年

添置嘉定縣

十年

張珽九月以宣教郎
到任十三年
轉

通直郎七月特
差僉書寧海軍
節度判官廳公
事

十二年

十三年



十四年

沈璞

正月以承奉郎到任八月轉承事郎十五年轉宣義郎十六年十月離任

十五年

陳仲埴

三月以宣教郎到任七月

准知紹興府餘姚縣

十六年

十七年

惠疇

七月以奉議郎到任登極恩轉

承議郎磨勘轉朝奉郎賞典轉朝散郎寶慶二年七月滿替

乙酉

寶慶元年

趙師季

八月以通直郎到任紹定三年八月滿替

三年

史彌厚

八月以奉議郎到任六年八月滿替

二年

三年


四年

五年

六年

章巽亨

通直郎到任六月



午甲

元端
年平

王燭

八月以奉議郎
到任嘉熙元年

以職事修舉轉
一官當年除提

轄左藏庫制云
扈農古官也句

龍棄之任漢以
後猶以大儒鄭

康成輩為之又
其後專用文俗

吏古意微矣爾
立身秉端靖之

操歷官著廉直
之名出總賦與

張弓之勢稍弛
入贊廟謨改弦

之化有助擢之
卿列仍兼宰旅

大積貯天下之
命出納有司之

事爾方令耗蠹
吾之財者非



二年
三年

戴衍

十月以奉議郎
到任三年除提
轄左藏庫

重建縣學教育言氏子孫
復修經界結立義役
修社壇創義阡
建道愛堂建琴川館

兵與吏乎汰冗
去濫是非有司
之所得為汝其
與吾大臣議所
以變通之策以
副朕用儒者治
金穀之意可

二年
三年
四年

趙師簡

三月以通直
郎到任淳祐

丑辛

淳祐元年	二年	三年	四年	五年	六年	七年
三年三月滿替	張從龍 郎到任以宣教 八月離任	劉桀 郎十二月以宣教 年正月離任				趙與翊 郎三月以奉議 留任淳祐八年



八年	九年	十年	十一年	十二年
別楠 安府都廂 年四月除臨 至任以通直郎 六月至淳祐十年 年提領所幹辦公 事	石森 到任以宣教郎 九月至十二年 正月離任			鮑廉 到任以宣教郎 四月至寶祐元 年正月轉通直 郎至寶祐二年 江朔置使司幹 辦公事

寶祐元年

二年

三年

四年

五年

六年

程在孫

二月到任以宣教

講行鄉飲

轉通直郎至寶祐四年五月以憂去官

王文雍

五月到任至寶祐六年六月

重修縣樓置刻漏重修頌春手詔

省除提領戶部摛賞所

主管文字

興復縣務創兩務宣廳重浚縣前河

浚福山塘砌承流門并慧日寺前街建寶祐新隄

修秋報明板籍

丞一頁

宋

熙寧四年中書劄子諸縣主戶三萬以上難治乞置丞一員於是諸縣始有丞崇寧中或改主簿充丞大觀四年令兩浙相度不係繁難縣丞並罷政和二年復置建炎元年詔如係嘉祐以前負闕及萬戶縣方許置丞餘並罷紹興初縣及萬戶並注丞

王

朝散郎元豐二年見頂山梵路記

陸韶

文林郎主管學事大觀三年見頂山龍祠記

魯詹

文林郎主管學事政和五年見宣惠侯廟記

林友

文林郎

劉敦

修職郎

周冲

陳宗盤

紹興八年以月以通直郎至

陳份

紹興十年三月以朝奉郎賜緋至

朱旗

紹興十二年四月以承議郎賜緋

王大隱

紹興十四年七月以承事郎至

胡履泰

紹興十六年八月以宣義郎至

李孝純

紹興十八年六月以宣義郎至

蘇楷

紹興二十年十一月以通直郎至

俞民康

紹興二十二年十二月以奉議郎

黃伯達

紹興二十四年十二月以宣義郎

江續之

紹興二十七年二月以承議郎至

黃誘

紹興二十九年四月以通直郎至

鄭穆

紹興三十一年四月以朝奉郎賜緋至

胡伯廉

隆興元年六月以承議郎賜緋至

宗嗣尹

乾道元年八月以通直郎

趙伯信

乾道三年十一月以奉議郎至

秦焯

乾道六年三月以承議郎

黃夏

乾道八年四月以宣義郎至

張孝伯

淳熙元年七月以文林郎至

施遲

淳熙四年七月以宣義郎至

木師顯

淳熙七年十二月以宣義郎至

沈梓

淳熙十一年二月以宣義郎至

康丕祖

淳熙十三年六月以承奉郎至



淳熙十五年十月以從政郎至

傅巖 紹熙二年四月以承直郎至

趙公傅 紹熙四年十月以承事郎至

趙善勣 紹熙五年十一月以承議郎至

傅良 慶元元年三月以儒林郎至

姚汝龍 慶元三年四月以從事郎至


丘壽邁 慶元五年六月以宣義郎至

趙端 嘉泰元年八月以宣義郎至

張漑 開禧元年閏八月以承直郎至

趙善箎 嘉定元年十月以承奉郎至

詹彭祖 嘉定二年四月以宣義郎至



廖觀 嘉定四年四月以承務郎至

趙必愿 嘉定五年二月以承務郎至

蔡駿 嘉定七年八月以從政郎至

蕭好古 嘉定十年八月以承務郎至

趙時份 嘉定十二年十月以承奉郎至

劉南 嘉定十四年十月以承直郎至

趙希翺 嘉定十七年十二月以宣義郎至

陳收 寶慶 年 月以修職郎至

汝溥 紹定二年三月以承務郎至

孫沂 紹定四年三月以承直郎至

魯端 平元年四月以承直郎至

克

嘉熙元年十月以儒林郎至

賈喚

嘉熙四年閏十二月以承務郎至

錢宜之

淳祐三年三月以儒林郎至

孫由義

淳祐五年四月以承務郎至

錢學祖


淳祐七年六月以從事郎至

示一

蘇速

寶祐元年七月以迪功郎至

郭端朝



主簿一員

唐

開寶元年詔緒縣千戶以上依舊置丞簿尉三員紹興十六年臣寮奏勅業之人物稀少其將東南縣小而事簡者簿尉員而尉兼之其後縣滿萬戶置丞而簿尉員異劉子萬戶以此下縣分已不差丞却多有主簿兼尉者乞應如此去處並特專置主簿一員從之

蕭存

按蕭存字伯誠穎士之子亮直有父風能文辭浙西觀察使李栖筠表為常熟主簿見唐史蕭穎士傳

宋

李

大中祥符元年見淨慧院改賜院額帖

程冕

守主簿淳化四年見修仁王院記

劉元同

將仕郎試書省校書郎至道二年見修仁王院記

錢振

登仕郎天聖三年見淨慧院帖

李居正

將仕郎天聖五年見軋元宮陰符

夏侯詢

將仕郎慶曆六年見寶嚴寺佛殿

余卞

將仕郎嘉祐三年見勝法寺新十方記嘉祐七年見

廖鼎臣

登仕郎熙寧元年見順民倉記又治平丙午見瑞石庵記兼河塘溝洫

許異

將仕郎守主簿兼管河塘溝洫

徐布

石 元豐五年見破山八詠碑

張叔達

明因新改禪院記 兼河塘溝洫元祐二年見

鄭僖

將仕郎大觀三年見頂山龍殿記

陳廩

登仕郎政和五年見宣惠侯廟記

趙子淙

右迪功郎紹興三年見重修嶽廟

趙憲

右從事郎紹興六年見嶽廟石座

王

右從事郎紹興十五年見慧日寺

趙彥清

度僧公據 隆興癸未見龍祠呂真文

淳熙八年以後

蕭達

淳熙八年八月以迪功郎至

趙汝伋

淳熙十一年十月以修職郎至

施季熊

淳熙十四年十二月以修職郎至

黃直史


紹熙二年四月以修職郎至

張拭

紹熙五年六月以修職郎至

趙彥候

慶元三年七月以迪功郎至



趙師曩 慶元六年八月以迪功郎

鮑端亨 嘉泰四年正月以迪功郎至

盧子及 開禧二年十月以迪功郎至

曹仲珪 嘉定二年十二月以承直郎至

陳逢堯 嘉定六年正月以迪功郎至

張正已 嘉定六年十一月以承直郎至

李昌祖 嘉定七年十一月以文林郎至

趙汝成 嘉定八年十二月以修職郎至

王澤 嘉定十二年二月以修職郎至

臧忠輔 嘉定十三年七月以承直郎至

趙孟孫 嘉定十六年十月以從事郎至



李興宗 寶慶元年七月以修職郎至

趙希弘 紹定元年十月

洪 紹定四年十月

趙善從 端平元年十月

張必達 嘉熙二年二月

趙汝咄 嘉熙四年十一月

趙時喆 淳祐四年十一月以修職郎至

唐世忠 淳祐七年十二月以迪功郎至

游杞 淳祐九年十一月

舒斗祥 淳祐十二年七月

俞文炳 寶祐三年十月以迪功郎至



尉一頁

建隆三年十二月詔盜賊鬪訟項因兵革遂委
鎮貞今後仍舊屬縣委令尉管當其鎮都虞候
只許管當鎮郭下煙火盜賊事每縣置尉一員
因以縣戶口數定弓手額有差建炎元年詔兩
浙路依河北例招到弓手樞密院乞各添差武
人縣尉一員本縣指使一員招到弓手以五百
人為額縣兼領仍置將領部將紹興四年罷今
尉銜內帶巡捉私茶鹽礬兼催綱

唐

張旭

初仕為常熟尉有老人陳牒求判宿昔又來怒
其煩老人曰觀公筆迹奇妙欲以藏家耳因問
所藏畫出其父書視之天下奇筆也自是盡其
法見唐史李白傳
見歐陽詹送之序

宋

李順之

文林郎至道二年見修延福禪院
記及修仁主院記

古風
胡貶

守縣尉天聖三年見淨慧院帖
文林郎天聖四年見乾元宮紫微
殿記

宋盛

登仕郎慶曆四年見寶嚴寺佛殿
記

楊惟善

將仕郎嘉祐三年見勝法寺新十
方記 守縣尉嘉祐七年見淨慧
院帖

丁惟一

將仕郎兼河塘溝洫治平丙午見
瑞石庵記

陳于

文林郎試秘書省校書郎
守縣尉兼管河塘溝洫元豐二年
見頂山贊路記

葉之漸石

元豐五年見破山八詠碑

洪彥昇

明因寺新改禪寺記 元祐三年見
兼河塘溝洫

嚴挺民

將仕郎主管學事大觀三年見頂
山白龍祠記

吳驥

將仕郎政和五年見宣惠侯廟記

強公邵

右迪功郎紹興三年見重修福山
岳廟記

王敏

修武郎添差紹興三年見重修福
山岳廟記

趙子溥

右迪功郎紹興六年見福山石座
記

紹興二十九年以後

卓元龜

紹興二十九年十一月以修職郎

李緘

隆興元年二月以從政郎至

劉永平

隆興元年五月以從政郎至

趙善熙

乾道二年十月以迪功郎至

李楠

乾道三年十一月以迪功郎至

葉疑

乾道六年十二月以迪功郎至

章昭祖 淳熙元年二月以從政郎至

李開 淳熙四年四月以迪功郎至

程達 淳熙七年四月以迪功郎至

李擴 淳熙九年十月以迪功郎至

米巨源 淳熙十三年二月以迪功郎至

章賡 紹熙元年二月以修職郎至

趙笈夫 紹熙四年四月以迪功郎至

曾達 慶元三年六月以迪功郎至

劉祖邁 慶元六年六月以從事郎至

莫燾 嘉泰元年八月以迪功郎至

李相 嘉泰二年八月以迪功郎至



薛宦 開禧元年七月以迪功郎至

黃應酉 嘉定元年八月以迪功郎至

鄒益 嘉定四年九月以迪功郎至

趙希燿 嘉定七年十一月以修職郎至

監務二員

慶曆以來並以茶鹽酒稅署今但酒稅
年求權職者因緣本府差為提督近

監官

監官二員



重修琴川志卷第四

叙山

龜蒙巖巖魯邦所瞻地必有山以為之鎮焉常熟潮汐之壩雖無層巒疊嶂可與岱嵩王屋等然虞山自虞仲而得稱標揭圖乘舊矣此外雖小大不倫亦皆為一方之表識况夫名賢逸士選奇而遊憩高僧羽人擇地而棲止勝槩具存蓋不可以沒其實也故作叙山

山

虞山在縣西北一里一名海隅山高一百六十丈周回四十六里六十步山海經注云吳之烏目山也陸澄吳地記云本吳之虞鄉孫權置虞農都尉於晉太康三季改為海嶠

縣以其東臨滄海故也越絕書云虞山巫咸所居此舊志
所紀也山雖無峯巒而蜿蜒起伏略如卧龍隨處望之形
勢各異山之顛堆堦磊塊累然如蓬顆似皆人力爲之
或疑古人葬處其中大抵壘石爲榔巨石覆之自邑市入
虞山門卽登山半里至半山亭躡山脊而上至乾元宮前
有極目亭下瞰萬家平挹兩湖南望姑蘓諸山北見大江
最爲絕勝又西北行山脊四望盆空迴過普照寺廢址至
維摩庵林木茂密可愛稍北下山腰有石屋可坐十許人
相傳太公避紂于此其旁流水平布石上激可愛有顯
親禪院覺海菴菴傍有石洞天將雨輒出雲氣又西北行
山脊有拂水巖下臨山阿崖壁峭立水落兩石間微風激

之濺灑霏故名山南北址皆臨大道南道出秋報門循
山而西致道觀嶽祠皆瞰山之麓又過吳王廟五六里而
有張氏光祿亭亭前有大杏一本花特茂異父老相傳幾
二百年俗謂之杏花亭有宗丞富元衡篆額甚奇古張君
柎嘗爲三衢守花時邑人遊賞不絕今杏已不存亭亦改
爲佛舍矣又其西曰谷林參議虞似平之圃有亭曰退耕
曰翠微其名虞似良仲房所隸書參議亦善隸且能詩今
爲富民所有山巔有巨石石中分爲兩望之如劍痕俗傳
吳王試劍石今馬帥周虎墓在其下墓前有亭臨流曰劍
溪又西北至寶嚴寺山之南境盡矣其北道出宣化門循
山而北過報慈寺六里西北入破山興福寺寺多古跡臨

龍鬪澗山腰有光明菴再出西北行十二里入頂山寺登
白龍祠跨小嶺至上方院高崖曲澗林木蒼鬱俗謂之小
靈隱轉而下有中峰瑞石菴又有水簾之勝在焉是為山
之北境此其大略也若夫山之為名括地志則曰海禺吳
郡志則曰海虞續志則曰海巫祥符圖經則曰海禺為名
不一至於虞山之得名見隋志慶元志引圖記謂本吳之
虞鄉孫權置虞農都尉於是山因以為名然吳越春秋載
吳太子娶齊女病而死曰必葬我虞山之巔以望齊國越
絕書又曰虞山巫咸所居則虞山之名吳越時已有之矣
竊詳此山恐因虞仲而得名按史記虞仲即仲雍奔吳而
葬此山之上或者因以名其山史有兩虞仲一字仲雍為

吳始祖一周章之弟仲始封於虞亦曰虞仲周章都安邑
稱曰虞城則仲雍所居稱曰虞山理或有之更俟博議者
訂焉

按朱長文志海嵎山在常熟有二洞穴穴側有石壇周六
十丈山東二里有石室吳仲雍周章闔閭長子竝葬此山山
西北三里有越王勾踐廟梁昭明太子作招真治碑云虞山
巫咸之所出也高巖鬱起帶青雲而作峰瀑水懸流雜天河
而俱會又云其峰有石城石門即此山也石屋意即所謂石
室而二洞不見其一石壇及諸墓亦不知孰是
破山亦虞山之別山因白龍鬪衝山而去故曰破山
頂山去縣十八里乃虞山之別山未至山有齊女峰高二十

丈周八十步亦頂山一峰相傳齊景公女葬於此

龍母峰在縣西北十八里即頂山之一峰龍祠在焉

烏目山慶元志引山海經曰虞山即烏目山按吳地志海虞

山北有烏目山今頂山之南有烏目山界於山有烏目澗

景祐間陸果題烏目山詩是也元豐三年邑尉陳于記云

瀕海之隅也又名虞山以昔人虞治于此也山北行九里

西為破山以鬪龍衝破山為澗又北行九里為頂山又北行

小山在縣西北二十里高十七丈周四里一百步

福山在縣北四十里高九十五丈周五里本名覆釜山其形

似也唐天寶六載改為金鳳山梁乾化三年又改今名東

嶽行祠在山之麓

小竹山在縣北四十一里高五十丈周三百步

崇德山在縣北三十八里高六十五丈周七里三十步舊經

云晉處士夏統宣城太守邴臻所居

常熟山在縣北三十七里高一百五丈周七里本名銅官山

唐天寶六載改今名

永安山在縣北三十六里二百步高七十四丈周圍二百四

步舊經云梁范冀之昆弟同居此山又云即下范山也

范山在縣北三十六里二百步高七十四丈周二里四步舊

經云梁范冀之昆弟同居此山因以為名

河陽山一名鳳皇山一名小山在縣西北四十五里高一百

二十丈周七里舊志云出山藥詳見鳳皇山永慶寺所載



志山在縣西五十里高九十丈周四里一百步與河陽山相對近歲村民鑿池得唐時墓中斷碑上云葬於鷲山之下然則當為鷲今碑在富民樊氏家

穿山在縣東南一百四十五里高一十七丈周二百五十步山有石洞前後通徹可以往來故名

苑山在縣西南五十里一百步高四十丈周五里

靈龜山在縣西北五十里高一百七十丈周二十一里東南屬常熟西南無錫界西北江陰界俗呼為三界山亦曰顧

山又曰香山

烏丘山在縣東南二十七里近崑承湖三里

重修琴川志卷第四

正月入役月餘可畢又言平江四縣舊有開江兵二千人今乞止於常熟崑山各招填百人得旨從之遂出御前激賞庫錢平江府上供米如其所請之數於是即日興工焉竊攷任察院所奏最為知利害者蓋此邑有五浦皆注于江東則白茆浦東北則許浦正北則福山浦西北則黃泗浦及奚浦五浦常濬則潦無漲溢之虞旱獲灌溉之利所關不小耆老猶記海舶常至邑郭故邑有通江橋而許浦過梅里鎮潮汐迅急鎮橋之下往壞舟至開月河以殺水怒而紹興丁卯康舉之作招真記云邑去江不及程陂湖畎澮之積自南至者傾入于江江潮既應則迅瀾倒流逆于市橋之二水相制移時不能去可想矣自紹興丁卯至今九十七年涇浦淤塞至

或委曲僅一線之水既無復開導而陂湖又多包圍成田故水則下流不能遽泄遂決溢以成淹浸或告旱而上流去水愈遠易成乾涸浙西提舉徐誼所謂昔之中田今為上田昔之下田今為中田昔之草蕩今為下田是也極於寶慶之水嘉熙之旱無所指手大為邑民之病然則任斯邑之寄者水利源委蓋不可不熟講也按熙寧三年崑山郊曹獻水利策備述源委尔有可采者又多不盡錄大畧則見之吳郡志中揚子大江在縣東迤而北與通州對岸自福山江口至縣三十六里

尚湖

尚湖在西南去邑四里長十有五里廣九里舊經曰上湖今

重修琴川志卷第五

叙水

襟江帶湖昔人以侈洪都之雄也常熟亦髣髴馬大江枕其北諸湖貫其中而東海渺瀰且復近環吾境之外則夫水利便宜江防條畫所當精講而預謀也故作叙水

江防

大江在縣之北與通州對境自福山之江口至縣三十六里福山居長江下流險莫甚焉然自古國於東南者類置而不問吳孫權時西陵舉火達吳郡南沙晉趙石堪遣兵寇南沙海虞雖此備彼寇皆由江道然未嘗專以福山為慮也吳志載庚

南關揚都賦注曰孫權時合暮舉火西陵鼓三竟達吳郡南沙

南沙海虞得錢鏐有國始於福山置戍以防南唐之寇宋初獲五千餘人混一戍皆省罷建炎初嘗分江陰水軍戍福山議者謂虜騎入通州勢如牛角尖退有腹背受敵之患故其戍不常置紹興中呂祉乃請於福山置戰艦其言曰大江之險所當固守守江之策有三節焉大江之南則宜列戍兵多備舟楫以俟濟師錢鏐之備浙西則於福山江陰控扼尤緊今誠倣此令鎮江江陰福山泇流各具戰艦又於江之中嘗置重兵此備真揚通泰之渡江策也又請於福山嚴把隘其言曰水軍見屯興化縣所謂虜寇頗聞具舟甚又一旦為官軍迫逐計無所出必走通泰泰與江陰對岸通與平江崑山福山對岸兩處泇江各有岸步可渡人馬欲望詔御營使司量遣兵將前

去江陰福山等處把隘委自兩州守臣措置候賊平即抽兵歸行在未幾虜兵退竟不施行淳壬寅虜犯通州議臣復有福山把隘之請時遣御前軍八百戍福山閱月而撤戍淳祐庚戌朝旨乃置兵三百人號忠節建寨於福山亦甚當矣但今許浦既宿重兵則控扼福山之議似不必講不若合忠節軍於許浦却從許浦分戍于此庶事權一為可運掉也

海道

晉劉澄浮海入寇害南沙尉覲志諒則海道之防吾邑尤所急也許浦去海為近東出海門料角之間勢與膠西相直實今日要害之地紹興辛巳淮浙東西路通泰海州泇海制置使李寶嘗任招討之責領軍駐許浦從大洋進山東遂奏膠西

之捷乾道中用馮湛計始分定海水軍爲許浦置屯時許浦深闊可藏戰艦比年以來頗覺淤塞外沙渾隆起潮雖盛大艦裝雖重不能出海道有變應接非便於是乃有分屯寨兵更戍顧逕之議至寶慶間增爲二千五百人升爲左軍轄以統制易更戍爲就屯許浦既宿重兵而又得顧逕爲之掎角兩屯相望雄于江浙所以爲備禦計者始益詳盡矣

水利

常熟爲邑北枕大江諸湖交貫其中實澤國也有陂塘以蓄灌溉有泖澱以泄深漲故無旱乾水溢而得常熟之名然潮沙易積浦渚多壅每賴疏濬浚導之功錢氏有國時創開江營置都水使者以主水事募卒爲都號曰撩淺宋朝因之有

卒千人爲兩指揮第一在常熟第二在崑山專職修濬自郡民朱勛進花石綱盡奪營卒以往於是開江營遂空而修濬之事廢矣按紹興中大理寺丞環周言平江低田多爲水浸蓋諸浦淤塞望令有司於農隙開決俾北流通徹實無窮之利乃詔兩浙漕臣措置而轉運副使趙子瀟知平江府蔣粲言太湖者數州之巨浸而獨泄於松江之一川宜其勢有所不逮是以昔人於常熟之北開二十四浦疏而導之於揚子江又於崑山之東開十二浦分而納之於海其浦後皆爲潮汐沙積而開江之卒亦廢於是民田有淹漫之憂天聖間漕臣張綸嘗至常熟崑山各開衆浦天聖中吳中水災命發運使張綸同守臣於崑山常熟浦各開衆浦景祐間范文正公亦開浚五河親至海浦守正公鄉郡

值歲歉謂松江不能盡泄震澤之水當疏導諸邑河渠東南入吳松江東北入揚子江其後親至其地開浚五河疏導積

其賜受政和間提舉官趙霖又開三十餘浦此皆見於已行者也

政和開提舉趙霖言常熟二十四浦除許浦白茆浦福山浦深閘不須開治外有黃泗浦奚浦東西二陳浦水

門塘浦陸河浦北浦甘草浦千步溼浦司馬溼浦錢溼浦黃

鶯漕也宣和元年正月霖修築常熟塘岸隨岸開塘又開修

崔浦自陳家莊至堆浦塘口出梅里塘長二十三里有畸黃

泗浦連小山浦至湖長七十里有畸又築常熟塘岸長六

十里有畸界岸長四千七百三十一丈十月復應詔措置可

為田處修築錢溼口至藕蕩村大岸張墓塘北至小山浦山

塘溼自小山浦口至本縣市河顏家溼徹入小山浦至是年

八月內今諸浦堙塞又非前比總計用工三百三十餘萬錢

三十三萬餘貫米一十萬餘石緣平江積水已兩月未退望

速行之乃詔監察御史任古本路提刑徐康覆視古至言常

熟五浦通江委是快便若依子瀟所請以五千人為率來歲

昆承湖在東南去邑五里廣長各十八里舊傳有蜃舟人夜

行或見之屹如巨岸目光閃爍梅潦降呼吸雲霧騰駕風

濤泔湖之田莽為巨漫田家患之一日有客舟適崑山遇

白衣婦人附舟去抵岸忽不見自此湖中無患意即是物

也舊經不載按朱長文志唯曰崑湖別有陽城湖與上湖

相對俗謂之八字湖

馬涇湖在崑承湖東南接崑山境去邑四十里廣長各五里

父老相傳云舊有就水草牧馬者一夕羣馬驚鳴逸入于

水故鳴馬驚今字之訛耳

涇
小娘子涇在縣治之前循縣治而西折而北又西過慧日寺



又北沁虞山之趾貫絡邑中古以疏泄山水之暴自兵火後民居侵塞由慧日寺以西僅存一溝自其東過縣而屬于運塘亦皆為浮棚不復通舟故霖潦波市而旱燥無以備火邑民病之嘉定元年三月令葉凱謂涇之循縣而西者皆居民覆屋其上涇塞歲久開浚必動眾未易輕議至若貫縣橋而東者一河橫亘闕闡疏而導之不獨舟得徑抵井邑且可備鬱攸之灾遂捐公贏募役夫浚治不日通流東徹運渠西南水湊航船步公私便之或曰本小洋子涇訛為娘字耳

山塘涇在虞山西南小山港在山西北政和間父老請于朝開此二涇以泄山水之暴故田者得免冒没

塘

常熟塘自齊門北至常熟百餘里朱長文志云唐元和中所開古碣僅存其郡守氏李不著名廉使氏韓元和三年韓臯為浙西觀察使疑即臯也緣塘皆有涇浦入于北江蓋醜其渠以洩水則有涇引其流以至江則有浦涇者如黃浦而湖之水皆類以泄焉

鹽鐵塘亦名內河其口始自黃窰繚繞數百里南接崑山西連江陰不知何代所開所以泄吳松江之水也今不許其處郊亶稱縣西北六十里有塘唐文宗太和中再開疑此即是

梅里塘東接許浦西接運河郊宣謂開之使水北入揚子江

宣和間趙霖開

見前水利注

福山塘政和間趙霖奏自松江下北繞崑山常熟皆五里有縱浦在常熟塘則為福山東橫塘福山西橫塘

重修琴川志卷第五

縣在丹李不晉子蘇對九韓元味三平韓

重修琴川志卷第六

叙賦

縣令平賦課上郡國漢制也晉縣屬有金倉掾隋縣屬有金都曹皆主縣賦至唐以催科為上最而縣賦始重迄今大略如之然有土此有財土者財之所從出而田為本故禹貢叙九州之土之田之賦次第言之者以此常熟以富裕名蓋田多而賦衍也自經界不正賦入日狹而縣不可支經界正矣賦入無所虧矣而縣益不可支何哉拘苗有令取無子遺其端則有自矣縣之月解於是一切倚辦於征酤以救目前而愈久愈極將至於無可為計也可不詳論其故歟故作叙賦

自紹興李侍郎椿年行經界民無隱田田無詭戶而官民兩

利焉既閱百年厖亂紛如州縣之有志力者類欲釐而正之
未能盡如所欲也端平間令王爚慨然以身任其事甫及暮
年弓量竣訖於是版籍詳而賦役平矣然去今未久也而詭
狹竄易類多有之大抵為規避科役計違禁破約一切不暇
恤昔之告戒範防幾於蕩然而賦役之弊端寢如故也故今
土叙版賦之源委一以端平為據庶幾欲救弊而反本者尚於
此有攷焉

曹督版籍

總合平銀田

元管田二百三十二萬一千五百六十三畝三角六步半端
重平二年修復經界管田二百四十一萬九千八百九十二畝

三角一十步

民田共二百二十一萬九千九十二畝二角一十步

諸色官田共二十萬八百畝五十一步

常平田二萬四千三百一十五畝二角三十四步半

營田三萬七千三百八十三畝一十三步

沒官田三萬二千三百五十二畝三角三十四步半

圍田五萬四千一十六畝二角半步

養士學田五千八百八畝三角二十三步半內府學田
本縣學

田

荒田六千五百五畝二角三十步

職田三萬一千六百八十畝三角四十五步



塘塗田三百六十二畝二十四步

許浦水軍都統司寨基地九十七畝二十步

河陽坊酒庫田一畝一角四十步

積水茭蕩田三千二百一十六畝一角五十步

沙田四千九百六十四畝一十五步半

撥賜萬壽寺田九十五畝三角五步

地

元管地計一十四萬八千六百六十畝三角三步半端平二

年修復經界管地計二十萬八千三十八畝二角五十五步

民地共一十九萬一千五百九十九畝三角一十九步

諸色官地共一萬六千四百三十八畝三角三十二步

常平地九百六十九畝二角一十五步

營地共二千九百五十二畝一角四十九步

沒官地三千五百九十八畝三角五十六步

養士學地一百一十五畝一十一步

荒地二千四百五十一畝三十步

職地五百八十二畝三步半

塘塗地四百五十七畝二角二步

許浦水軍都統司寨基及鎮寨基地共三千七百四十

二畝三角三十七步

坊場基地八十八畝二角二十八步半

沙柴場地一千二百六十一畝一角二十步

焚化院地二十畝二角五十步

廟基地二百一畝一角一十四步

戶口

建隆元年勅應天下縣據見管主戶重陞降地望取四千戶以上為望三千戶以上為緊二千戶以上一千戶以下為中下又開寶六年勅五百戶以下為下縣自今後三年一度取諸道州縣見管戶

主戶

客戶

主丁

客丁

僧

道

尼

稅

國初盡削錢氏白配之目遣右補闕王永高象先各乘遞馬

均定稅數只作中下兩等中田一畝夏稅錢四文四分秋米八升下田一畝錢三文三分米七升四合取於民者不過如此自熙豐更法崇觀多事靖炎軍興隨時增益不可勝算至今日而極矣亦合稍思所以為民計乎

元管夏稅絹和買絹紬綿折帛錢一十萬二千三百三十

一貫三百四十四文

除紹興經界重誤多椿事故七千四百八十二貫三百三文

實計稅錢九萬四千八百四十九貫四十一文

端平二年修復經界管夏稅絹和買絹紬綿折帛錢計一

十萬四百七十三貫三百三十七文二分

比祖額增夏稅絹等錢五

千六百二十三貫二百九十六文二分

苗

元管秋苗七萬四千一百二十石八斗七升除紹興經界重誤多椿事

故三千八百六十四百二斗三升

實計苗米七萬二百五十六石六斗四升

端平二年修復經界管秋苗七萬二千五百六十一石七

斗九升五合比租額增苗米二千三百五石一斗五升五合

此正賦也近年於正賦外以苗為率復科納和糴

蓋吳中和糴自嘉定置百萬倉始其初一惟坐倉招

來而歲莫不以辦足告其後寢有科抑之今極於紹

定又極於嘉熙而人戶緣此凋弊者十幾六七矣

淳祐宸旨特免科抑於是吳民始復有生意未幾乃

踵行之至于今則戶有定數價無其虧措畫頗亦甚

善然執為成例按為常行歲歲如之其間病弊固未
易以歷數也常熟歲糴多至三十萬石少亦不下十
四五萬石連年豐稔粗日辦事一有水旱其數愈多
其價不益一如嘉熙之時將若之何固切憂之然則
上之人所宜為培護本根計稍思所以變通之可也
常平義倉

按康定二年王琪奏置義倉後罷復增損不常至紹興六年
總制司申明大觀指揮每納正苗米一石帶納義倉米一斗
零納不上斗者不收義倉此所以備凶荒也若夫常平之制
祖宗朝蓋取沒官田所入專以濟給老疾貧之不能自存之
人今本縣則以常平義倉合而為一云

入今本役錢

版帳錢一年兩料共二萬九千八百三十四貫七百一十

零六文

本縣酒課

本縣酒課古例郡給糯米二千四百石就縣倉糯米關支又有縣倉斛面可以裨助故醞釀寬剩縣計賴以仰給焉自嘉熙元年郡取糯米歸府輸納歲自府倉支出前項本色付縣盪造而歲計所入始頓狹矣淳祐四年郡併取杭苗歸府却準給糯米價錢付縣自行收糴淳祐七年令趙與翊請于郡乞指留歲給糯米之數就縣送納而郡不能從續止蒙撥留

折苗一千二百六十三石一斗五升歸之縣於是本縣却令

入戶折納糯米以為酒本謂之折改粳然亦僅及舊例三分

之一外此則許於板帳內截留合解錢九百九十五貫八百

八文

錢糴以克糴麥造麴之用所謂酒本如斯而已而本府

及倅廳月解板帳為數則甚夥也往年解赴郡帑猶或可以

申展自淳祐七年徑以合解之數撥充許浦水軍券錢就縣

支給應副宣限分文不可拖欠頃刻不亦稽遲而旬解倅廳

水軍錢大率亦猶是也自二月至七月謂之大月分八月至

正月謂之小月分每月錢數雖有多寡之不同以成年計之

總計七十五萬三千餘緡往往鑿空取辦然亦不過資於酒

課耳歲計非得清煮酒七千餘石莫能應辦而官資俸給與

夫支遣饋遺不與焉加以柴灰工食等費州家所給既不足用不免典貸告糶於上戶以充醞造又借錢於州郡買酒於外坊轉摺變轉規取什一之贏以爲逐時支撐之計則亦甚艱窘矣將來築底其憂實多最是水軍打請之時設或措辦不周禍患立見上之人所宜計慮以遠務從寬恤使爲縣者略得以展布可也

拍店

常熟縣計今旣全仰於酒而酒課之盈虧徃徃在乎拍店之多寡訪之故老昔年官酒店凡四十餘所其間多儻大家富室房廊爲之續以官司負其儻金乃乘頽弊盡以折去今所存者樓六亭店十皆官物也拍酒之所旣少則發

酒之數甚微加以私酤交行憧憧難遏何望縣計之充盈耶鮑令君廉於是移撥官司空闲舊屋添創拍店七所庶以收拾遺利然類非衝要沽賣實稀而積累增收亦或以少裨助焉但此邑之吏每視官錢猶已物丘所以肆其侵欺者無所不至後之人亦惟精加考覈焉可也

醋息錢

舊有醋庫官造醋以取息比年以來撲賣於民每日納息不過十數千楮爲酒務雇夫之用外此又有醋錢責之寺觀庵宇輸納近年其籍散亡止據其見納者每月納千餘緡並歸版帳

商稅錢

初無定額日據赤曆所收以為版帳之助然大約日收不過
三四十千蓋常熟既非孔道近年又以淮路多梗商旅類出
於他郡而縣稅益寥落無怪也

上供

縣困於上供甚矣一歲版計至輸七十餘萬緡其間如許浦
水軍券錢一項最為關繫鮑令君廉日以乏興為慮戴星勤
瘁奉養燕遊一切痛節所得月俸圭祖類置而不問故每僅
僅能辦給良亦難矣昔陳待制謙奏疏謂郡縣征利推斧相
臨而縣為之底驅士大夫作縣如赴湯蹈火是蓋真知為縣
之難者使其視茲邑之煎熬又將如何哉然則有如鮑令君
之政亦上之人所宜獎異也

全年版帳通計九十二萬八千八百八貫八百四文

內縣庫合發錢七十五萬三千四百九十七貫五百九
十二文

內丞廳役錢一十七萬五千三百一十一貫二百一十
二文

許浦水軍券錢四十六萬五千二百一十貫九十二文
轉運主管司錢二十五萬一千九百四十五貫一百文
常平庫府役錢二萬八千八百八十九貫文
五六分錢四千九百九十八貫九百文
通判西廳減省雇人錢二千二百九十二貫文
提刑司頭子錢一百六十二貫五百文

縣錢庫

縣錢庫例置于廳事之兩旁此則請官收支之庫也若庫子交錢之所則有到廊庫焉本縣目今所收別無項目大都不過酒錢商稅錢而已舊來廊庫在鼓樓之側去廳差遠每日收到之錢漫不可稽續移就中門其相與為欺則猶故也鮑令君廉任內不免將縣廳東庫就令交收耳目為近或可攷察然書手與庫摺財賦司通同為一亦難盡察於關防之外要須令書手不得干與錢物庫摺不得干與帳目猶庶幾焉又如本縣其他財賦之合解上司者吏輩循習舊例往往收於其家發於其手弊倖難窮要未易革而亦不容於不革也

職田

提舉使廳九十石四升

茶鹽司提幹廳一百六石六斗六升

茶鹽添差提幹廳三百四石六斗

常平司提幹廳九十三石七斗二升

常平添差提幹廳一百七十石

轉運司宗室運幹廳四十石

知府使廳一百八十石九斗五升

僉判廳三十八石

添差節推廳六十石

察推廳七十一石五斗六升

司理廳五十石九斗一升

司法廳九十三石八斗九升

糧料廳三十石

監稅廳九十三石四斗

監比較務廳二十一石三斗一升

總管廳二百二十石

路鈐廳二百二十七石二斗六升

添差路鈐廳二百二十七石二斗六升

路分廳九石三斗六升

都監廳九十七石八斗

添差都監廳四十八石四斗



監押廳八石七斗二升

添差監押廳一百四十三石二斗二升

知縣六百八十五石九斗七升

縣丞四百五十五石八斗六升

主簿二百八十五石三斗七升

縣尉二百八十四石二斗二升

監酒一百七十九石八斗六升

監稅一百七十九石八斗六升

梅里監鎮一百二十石八斗

許浦監鎮一百二十石四升

福山監鎮八十五石三斗八升

慶安監鎮二十六石二斗九升

福山巡檢七十四石九斗四升

許浦巡檢一百二十三石八斗三升

白茆巡檢一百二十石

計五千二百八十九石三斗六升

職租并在府諸廳每年入納額管三十六百四十一石

五斗三升往歲並支本色又以苗輸縣倉所入豐裕於

合支數外每有增益焉自苗歸府縣計空乏既無增益

而餘米復不足以供但于支遣且淮浙發運所將上項職租

盡行回糴以充軍餉縣家仍有陪貼般運種種之費最

是縣吏為欺攬收入已臨時但以空身抵睚甚則竄逸

每歲一易其籍蓋有籍無其田而吏有其祖者今回糴
一項固未能免而弊之在吏者苟精加考覈無墮其計
庶乎租額有稽不至平白為之失陷也

縣役人

押錄 舊額二人今以縣事繁冗增差不定

手分 隨案分所差無定額 貼司

引事 廳子

書司 手力 即廳子 引事名字請給

鄉司 鄉裏

當直人 轎番散番等請給於縣庫茶

雜職 酒帳設邀喝請給於稅務 弓手 舊額一百六十五名

牢子 弓手輪差每月輪差一名充獄具

市巡 弓手輪差

所由

斗級

斗子

欄頭

務司

酒匠

柵子

直司

在縣承催苗稅而已

脚力

凡保正追會之事

僧直司

承受寺院事件

鄉役人

國朝鄉役人自熙寧行保甲罷耆戶長壯丁而法始變自元祐復耆戶長壯丁猶以保甲而法大變自紹聖而後以耆戶長壯丁錢盡歸公上而法盡變民避役如避寇舉世盡然是

邑獨甚端平既正經界乃汲汲茲事謂按籍選差終不能無弊於是因數都義役之舊一以乾道詔書從事排年任役率田供費條畫列之規約宸旨丁寧一一具載之所以計慮久遠者亦悉矣曾未二十年更革幾無復遺而受害者大抵如故嗚呼累年成之而不足一日壞之而有餘豈不甚可惜哉然綱目具存為政者儻攷求而舉行之則為力亦甚易故今量撫王令君申明之要著于編若其詳則有規約在

義役省劄

平江府狀據常熟知縣王承議申竊惟賦役二事關於民生利害最大本縣向來戶版厖亂吏姦縱橫官督虛籍之賦民苦破家之役追惟徃弊不忍復言當職職思其憂自初到官亟圖所

以救之修復經界整比版籍民按實產受常賦貧富小大幸就明實儻不及時團結義役則作偽者詭寄以自利尚氣者紛糾以傷和役政不修賦籍隨壞非特前功盡廢抑恐後患滋多迺分委鄉官勸率役產參合都分主客之勢斟酌地里寬窄之宜量役費之重輕準助田之多寡仍詳爲開陳使人樂趨第其先後以次充替經始於端平丙申四月竣事於嘉熙丁酉五月載念官民兩便備罄勤勞雖今者喜於有成尤藉後人守而勿失方爲永便除已採撫始行之大要條書垂遠之定式繕寫成帙申府僉印發下外其間更有數條事體稍重關於義役修廢已從本府備申朝省劄下本縣遵守併劄提舉常平使司照會施行須至供申者

一據申本縣九鄉五十都今管義役田地共五萬五百二十畝一角五十八步五尺五寸歲收租米麥共二萬四千九百九十八石六斗四升一合一勺已隨都分大小分撥與保正長聽其任便收支以助役費有餘不足官司更不復干預其田並係常平物業不許公私典賣亦不許移易轉換違者按法坐罪業還義役莊錢沒官其助田之家將來富者不加增貧者不許取入仕而免役者不給還有家道倍進樂然添助者聽有驟富而素不助田者量助

一據申本縣諸都舊亦各有役田止緣役首欲擅其利故自破壞義役掩取田租又慮人告發則或獻納本縣

板帳庫或獻納常平司旋即詭名請佃量納租錢官
司苟目前之微利不暇爲赤子深謀多隨其計夫庸
錢不除差役仍舊民已不勝其勞矣今役費日重民
至相率出田助役自以爲義彼其所以不憚其煩者
蓋欲求一日之安上之人能反其初而觀之寧不爲
之惻然動心乎今在版帳庫者二百餘畝已給還久
矣在常平司者見議申乞所有今來見管義田日後
並不許姦民獻納官司亦不當收受有獻納者則將
其人根究重寘于法

一據申保正長向來充役之費最爲浩瀚保長旣爲產去
稅存逃亡戶絕等戶代納稅租矣而爲保正者亦抑

之催科例行陪納其他色目尤多如保正則有科供
竹木科取穀果科買糟酒節序燈油接官器具於屍
定驗之費保長則有著役召保請給虛限出豁簿書
七夕冬至二節供送吏胥之費加以上落牌頭開折
司苗稅案誅求無藝已一切禁戢蠲免供具申本府
及諸司永與蠲除後如吏胥更有纖毫科擾卽仰役
人與機察糾率衆戶經縣及經上司理訴痛與究治
一據申義役初行之時勸率助田則上戶非所便義役既
成之後不復差役則公吏非所便其至使者惟大小
役戶而已竊恐日後上戶之已出田者或再欲佔據
或強自抱租吏人或破例差役或生事搔擾許役戶

與機察合詞經官理訴或往上司陳乞必使攻擾之計不得容毫髮而後義役之利可以垂永久至如鄉戛不許干預役事遇造保長苗稅簿子仰明注欠戶住居地分如保長不知着落而鄉戛志在乞覓不以實告亦許保長陳論官司當與根究重作施行務要保長分文無陪納之患

一據申木縣各都保正長雖已分撥田租以充役費而其間窮窄都分或遇水旱則役戶必難支吾今將諸都率到官民戶餘剩助役錢及拘到端平二年三年不羗苗長舊儀米錢并本縣撥到官錢共二萬二千三百貫文官會約可買田八百餘畝可得租米六百餘

石別項椿積於椿積米內斟酌均撥支付役戶以助其用申縣照會如寬都偶遇水旱特甚委是費力亦與量行給助如官司忽以借兌爲由干預錢米不許提督容情應副其餘已別詳立規式


一據申役政之弊始於版籍之不明版籍之弊始於過割之不謹本縣今將各都新排經界田籍備錄一本印押交付機察謹密收藏每遇人戶典賣田產並許具狀經縣陳乞送下機察仰置簿打號發下保正役主內係起催夏稅以後入狀者即責付新苗保長內係起催秋苗以後即責付新稅保長令取責契照及兩家砧基點對保明類申機察機察類申本縣送鄉戛

局參對官籍移割其詭名寄產者繳回元狀不許容情相與爲欺違者一例坐罪務要戶籍常清保長可無陪納之患本縣自十二月初一日以後受移割夏稅狀止正月十五日終自六月初一日以後受移割秋苗狀止六月終限滿更不受

一據申保正義役事件至多已置籍申府僉印照證今不敢細碎煩瀆姑摘取其要切者供申其餘條目凡酌之僉論而載于官籍昔並一體施行伏候指揮八月二日奉聖旨王爚修復經界義役職事終舉與轉一官並下淞西提舉司平江府常熟縣永遠遵守勿致黷吏姦民輒行破壞

右劄付平江府常熟縣

嘉熙元年八月 日



重修琴川志卷第七

叙兵

縣有弓兵有寨兵此定制也中興以來規相要害增置列戍則有大軍焉常熟瀕江近海地嚴控扼列峙舟師於是有許浦之屯前衝後擊實相犄角於是復有顧逕之屯兩屯相望雄據江澗而規模宏遠矣近年忠節軍之置又所以增備苴闕而弓兵寨兵等則縣之所依以立者皆非可以具文視也故作叙兵

許浦御前水軍

建炎紹興間水軍嘗戍江陰及許浦福山諸處無一定之所乾道六年初自明之定海分屯于此既而御前水軍統制馮湛奏臣躬親相視海道控扼去處數內蘇州許浦錢

實控扼之要港汊深遠可以安泊舟船土地高廣可以安
立寨柵比之江陰屯駐之地公議差勝且去淮甸不遠斤
堠相連易於探報比之定海駐劄之地尤為良便乞於許
浦鎮屯駐大軍合用寨地委平江府差官與本軍同去許
浦踏逐標撥并教場地步施行四月九日三省樞密院劄
付平江守臣汪應辰遂差委常熟縣丞秦煇同水軍統制
羌來使臣踏逐寨地間今據所申遷定合立寨基其所指
地段竝係人戶居住屋宇及埋葬墳塋包占田土七千餘
畝竝係膏腴之地見種麻麥相次成熟種下秧苗亦皆廢
壞小民失業號泣盈路兼許浦鎮止係邊江不當海道即
非緊切控扼之地舊年曾經分撥些少防江人船時暫屯

戍其海道自別有要害去處正合分軍屯戍今却全軍盡
在許浦亦未為便其許浦去海約百六十餘里既非緊切
控扼之地而其要害去處又却無備徒使一方田廬墳墓
復不能保伏望特降睿旨施行尋奉聖旨令依已降指揮
疾速打畫圖本申三省樞密院只就許浦立寨時定寨基
東接許浦

太平西接梅里聖法上覽圖喜形天
顏謂太平勝法皆佳名也故從其請初水軍元額一萬四

千人分為四軍八將六十三隊於內分撥三百人江陰駐
劄乾道七年十月奉聖旨許浦御前水軍以七千人為額
淳熙三年二月馮湛請再招收一千人奉聖旨增額五百
人五年八月于友奏乞增額五百人不拘等仗刺充勝捷
均撥使喚紹興元年四月奉聖旨發到福山寄招稍斫水

手三百二十人併撥到水手一百八十人付司收刺支破吐渾請給嘉泰四年七月樞密院劄子招募販倭人支破全分效用請給開禧二年馮拱申海艦百隻水手分布不敷乞招收三色軍兵五百人又乞招收武藝精熟一百人刺充全效嘉定十五年都統吳英乞增收梢斫水手八百四十人刺充勝捷吐渾與元管兵總以萬人爲額寶慶元年吳英復申本司駐劄許浦分屯列戍管認江海地分頗闊所管隘口惟顧逕最是緊切本司差撥官兵二千人着隘防捍比年以來虜寇侵擾兩淮州郡累蒙朝廷調遣本司兵船前去建康直至江池鄂渚應援防護江面本司兵額雖曰萬人除分屯顧逕黃魚塚江陰寨及楚州管下淮

海等處捍禦出江下海外許浦在寨人數無幾每遇調發不免逐急於顧逕二千人內抽差一千人揆用止有千人在戍除看守倉場庫務軍器支打錢糧外守禦委是寡少今欲措置增招二千人添置左軍內撥新舊軍人相半駐本劄顧逕如或上流江面等處有警便可就許浦調發實爲軍國經久利便從之

許浦顧逕左軍

許浦東百餘里曰顧逕與黃魚塚相望轉料角越沙窩拒山東海界淳熙間兵官王輅請留五百人分屯後增五百人又增千人總以統轄然更戍不定至寶慶元年十一月許浦都統吳英始上建屯之議分許浦二千五百人置屯

顧逕為許浦左軍以張裕為左軍統制領之有戴栩記

福山忠節水軍
淳祐九年浙西安撫使趙與憲奏乞於福山魏村江灣處
各置戍兵三百人以防江面從之

本縣弓兵

祖額一百六十五名

本縣鋪兵

祖額

許浦巡檢寨

祖額一百四十四名

福山巡檢寨

祖額一百四十四名

白茆巡檢寨

祖額一百四十四名

景元鈔琴川志

辛巳春二月

晁安玉慶芝題



重修琴川志卷第八

叙人

十室之邑必有忠信况環百里之廣耶宰武城者進澹臺令許縣者奇陳寔蓋喜斯地之有斯人也常熟地本荆蠻前乎此蔑可紀矣自仲雍以禮遜為化子游以文學名科而文物彬彬實表於他郡國然由是而後幾無得而稱焉如宋王敬則之僑處隋管崇之隱居紀載於史時一間見抑何其寥寥耶不然殆有所遺逸歟姑哀所見故作叙人

進士題名

進士登科之有題名亦可謂榮矣近者府庠刊石總曰吳郡登科題名今取吾邑進士析而列之詳而紀之或父子



聯芳或兄弟並秀蓋繼此而未已後之覽者豈無羨焉

按吳郡志列進士題名一卷以端拱初元龔識為首然未嘗彪分邑進士之目慶元志雖析而列之年序錯雜無考焉今紀其次

陸景字伯通景祐元年張唐榜終於太常博士孫徽之

陸徽之字彥猷太學士舍生免殿試賜同進士出身終於

開封府濮陽簿

陸綰字權叔寶元元年呂濬榜詳見人物門

張僑字安道皇祐元年馮京榜詳見人物門子顏孫敏四世孫攀

陸元規字正翁嘉祐二年章衡榜終於承議郎兄元長

陸元長字嘉祐六年王俊民榜終於朝奉大夫

張敦字祖仁治平四年許安世榜終於宣德郎贈左太中

大夫子柎

張顏字正甫熙寧六年余中榜終於祕書省校書郎贈中

奉大夫

嚴君鄰字元豐五年黃裳榜終於選調姪煥

程元允字志行崇寧五年蔡疑榜終於朝請大夫興國軍

倅弟元弼

林開字閱道政和二年莫儔榜終於太常博士

張敏功字守道政和五年何棗榜終於朝請大夫

陳起宗字興祖政和五年何棗榜詳見人物門

錢觀復字知原政和五年何棗榜詳見人物門子俱佃

張柎字村仲政和五年何棗榜終於

林友字德臣宣和三年何煥榜終於樞密院編修官弟友

程元敬字夢良宣和三年何煥榜終於朝散郎

富元衡字公權宣和六年沈晦榜詳見人物門

鄭時字是翁宣和六年沈晦榜詳見人物門

鄭揚字國明建炎二年李易榜終於

王履字用和紹興八年黃公度榜終於選調

王柏廣字師德紹興十二年陳誠之榜詳見人物門

許光國字利賓紹興十二年陳誠之榜終於選調

嚴煥字子文紹興十二年陳誠之榜詳

吳政字和卿紹興十五年劉章榜終於承議郎

林友字表臣紹興十五年劉章榜終於選調

錢佃字仲耕紹興十五年劉章榜詳

冷世光字賓王紹興十八年王佐榜

冷世修字良器紹興十八年王佐榜詳

錢侯字惟大紹興二十一年趙達榜詳見人物門

鄒嶰字仲山紹興二十四年張孝祥榜終於承議郎弟人宗

趙公豫字仲謙紹興二十四年張孝祥榜詳見人物門

趙思字再可紹興二十四年張孝祥榜詳見人物門

姚愈字次韓紹興二十七年王十朋榜終於御史中丞

鄒企字及之隆興元年木待問終於楚州教授

吳兢字子兢乾道八年黃定榜終於承議郎

錢萬選字少張淳熙二年詹駉榜終於選調弟萬頃

錢萬頃字師元淳熙二年詹駉榜終於無爲軍教授

張攀字從龍淳熙十一年衛經榜詳見人物門

趙彥适字周伯淳熙十四年王容榜終於刑部郎中知徽

州孫時言

顧叔康字世符淳熙十一年衛涇榜終於通直郎

周虎字叔子慶元二年武舉第一人詳見人物門

曹大昌字耆卿嘉泰二年傅行簡榜終於

陶永字永叔開禧元年榜終於選調

趙濬夫字德進嘉定元年鄭自誠榜

趙崇驥字德甫嘉定十六年蔣重珍榜

陶虎字景召寶慶二年王會龍榜

趙時言字子然嘉熙二年周坦榜



人物

前朝

常熟古壯縣詩書禮樂之地自言子游親聖門以來
人才冝不乏而前志所載唐龔景才一人而已其軼
遺既多今欲補記無由故推前朝至今一鄉之望以
示後來名而列之示不私云

巫咸

梁昭明太子招真治碑云境有虞山越紀書云巫咸之所出也

言偃吳人

系隱曰家語云魯人按偃在魯為武城宰耳今吳郡有言偃冢蓋吳郡人為是也

字子游少孔子四十五歲子游既已受業聖門以文
學名科為武城宰孔子過聞弦歌之聲孔子莞爾而
笑曰割雞焉用牛刀子游曰昔者偃也聞諸夫子曰

君子學道則愛人小人學道則易使孔子曰二三子
偃之言是也前言戲之耳孔子以為子游習於文學
見史記列傳禮記檀弓云法哉叔氏汗叔氏子
別字也又云申祥之哭言思也亦然說者云言思子
游之子蘇州記云言偃宅在縣治西北吳地記云
宅傍有井井邊有洗衣石周回四尺皆其故物朱長
文志謂之浣衣石輿地志云石
為太守蕭正德持去莫知所在

唐

龔才字敦禮慶元志曰唐龔才縣人及人也五世同居
以孝義稱麟德九年旌表門閭至宋其子孫多居小
山景祐四年有龔沂者登進士第驗其告身乃用兄
潭戶貫又考轉儒林郎告其中有云家屬見居蘇州
乞授兩浙先遣遂調婺州金華縣主簿乃知龔沂實

龔景才之裔也所以吳郡題名闕而不載嘗知瓊州
瓊山縣終於奉議郎

宋朝

陸綰字權叔縣人登呂溱榜進士第綰本名絳字伯厚
見前史同姓名者不道故更今名綰讀書務通理道
根聖人之心著言必本經以救宿儒之弊昆弟分推
先疇而付之捐俸賑族唯恐不給教孤姪猶其子以
此各登科名臨吏則益嚴臨民則益恤奉已則甚薄
奉賓親則益厚嘗提舉江淮茶稅充淮南路制置發
運司運鹽公事終朝奉郎尚書職方郎中贈中散大
夫有春秋新解三十卷工歌詩有聽琴歌等作皆膾

炙人口提舉茶稅時蘇文安洵贈之以詩云君家本
江湖南行即鄰里稅茶雖冗繁漸喜官資美嗟君本
篤學寤寐好文字徃年在巴蜀憶見春秋始名家亂
如髮紛錯費尋理又言欲治易雜說書萬紙君心不
可測日夜湧如水但恐茶事多亂子易中意茶易兩
無妨知君足才思見老泉集中龍圖閣學士祖無擇
為撰墓誌

陸徽之字彥猷縣人高才博學邑中推為鄉先生建中
靖國初有詔求直言徽之進對與雍孝聞等力陳時
政闕失唱第日皆駿放大觀彗星見復收拾孝聞等
徽之已卒

見國史慶元志云太學上舍生免殿試賜
同進士出身終於開封府濮陽簿

張僑字安道縣人有聲場屋間嘗作月中桂詩贈炙人
口登皇祐元年進士第因言事謫衢州終於朝散郎
尚書都官員外郎同年趙清獻并遊從極厚詩筒往
來觀其友足以知其人矣清獻嘗有送僑赴闕詩云
君數過予澌水邊從容不覺歲華遷同年契有二千
石釐務官成三百篇兩縣子庭俱戲綵一州僚館競
鋪筵到應禁隄新秋近亟對成顏咫尺天寫之金花
牋墨色如新今藏於家及僑召還復有詩餞行今有
六篇二帖皆諸公遺墨摹刻于山陽郡庠子顏孫敏
功四世孫攀皆登科

張攀字從龍由太學登淳熙十一年進士第初調明之

鄞縣尉楚州教授知建康府溧水縣嚴州伴監登聞
鼓院慶元倅知興國軍除將作監丞太府寺丞祕書
丞詮次中興館閣書目凡萬四千九百四十三卷上
之兼權右曹郎官除尚右郎官改尚左軍器監同日
再命拜殿中侍御史兼侍講在憲府凡兩年除起居
郎兼崇政殿說書卒年七十贈通議大夫集英殿修
撰時嘉定十六年也攀寬厚易直遇事開心見誠無
一毫矯飾幼年群試即不肯隨衆減年爲欺家世清
白持之益堅仕州縣以循良稱在朝廷以靖共著類
稱爲吉人淑士云有益齋集奏議漢唐論共若干卷
張柟字材仲縣人繇三舍瀆貢京師入太學治書有聲

登政和五年進士第初調臨江軍司刑曹事知嚴州
遂安縣方臘寇嚴領兵入邑丞簿尉皆遇害柟與力
戰刃中脅擁入窠穴柟曉以禍福逆順賊聳聽得脫
萬死中賊繼授首改秩知湖州歸安縣臨安府通判
知泰潤衢三州皆以惠愛稱柟天性純孝知衢州日
母卒年九十九歲柟年七十矣執喪甚至人皆賢之
初得郊恩舍子畀姪族有貧而喪不舉者哀而葬之
年七十八官至朝議大夫贈正議大夫

陳起宗字興祖縣人少入上庠連冠多士諸公皆歛衽
避之一日歸省囑同舍生投試卷起宗治書禮記同
舍嫉之輒易以周禮迫試乃告之弗問即以周禮試

復第一登政和五年進士第年三十七以徽猷閣學士知并州卒起宗工詩瀟灑有陶謝之風

錢觀復字知原縣人於吳越為疏屬由太學登政和五年進士第邑人士著登科自觀復始初調越州諸暨縣主簿改温州教授終更過瑞安巨寇方臘正猖獗觀復贊邑令王公濟備禦時流民歸瑞安相屬于道或議驅出境觀復曰孰為吾境驅之適資盜耳遂徙之海洲居焉調湖州戶曹同郡朱勔勢方盛以鄉人故願妻以女力辭不就授楚州士曹衢州判官虜騎犯江淝衢當要衝觀復白郡守縱民老弱出戶留一丁不留與留而疲弱不堪任者罪如軍法既而諸兵

欲乘時為變顧城中子女無所獲乃止除國子監丞改諸王宮教授太常丞祕書郎戶部員外郎宮觀起知廣德軍歲上供民輸送回遠加斂水脚錢請于朝寄廬湖之四安至國門纔五日費減太半卒年六十五號正靜居士有文集十五卷論語解二十卷劉待制一止誌其墓子俛佃

錢俛字廷碩一字惟大弱冠舉於鄉考官徐良能見其文有本源意必老儒以為選首及開卷大驚異之繼補太學生登紹興二十一年進士第授泰州教官除太學正從容學省斂以靜晦人莫窺其際除宗正寺簿太府寺丞宗正丞知袁州除祕書丞著作佐郎遷

將作少監除福建路提舉終朝請卽年六十侯平生少嗜好沉冥書史藏書數千卷朱墨精謹皆手自讎校於書無所不讀尤精於易有文集五卷諸經講解十卷易說三卷崔紫微敦詩誌其墓

錢佃字仲耕弱冠入太學登紹興十五年進士第嚴州分水尉池真二州教授改秩除諸王宮教授遷大宗正丞通判太平州太子尹臨安擇寮采佃獨以外庸在選中擢吏部郎中對便殿言三事上稱善累遷左右司檢正兼權吏兵二三侍郎出爲江西路轉運副使時盜賴文正起武陵朝廷調兵討之佃餽餉不乏繼使福建再使江西奏蠲諸郡之逋婺州飢闕守上

曰錢某可郡荐飢禱雨鬚髮爲白勸分移粟所活口七十餘萬政甲一路朱文公熹時爲倉使與陳亮書云婺人得錢守比之他郡事體殊不同又記江西漕司養濟院謂其嘗奏免贛吉麻租二千四百五十九斛兩州之人尤歌舞之今知婺州救飢之政亦爲諸郡最所以稱譽者蓋若此佃忠信恭寬根於天性臨政不求赫赫聲以字民爲先務所至得民家不取盈捐橐裝買田舍旗名曰義莊卒年六十二終於中奉大夫祕閣修撰有易解十卷詞科類要二十卷文集二十卷誠齋楊文節萬里誌其墓

富元衡字公權文忠公裔孫寓居常熟曾祖嚴咸平詞

科元衡初入太學有聲場屋間登宣和六年進士第
調隨州隨縣簿建炎初爲襄陽招撫司機宜都督張
魏公後以材薦改秩爲諸王宮教授大宗正丞知江
陰軍嘗辯盜有不應死者全活數十人皆感泣知興
國軍改袁州遷湖南常平使者改利路提刑蜀舊例
監司交餽不下數千緡元衡却而不受改湖北提刑
一以平反爲心隆興中召還中塗遇盜行李一空帥
李師顏餽以匣金不啓緘而絕之除工部郎中未幾
歎曰吾清白傳家今不翅足矣上疏乞骸骨詔以內
閣奉祠睿訓獎之有行止不殆之語爲堂榜以知止
侈上賜也繼乞休致上嘉其志從之慶禮成賜金紫

朝散大夫平生清節終始不變

丘礪字師說家海州之朐山建炎初仕于吳因寓居常
熟少讀書刻苦有志事功登政和戊戌第歷濰蔡二
州教官知吳江縣入爲國子監丞御史臺檢法大理
寺丞權戶部郎官知筠泰建三州除福建提舉兼提
刑改轉運判官在建凡十年惠政不可勝紀秦檜當
國以礪同年生每示意嚮且欲以孫締礪之女礪實
不願欲遠之乃以兄姊未葬力請祠而歸屏跡杜門
以詩酒自適奉祠凡十二年壽七十六官至朝請大
夫累贈光祿大夫礪天稟純實自律甚嚴更迭中外
三十年田僅數百畝不給則舉質以繼處之裕如有

易說及超然類藁千餘篇杜詩集句百篇子琛應博
學宏詞科璋寧國倅琛提舉福建市舶璠舒之太湖
令諸孫未將作監丞今四世孫名德相望簪紱蟬聯
金紫輝映閥閱鼎盛爲邑望族
丘未字少潛以蔭調臨安府於潛簿慶元錄參淮東餉
幹所至有聲知嘉興府海鹽縣興起學宮築捍海堤
二十里代民輸積欠租郡有疑獄率委平反守議賞
輒辭民德其政爭先立碣薦者十有八人監三省樞
密院門選將作監丞知台州惠州撫州皆不赴終朝
奉大夫年五十六未生平尚義加厚族黨捐己田以
畀姪尤人所難王忠惠萬狀其行謂天資素高才足

以運慮足以謀明足以察得其實云

曾懷字欽道宣靖公會孫世居泉州後居京師晚寓常
熟宣和元年以父任調鎮江金壇簿南渡初授和州
烏江令浙西帥幹知嚴州淳安縣濠州太平州通判
提舉兩浙市舶知江州孝宗踐祚改真州浙西提舉
以懷有應用才除度支員外郎別置拘催錢物所令
專行以豐裕門超除權戶部侍郎兼提領贍軍諸庫
除戶部侍郎再歲除尚書在版
以錢

悉必記上以蕭何劉晏目之丐閑除龍圖學士士知
婺州甫三月趣召復爲戶部尚書乾道八年二月賜

同進士出身除參知政事九年十月拜右丞相淳熙
元年六月除觀文殿大學士宮觀甫及故里復拜右
丞相力疾赴闕上以疾未全愈免赴朝參惟令入堂
治事遇大政則宣引特令製輕小金帶以賜復力上
印綬仍除觀文殿大學士宮觀歸僅三月疾復作以
淳熙元年薨于常熟私第年六十九贈少保懷由世
家登宰輔以清約自持為相侶侶得大臣體常言事
之大者視之以小事之小者視之以無則天下無復
事矣真名言云有文集三十卷

鄭時字是翁縣人樞密文肅公戩之後少魁江東漕登
宣和六年進士第改秩知太平州當塗縣律身廉介

而撫民以寬有詔在庭訓諭不悛而後加罰民多化
之秩滿通判建康府留守晁尚書謙之待以君子長
者凡所贊畫言無不從以疾奉祠而歸終於朝奉大
夫公天性嗜書至老不倦自左氏史記東西漢三國
志南北史以至韓柳杜樊川東坡諸文集皆手抄編
錄下至裨官小說莫不經覽焉

王伯廣字師德縣梅里人登紹興十三年進士第調湖
州德清尉既歸里家產遜諸弟一毫不取試教官授
溫州教授再調常州教授未赴而卒年五十伯廣少
工於文從中書舍人楊邦弼學嘗道過臨安謁張侔
材仲張曰試教官乎曰某素不習經張為指蹊轍聞

月以程文示張張大驚曰天材也卽魁教官精於詩
四六亦爲人膾炙與張紫微考祥遊詩筒往復有聽
雨集藏于家

嚴煥字子文縣人嘗與同里錢南試聖人以人占天賦
出場問破題押何字南曰押占字煥曰余奪魁君第
二果以首薦登紹興十二年進士第調徽州臨安教
官通判建康府知江陰軍遷太常丞出爲福建市舶
終於朝奉大夫煥長於書筆法尤精

冷世光字賓王縣人與弟世修世南同入太學時稱爲
三冷與弟世修同登紹興十八年進士第調湖州歸
安簿知和州歷陽縣寧國府寧國縣廣德軍教授改

秩知衢州龍遊縣朱文公爲常平使者旁邑令見訴
于民文公命體實世光辭焉文公曰選委也徃遂得
其情兩省交薦幹辦行在諸軍審計司除監察御史
遷殿中侍御史條奏忠切彈劾無所避旣而去國奉
祠尋知嚴州丐辭得請旣又引年致其仕作閑適堂
晚歲優游里社泊如也年八十終朝奉大夫世光事
親孝居喪哀與諸弟和於子孫盡其教自其父通奉
力賑施邑世光兄弟率行之不替鄉人至今高仰
之有奏議彈章 卷東堂類藁二十卷刀筆五卷

冷世修字良器登進士第調秀州崇德縣簿太守張瑜
異之移攝理掾獄屢空知泰州興化縣辟監行在北

外門激賞庫改秩乞改次等官回一階封垂白之母
阜陵特命詞以寵之遠近歆艷知建康府上元縣民
有互訟者世修諭之曰骨肉爭鬪非美事也今以律
繩汝汝終身不可復聚委曲化以恩義民感泣願息
爭通判和州守尚峻嚴世修濟以寬秩滿吏民相率
走詣臺乞留得知南康軍未上曰知足不辱即丐祠
作留耕堂以示子孫卒年七十三終朝奉大夫有雜
文三十卷詞科類要十卷

陳字字伯愛古靈先生諸孫自宜興徙常熟以父臺簿
遺澤仕爲興化軍莆田尉得劇賊格當霑賞字愀然
曰吾其可藉人命爲自進之階卒辭之調紹興府司

法隆興中改秩知臨安富陽縣分差鎮江府糧料院
知湖州提轄行在權貨務知房州歸卒年六十一字
孝友天性廉白無瑕玷居母喪鬚髮盡白撫愛諸弟
每食必同席俸祿不入私室家無庚良之器他可知
矣常自謂先世以清白遺子孫豈惟富不可求亦所
不願也陳紫微峴誌其墓謂內行外治純篤始終允
謂成德非談言云

趙公豫字仲謙自父少師家常熟幼聰警記左氏傳不
謬一字登紹興二十四年進士第調無爲軍無爲縣
尉太平州錄參再調無爲軍錄參福建運司主管帳
司改差行在激賞北酒庫知臨安府仁和縣兩易紹

興府餘姚縣分老鎮江糧科院知高郵軍真州常州
提舉浙東常平茶鹽除倉部郎官兼刑修勅令官遷
大理少卿差充接送伴金國賀正旦使遷太府卿除
祕閣修撰知太平州江東轉運副使進集英殿修撰
官觀開禧元年年七十一抗章引年陞寶謨閣待制
致仕嘉定五年卒年七十八公豫沉後清苦平居以
清坐爲適無毫髮于州縣居官廉正常言吾求爲循
吏不求爲健吏晚歲懸車勇退識尚高遠故宸音褒
獎有察辭避之真情全始終之大節蓋誦其實也有
奏藁一卷兼堂類藁五卷第公升公頤仕皆至麾節
類有政績可紀云



趙思字再可本洛人寓常熟治春秋登紹興二十四年

進士第調濠州鍾離簿時相虞雍公力薦之孝宗賜
對便殿問恢復大計思對合上意除太府寺簿太常
丞兼度支郎官台州闕守上問誰可任者僉以思對
亟出親札以授不數月治聲翕然上親書姓名於御
屏除淮南路轉運判官兼憲過闕辭上曰知卿忠實
故畀邊節除直祕閣因任陞副使除戶部郎官淮東
總領遷起居舍人充金國賀生辰使不肯稱御名虜
以爲慢來詰朝廷不得已罷之除廣西提刑奏事上
曰朕每愛卿才不令卿遠出改湖州直龍圖閣再任
除起居郎權吏部侍郎宮觀知靜江府廣西經略以

職事修舉除祕閣修撰進集英殿修撰再奉興國祠
累轉中大夫卒年七十內翰洪文敏邁誌其墓

崔敦詩字大雅世家靜海晚僑寓常熟登紹興三十年

進士第主揚州高郵簿兩浙運幹除祕書省正字繼

兼翰林權直早有文名所為制詞溫潤詳雅兼崇政

殿說書權給事中遭內外艱時翰林學士周必大乞

補外壽皇中批問吏部尚書韓元吉曰崔某今安在

元吉乃具言之既召見除樞密院編修官復為權直

既拜命即言翰林權直為名未正即更為學士院權

直遷著作郎兼權吏部郎官又兼崇政殿說書進國

子司業改權直學士院拜中書舍人加侍講直學士

院敦詩賦性端厚議論疏通知大體自直宿遞講遇

引對所陳必剴切至造膝密啓有家人不得覘其藁

者上深所器許九年夏以疾卒年僅四十有四贈中

大夫有文集三十卷內外制藁二十三卷奏議總要

五卷通鑑要覽六十卷制海十編監韻五編南澗韓

尚書元吉誌其墓

富嘉謀字君美文忠公裔居常熟以祖澤仕調湖州歸

安尉無為軍判官南安軍上猶縣令監行在省倉上

界持旨弼處州慶元縣以才選知縣事再任臨安府

通判建康分司權轄改行在權轄知饒州改知泰州

淮西運判兼憲倉兩節淮東運判知和州奉祠家居



累年卒年七十七嘉謀才具素優臨政不苟居鄉尤
急於義云

周虎字叔子世家臨淮靖康南徙寓于常熟虎個儻輕
財而尚氣節慶元二年擢右科第一授殿司步軍同
正將除武學諭階門舍人充金國賀生辰接伴副使
知光州楚州繼知和州實開禧二年也時虜會諸道
兵如其大帥以平南盪江等號使長驅入寇十有一
月至和州虎部分將士乘城以守且語父老曰吾國
家守臣一朝去此則為奔亡之人失節敗名生不如
死効死弗去雖死猶生吾計決矣合戰凡三十有四
殺虜驍將以十數最後射中其右帥石矧磔死虜氣

沮甚大創引去於是和議始堅決而江淮奠枕矣特
轉武功大夫正任文州刺史除主管侍衛馬軍行司
公事特授成州團練使除侍衛馬軍都虞候帶御器
械兼幹辦皇城司丐養提舉佑神觀尋謫徽州得旨
自便復元官自是召命再放除知和州者一特轉行
一官者再遜積上或至八九必得請乃已家居凡十
有二載紹定二年轉和州防禦使致仕卒年六十九
謚忠惠虎功在江淮忠節鮮儷而文詞敏贍作大字
蓋獨步漫塘劉少監宰誌其墓母何氏以虎和州城
守與有功進封永國太夫人母子俱廟祀于和云

王萬字處一世本婺女後為濠州定遠人晚寓常熟少

居濠梁學舍者九年慨然有求道之志熟讀論語忽
覺有得登嘉定癸未甲科授和州教授吏部架閣國
子錄添差鎮江府倅除樞密院編修官兼屯田員外
郎知台州除屯田員外郎兼編修改尚書右司仍兼編修
崇政殿說書除監察御史時嘉熙三年也會時相有
不協公論者於是上疏劾之且引歐陽脩之論趙括
謂天下皆知其不可獨其主不悟者最為莫大之患
疏入即除大理少卿尋改太常少卿知寧國府令赴
行在奏事除直寶章閣宮觀再令赴行在奏事依舊
直寶章閣福建提刑除直煥章閣四川宣諭使司參
謀官太常少卿並累辭不受家居累年凝塵滿席淡

如也淳祐三年卒年四十有八五年奉御筆前太常
少卿王萬立朝蹇諤古之遺直為郡廉平古之遺愛
可特贈集英殿修撰十二年賜謚忠惠萬聞道甚早
其學由於自得談經析理不涉支離與人交不為崖
異之行故其蘊蓄深厚人莫得其窺測每書事天二
字以自警盛年而逝不得盡其所到善類咸傷惜之
號抑齋有文集時習編書志編共 卷

郎諸王宮大小學教授

鍾璇字振遠一字叔齊縣人六歲而孤有子繼祖龍圖
學士妙峰林先生適之家妙峰家多書因得縱觀焉
與其孫璟瓌同肄業課率先成後璟三兄弟並登
甲辰第璇遂棄舉子業取所藏書盡閱之侍官天台
一日游巖谷間遇吳人僧服手列禦寇書揖而與語
坐盤石指一泓定水曰此水滔滔乃皇極大中之道
語久別去有孫燭湖跋語自是有所省悟益不溺於名利放
浪漁釣間築室梅里所居多蔣香艸自號藥圃隱居
閉戶者二十年家雖貧殊不戚戚然有求者解衣分
粟無靳色知建康唐侍郎璩自留守歸寓梅里往見

之遂爲忘年交浙西倉徐常丞誼吳門守沈侍郎揆
皆造其廬以奇人目之范參政成大等嘗薦之于朝
不報卒年五十二有藥圃藁山中錄續孔白帖秦漢
以來鍾鼎奇字藏於家

周甫字次山縣人幼穎悟五歲誦論語每舉一字輒引
類言之淳熙癸卯秋試主文郭取爲解魁以失書

塗注太守耿秉移嗣榜首遂棄舉子業窮經史百家
之書識見超卓文筆凌厲操履益不苟號無礙老人

宇文參政紹節館之以邊功累官不就孫令君應時

甚愛重之郡人周正字南時亦與訂所疑焉精於漢

史所著韓生傳章華臺記石頭城歌等作皆膾炙人

箭子稻 此品最高晚熟朱樂圃吳門志稱之

香糯米 米粒甚香晚熟著數合餘飯皆香

鼠郎黃

野稻 赤芒早晚二種

鶴鷄斑

雪裏尋 有芒粒大晚熟

雪裏揀 稈軟有芒粒尤大

師姑秬 無芒晚熟

稻公揀 早晚二種

顧公揀

白稻 早晚二種

舜哥稻 兩重殼如蠅翅

稻裏揀

雪裏扮

揀出稻

九節稻

無名稻

麥爭場 六月熟

已上並秬稻

趕陳糯

矮糯 晚熟

抄社糯 未交社先熟

師姑糯 無芒皮黃而光晚熟

秋風糯 或名瞞官糯

青稈糯 晚熟

金釵糯 皮糠黃有芒粒區

鐵梗糯 稈勁無芒怕風信花易落

已上並糯稻

節澳稻 早熟或稱珠兒稻

六十日 次熟或八日熟

金成 早晚二色赤色者土人或蒸而食之

先禾 白色晚熟一日私禾乃早熟之禾誤為晚耳

已上並先稻

烏口稻 再蔣晚熟米之最下者

赤穀稻 立秋日看如東南風不撒種

已上名色甚多姑舉其槩耳

糶 有二種黃糶蘆糶如麻子粒

粟 殼九重

麥 大麥小麥蕎麥

舜哥小麥

豆黃豆青豆黑豆紫路豆赤豆菜豆白扁豆可入藥黑扁
豆江豆豌豆俗呼為蚕豆佛手豆如指大名長十六
雁來紅豆粒大且紅八月白豁裏豆未當豆熟時先
熟山韓豆粒如蚕豆牛腿
麻油麻可壓油大麻可作乳酪其皮可緝

帛之屬

布有苧麻二種皆緝其皮而為之

黃草布色黃有極細如紗者

藥之屬

天南星

半夏

地骨皮

天花粉

麥門冬

枸杞子

兔絲子

鴈鳴子

細辛

菘萋

紫蘇

荊芥

薄荷二種

馬蘭

天羅

香附子叢生道傍一名藁草

黑牽牛花碧色蔓生籬落間

車前子俗呼為蝦蟆衣

羊蹄菜一名禿菜

筴麻紫莖子青褐色

菖蒲生陂澤葉微大

決明子黃花

天僊藤八月取

金星鳳翼草四月取

虎杖三月取一名苦杖

金剛根三月取

夏枯草五月取

鐵脚草八月取常熟山出

穀精草八月取常熟山出

果之屬

梅多種

桃多種

李

梨

柚大者如甌孟

蒲萄二種

棗

瓜多種

芋薺

茨菰

櫻桃出虞山南有二種白蠟櫻色如蠟稍大味甘肉厚曰火櫻味略酸絕不逮蠟櫻矣

杏

蓮

安石榴有百葉者

枇杷舊有無核者出頂山上方院今無之

林檎

銀杏

柿多種

菱多種

藕

重臺碧蓮出破山寺沼中

蔬之屬

方蒂柿

頂栗

韓梨

出虞山南蒂正方柿形亦方色如鞞紅味極甘皮有沙者為真在眾品之上
出頂山香味絕勝微風乾之尤軟美又有一種曰麝香囊在寺南院又有鵝鴛栗剖之其內皆雙
出縣河陽山之北十餘里曰韓村皮褐色肉如玉香甘無比削之色經時不變雖腐壞不糜近年頗得真者慶元志以爲從他處所罕有者
自櫻桃以下皆土產

韭

蒜

芥

甜菜

波稜

香菜

薤

菘

蓴

生菜

萵苣

芸臺

同蒿

蕨 虞山之北有之

冬瓜

黃瓜

茄 又一種出許浦其大如盞味甘

甘露子

胡荽

絲瓜

莧

畜之屬

牛

苦蕒 有二種一種尖葉可羹

葱

生瓜

瓠

蔓菁

斜蒿 可煮鯖羹

蘿蔔 有一種又有胡蘿蔔

裙帶豆

羊

彘

猫

鵝

禽之屬

烏

鸛

鳩 一種青鳩秋風至

鵲

鶴 鶉

鴿

白頭翁

犬

雞

鴨 有一種名鴉鴨味佳

鵲

鷹

黃鶯

雉雞

鳩 鴿

噪天子

婆餅焦



雀

鈎舟

鷺絲

山老鴉

鶉鴝

魚虎子 翠羽可飾冠梳

偷倉兒 最小飛入倉能食米穀

竹雞

布穀鳥

刺毛鷹 食刺毛又名桑扈

豹頭兒

啄木

青菜

百舌

山白頭翁 二月為小白頭翁八月為隨鷹子

櫻桃鳥 紅背白頭黑身

綉眼兒 最小而巧

黃頭兒 最小善鬪

竹槽

葛公 聲叫之葛公

黃雀

燕子

鷓鷹之類

雪姑兒

野鴨

江鷗

鶩

獸之屬

豺

兔

獺

獐

獾 有二種猪獾可食狗獾不可食

黃鶴 無黃托爪善食

鴝鵒

獐鷄

海燕

香狸

刺蝟

鼠狼

鼠

野貓

鹿

虎

魚之屬

鰕

鮑

鯽

鯉

鮎

鮓

鱖

鱸

黃鱮

黃頰

青魚

首有鮓古作鯖

鰻

鰻鱺

鼈

鱧

鱮

羅魚

鰻魚



針口

肉貯小而肥

吹沙浪

爾雅云鱮沙今吹沙魚張口吹沙是也

蜆

蜆生於泥中本草

蟹

蚌

蝦

水雞

螃蜞

河鮑

出楊子江中有三種大曰河鮑正月以後有之次曰

忌風

藥出吳江者曰南江河鮑味迥不及至江鄉則

三月

間方有梅聖俞詩云春洲生荻芽春岬飛楊花

橫鯊

初出高價爭市以饋鄰里親舊

黃尾鯊

出楊子江四五月有之其子又曝為乾俗呼

鱠殘魚

出楊子江清湖中者曰湖鯊有大小二種

淡出湖中四時有之又其甚小者則曰銀魚

鮳魚

出揚子江肥美四月有之

鮠魚

夏初有之坡翁所謂粉紅石首雪白河鮠是也

脆鱸

皮肉俱脆夏初有之

黃魚

出揚子江

鱖魚

出揚子江

鯊魚

出揚子江有沙用湯浸而食之

蛤蚧

出揚子江本草蛤蚧煮之醒酒毒不可食

白蟹

出揚子江

車螯

出揚子江

蝓蟊

出江中

沙筍

箬魚

如箬之薄出江中

赤魚

形如釜鬮俗謂之老鵝魚出江中

赤眼魚

蝻

橫魚

細鱗骨多肉厚

橘踰淮而北為枳地產各有宜也吳中地沃而物繁原

隰湖海之所出未易枚數志曾不一載朱樂園續吳門志雖載物產然包舉全吳匪專吾邑故為表而出之云

琴川志卷第九

琴川志卷第十

叙祠

古者有功德於民則祀之故無淫昏以惑世而誣民今列于祀
典者未必皆有功德也而山巔水涯捧揭而奉之者尤衆焉乃
若梵宇道宮金碧相望而不耕不蠶之民蟠據其間者類悠然
自得可勝嘆哉常熟百里之地祠僅十一棲羽流者二三萃縑
徒者五六不爲不多矣而要皆以保國安民爲名則不可得而
廢也其建置之由因革之故廢興存亡之異則當各紀歲月以
備參攷故作叙祠

廟

城隍廟在縣治西十步古者諸侯既立祀稷又爲五祀曰



司命中雷國門國行公厲是也鄭氏謂國門爲城門今
之城隍也然今州縣所祀如吳之春申及永嘉之周苛
天台之屈坦興國之姚姪亦不一槩焉嘉泰四年因遭
回祿是歲重建

東嶽行祠在縣治西一里五十步虞山南麓

模雄偉歲久摧圯屢雖再新然創造之由無碑誌可攷
平忠靖王祠在其東偏按王淮陰人張有嚴之子唐
開元元年八月十八日生十四年七月二十五日入
滅爲神護國救民封成濟侯宋太祖親征太原川水
泛溢上憂之冰忽合師遂濟空中見神來朝加征應
護聖使者熙寧五年陞濟物侯宰相王荊公令有司

勘會靈顯事跡再封忠懿文定武寧嘉應侯南渡以
來神復響答於浙間而此方尤顯著累封東平忠靖
王邑人尊事之殿基舊卑監淳熙九年重建

正順忠祐靈濟聖烈王殿在乾元宮三清殿之西先是淳
熙間邑人迎神像塑於乾元宮山門之東偏湫隘淺迫
不足以妥靈紹熙癸丑邑人靡金錢建殿宇湖山相映
翼神之休祈禱輒應

東殿聖王廟在縣治東北一里三十步莫詳建立歲月慶
元志稱爲子游舊廟然無所考

白龍祠在縣西北頂山之上世傳梁天監元年有村姥姓
蔣氏居山之東因有異感孕而生白龍失所往三日龍

歸若就乳姥怖而死即所居葬之既而大雷雨冢遷于
山腹歲之五月龍率來省或見形山間始至必甚風雨
既留則一境為之寒邑人於此候之唐貞觀十年龍嘗
鬪黑龍于海虞山之東邑人因像事龍母子于破山寺
西澗旁水旱禱焉咸通十三年令周思輯就為廟貌以
祀之見皮日宋太平興國四年令蔣文澤復遷而歸諸
頂山寺重建祠宇見蔣文澤及政和二年賜廟號煥靈
五年令朱彥求請于朝封宣惠侯遷其祠于山腰龍池
之上紹興壬申加封通濟辛巳逆亮犯順御降祝文以
禱時李寶奏海道之捷既而獲裨將倪新殷簡二賊昌
言於眾曰當戰之時有大龍舟旗幟皆白上植一認旗

書海虞山龔皓俄風濤大起虜舟皆不能自制遂為所
勝眾因悟龔乃龍字皓者白色蓋龍助順云淳熙元年

加封靈澤紹熙甲寅歲令葉知幾以雨暘響答聞諸朝
加封靈澤宣惠通濟孚應侯嘉定十一年令趙崇志復
以禱旱而應請於朝加封為靈澤宣惠通濟孚應廣利

公母為靈順慈穆顯祐普應夫人且為亭軒以嚴禱賽

之所見趙時自是邑人奉事愈加虔謹云紹熙甲寅春

邑官之後越五日雨未降冷公夢白衣老人嘆曰諸公

即龍也水涸甚將於何取之傍有枯澗底水一泓老

人指曰可取矣公倏然寤因作偈曰閔雨而禱非誠莫

然公嘗記其事邑令孫應時下車未幾苦旱亦叩禱于



慧日五月九日龍見空中當寺西尚湖之濱其上片雲
正黑爪足時露而尾垂屬地可數十丈蜿蜒卷舒色如
霜雪疎雨隨酒既隱復見可數人謂孫令誠禱所致自
為生所未見後二日大雨告足人謂孫令誠禱所致自
是迄令終更有請輒應然令常自
詣頂山焚香默禱不用常儀云

東嶽行祠在縣北四十里福山至和六年魏邦哲為之記
以為福山離宮經始於至和之初每歲季春嶽靈誕日
旁郡人不遠數百里結社火具舟車齋香信詣祠下致
禮敬者吹簫擊鼓揭號華旗相屬於道又載父老之語
肇祀之日有幅畫乘潮而至乃嶽神像居民欽祀而加
信焉而李薰為之記則謂創於至和增大於元符福山
即古之覆釜唐之金鳳山也二記所載大畧可觀廟貌
威嚴禍福顯應有胡子文者因醉悔慢善惡判官神怒

追之事見內翰洪景盧夷堅志

吳王夫差廟在縣西二里虞山

越王勾踐廟在縣西北一里虞山二廟並熙寧間道士李
則正建議者以為滅吳者勾踐也實為吳之深讎不應
廟祀于此當徹去之

春申君廟在縣西南三十六里練塘市

要離廟在縣西南四十里歸政鄉

徐偃王廟在縣西四十二里永春鄉鄉名未詳舊經以為偃王

失國而亡至膠山而終遂立廟于此按韓愈記徐子章
禹既執於吳徐之公族子弟散之徐揚二州今揚州之
境多有廟豈亦因其公族子弟所至而然乎

莫耶廟在縣西南二十里莫城

靈惠廟在縣治東南百步本縣土神周太尉之祠神姓周名容生而事母至孝歿而告母曰兒已爲神當輸忠朝廷盡力鄉里宋淳祐初邑人鄉貢進士陳權簿建祠祀之後報慈寺僧耀觀主增置寢室奉神父母像于廟淳祐十二年壬子進士趙必錡等奏神靈跡勅賜廟額牒文尚存

橫涇東嶽廟在縣東南一百二十里宋咸淳十年里人國諭張士元建以爲一方祈福之所

寺

慧日禪院在縣治西稍北九十步梁吳興僧慧嚮姓懷氏造大寺三在淮南曰慧照崑山曰慧聚常熟曰慧日今慧聚有碑存焉天監初爲十方禪林老宿相傳謂三錫勅額曰壽聖曰晏安大中祥符元年勅賜今額舊經乃謂本常平禪院未詳其故常熟叢林之盛此居其首居闌闔中而有山林瀟灑之趣紹興十五年一夕煨燼自乾道淳熙歷慶元嘉泰以至嘉定增葺始備歲入亦增益僧徒常數百人遂爲一方名刹矣

崇教興福寺在縣治東稍北二百步建炎四年建寺基本沮洳池僧文用者善風水謂此邑客山高而主位低請

立浮圖以鎮之令李闔之深然其說遂令建塔功未及半而文用死俗呼為塔院

壽聖東靈寺在縣治西北一里梁大同中建見鍾樓記唐嗣聖

二年為中興寺元在吳縣界神龍元年賜今額移於今

所宋熙寧六年重修見陸徽之莊田記有子院曰延福教院梁

天監中建宋端拱中重建

天寧寺在縣治西北二百五十步梁天監二年建今為尼

寺寺有康僧大師極靈驗相傳云有漁者夢一僧謂之

曰我即康僧也可迎我於天寧漁父以告邑中緇徒皆

俟於海隅但見一木浮沉於波濤之間不可近惟天寧

得之因刻為僧像奉以香火今不知幾年矣邑人祈求

男女多驗

齊樂寺在縣治西二百步梁大同二年建今為尼寺

報慈教院在縣北五里崇寧二年建內有十六觀堂久廢

寶祐二年邑寓趙雲安崇驥重修仍置田給之

破山興福寺去邑九里齊始興五年邑人郴州刺史倪德

光捨宅為大慈寺至梁大同三年改興福寺飛泉石橋

修廊複閣氣象雄古多唐時屋也僧堂三柱各有神書

數字相傳唐初雷震故然皆到書奇恠不可識門外二

老松如虬龍屈蟠異甚庭有瓔珞樹尤古左開花右結

子池產重萼千葉白蓮芳色異常有唐懿宗賜鐘文云

唐咸通九年歲次戊子正月二十一日勅賜破山興福

寺鐘一口重一千三百六斤破山之名舊傳正觀中有
老宿在寺說法常有白髯老人每旦必先至一日師問
為誰曰某山中白龍也師願見其形老人云我見形時
當念摩訶經號助我之威師怖誤誦揭諦神咒神以杵
擊龍龍衝山而去遂成破澗又略高僧傳云白龍與黑
龍交勇衝迸成蹊朱長文志云正觀中山中嫗生白龍
與一龍鬪於此而成澗則又與白龍祠事相涉三說未
知孰是寺有四高僧祠唐之懷述字體如吳人常達字
文舉邑人宋梁彥偁邑人宋晤恩邑人其彥偁者壽九
十九歲戒行清苦一夜登閣有虎中箭咆吼于地師徐
為拔之虎偃伏瞑目舐血而往至曉獵師朱德者尋蹤

至師示以矢鏃朱感悟為罷獵有碑存焉自唐以來名
人才士留詠百數寺有通幽軒空心亭蓋取常建詩中
語也詩見題詠門朱長文志云有文舉塔體如塔皆高
僧有宗教院雍熙中高僧晤恩修天台教於此今廢

塔常達字文舉隱此山雖王侯莫
得見之體如塔僧懷述字體如也

光明庵興福寺之屬院也熙寧辛亥僧海素經始紹聖間
增建在山腰龍鬪澗之上最為勝絕望之縹緲若仙居
僧仲殊為之記陳徽猷起宗亦有宿光明庵詩

顯親資福禪院在虞山之北巔上本名石屋維摩庵中有
石井名湧泉淳熙三年曾丞相懷家請為功德院勅賜
今額

頂山廣福院在縣西北十八里虞山北嶺下梁大同十二年石史君回舍宅名頂山院至宋治平四年改賜頂山壽聖院後又改今名景祐間太常博士陸景有頂山十詠白鳥目山桃花澗翠珉橋羽客臺萬歲石石門庵白雲泉碧菴園龍母池凌雲徑今所存一二耳白龍祠正與寺相對

上方院在頂山寺右小嶺之外夾兩山之間其前積石坡陀杉竹幽翳澗水湍激醒人心神最爲虞山佳處范文正公嘗有詩遺僧至師刻石在焉院有觀音像嘗有光異劉御史拯爲邑令時記其事邑人尊事之遇水旱必與龍母及龍像偕迎至邑寺禱祈嘗有應院有白龍泉

清甘不竭舊有白鰻隱見其間今少見之矣

瑞石庵在頂山之巔上方院之右幽深峭絕竹栢蒼蔚宋明道元年邑民陳氏築庵延僧守常居之治平丙午縣令向公宗旦命僧慧安繼其後尚書祠部員外郎錢藻爲之記侍郎王琪主簿陳珏皆有詩今爲參議虞公似平墳庵有令孫應時詩

中峰庵在頂山之南峯

寶嚴院在縣西十八里虞山之西麓所謂倚山面湖秀列屏障者也梁天監初建舊名延福禪院唐會昌中廢宋端拱中再行葺治天禧中邑令胡順之飛章上請改賜今額當錢氏霸國時有希辯禪師棲處此山以名聞及

錢氏納土隨詔詣闕賜號慧明大師歸隱舊刹錢氏復
施金五百兩造七級浮圖淳化中太宗詔賜急就章道
遙詠祕藏詮太平聖惠方李堪修造記仁宗朝賜銅鑄天齋
仁聖帝像為伽藍而增葺始完備矣見邑人陸絳記有李堪嚴煥王伯廣
詩有子院曰泗州院

淨慧禪院在縣西南三十六里練塘市舊名仁王見程冕修造記

開寶中鄒知邈知造施地為之大中祥符元年賜今額

見夏之文記

觀音教院在縣西南五十里楊尖市政和五年建

妙清院在縣東南二十里莫城陳禎明二年建

吳塘接待院在縣南五十里建炎間建

勝法寺在縣東三十六里梅里鎮唐元和中閻將軍舍宅

為之乾元元年置為離火宅寺晉開運中改為境寧宋

大中祥符元年勅賜今額至和初更為禪院

初閻將軍舍宅為寺而不著其名今為寺之伽藍神極

靈異士大夫有携家以居者必有虬虺見之箱篋牀蓆

之間以是不敢久居寺之東有冢在焉歲時寺僧如家

人禮設蒲饌以祭寺之西北隅有洗馬池池之側有小

塚蓋其劔甲云有參政李光尚書員外郎陸絳詩又有

石林先生所作輪藏記皆刻于龕之廡下

延福禪院在縣西一十三里虞山嶺下梁大同三年置觀

符圖經

法解寺在縣東七十里許浦鎮舊名泗州塔院隆興元年

浙東西泰海州江海制置李寶申請遂移端委鄉中沙

村廢寺額於此法解寺元係唐會昌元年里人陸殊等舍地為寺賜額法解

能仁寺在縣東一百四十里崇寧五年建

萬壽寺在縣東一百四十里甘草市

聖像寺在縣東一百一十里陸河市始吳僕射徐真捨宅

為寺晉建興二年得泛海二石佛像奏請今額宋嘉祐

八年朱肱重建僧仲殊為之記

褒親崇惠寺在縣東南七十二里

係宋靖懿帝姬殯

所政和七年賜額

明因禪院在縣東南七十二里支塘市舊曰永昌乾元中

廢咸通中始復遂為再昌寺宋祥符元年改今額熙寧

六年遂為禪院見陳于記

廣安寺在縣東南一百里直塘市唐乾元初建為寶林寺

宋祥符元年賜今額紹興六年僧了悟舍房基建塔開

鑿地宮獲博銘有長安二年瞿像寶塔之字乃知唐武

后時嘗建塔于此塔成因以瞿像名之以表其異乾元

初有簡大師者領二犬來游卓庵於此插竹林以布護

籬落忽爾鬱茂後遂成林

靈寶寺華嚴禪院在縣東南一百二十里塗菘市唐乾元

初建

法輪寺在縣東南一百十里晉咸和六年有雙龜化為雙

鳳騰飛號曰雙鳳宋大中祥符元年勅賜今額
智林寺在縣東北六十里李墓唐乾元元年建為永安寺
咸通二年改易幢塔至周顯德中得州符鼎新之詳見
元祐二年結界記宋大觀四年為犯宣祖陵名改為今
額寺舊在垆身父老云所撞之鐘近或不聞而多應於
李墓一方之地其鄉人議之曰此地豈有緣耶遂徙其
寺於此至今舊寺傍有涇曰寺涇其址巍然尚存叅政
李公光為令時嘗遊寺有詩寺有高僧曰了通嗜酒不
檢衆所不足一日通州狼山寺火其衆見烈焰中一僧
以袖撲滅火自稱曰智林寺了通和尚明日衆詣智林
為謝適了通醉力辭無之既而沐浴告逝問寺衆曰我

去汝等欲無事耶欲有事耶衆曰願無事遂盡火其寺
壽聖晏安院在縣東北七十里許浦鎮陳禎明三年建本
名晏安禪院宋治平四年勅賜今名
大慈寺在縣北四十里福山鎮梁太清元年建或謂天監
中為法水禪院宋大中祥符元年賜今額中遭回祿焚
毀殆盡近始鼎新焉傳聞海中有巨木蕩漾其間他寺
欲求而不可惟大慈一禱得之遂以為僧堂巨棟標之
曰泛海梁至今尚存

永慶寺在縣西北四十五里河陽鳳凰山梁大同二年置
結界記云梁侍御史陸孝本捨宅為寺至宋政和四年
甲午經五百八十七年始乞奏名大福寺至大中祥符

元年九月內改賜今額有碑存焉故老相傳有僧肉身
泛海而來狀貌奇古僧徒迎而置之寺固以膠漆奉以
示香火至今存焉遠近求男女者多驗其碑瘞之鐘樓下
上塑鬼神之獍惡者以護之今不可得而見之山絕頂
有天然石井一蓋泉穴也廣二尺泉清而甘雖大旱不
竭鄉人目曰聖井樵牧者戲以土石窒之今所存無幾
寺之庭有八檜皆數百年之物交締膠結如翔龍怒虬
大一夕雷震其西南一株撇其枝附著它幹既與本體離
絕爲二而其青青猶故是謂寺之三絕秘書丞李堪常
有詩溫郎中革字彥機來遊亦有詩
法輪寺在縣西四十五里志山嶺下紹興九年移於今所

淨居院在縣西北八十七里慶安鎮梁大同二年建爲尊

勝宋大中祥符元年賜今額

見知制誥錢
易經藏記

法寧教寺在縣東北三十六里東花莊宋端平三年平江
北禪寺住持僧如理建嘉熙四年僧居簡爲之記

泗洲殿在縣東一百一十里下陸河要道中吳赤烏二年
僧達法師建累遭兵燹宋嘉泰四年里人崔七朝奉捨
宅遷建係聖像寺子院

妙相經堂在縣治東南二百步宋咸淳元年本邑道人李
淨修買地創建

紫雲山

紫雲山在縣東南二百里

紫雲山

紫雲山在縣東南二百里


紫雲山在縣東南二百里

紫雲山

紫雲山在縣東南二百里

紫雲山

紫雲山在縣東南二百里



宮觀

致道觀舊名乾元政和間改今名在縣西一里虞山南嶺

下梁天監二年建舊志載漢天師十二代孫張裕在此

山修道白日仙去而梁昭明太子碑則曰張道裕朱長

文吳門志載張裕先生來此山棲遁十餘載夢神人告

曰峯下之地面勢閑寂可以卜居裕如教興葺號曰招

真後改曰乾元梁簡文帝嘗賜玉案一面鐘一口今梁

殿尚存規模壯麗材植雄偉紫微殿後尚有煉丹井舊

傳治平中主觀道士李則正浚井得石函一中有綠合

合藏丹二粒即化為雙鶴飛去縣令陳照鄰持其函以

往而綠合為則正所藏則正善醫至藥所不療者則以

水煮合以飲之疾必愈自則正死而合不知所往矣其
丹或至夜陰晦若有二炬遊走湖市倏忽無常紹興初
人猶每每見之照鄰嘗有詩云鍊丹井存瓊甃古驂鸞
人去玉堂空觀西北嶺上有凌虛堂旁俯萬瓦下瞰平
湖先名望湖不知創自何年亦邑大夫尋勝行樂之地
今之名蓋取僧仲殊下壓凌虛萬象閑之句也宋御筆
宮觀三十間以上及圖經所記洞天福地未有額者許
監司保奏取旨賜額本府保奏此縣乾元宮有屋一百
三十間著在圖經宣
和七年勅賜致道觀

乾元宮在虞山之巔始名竹林庵後改招真庵在致道觀
之北嶺上宋元祐中海陵徐神翁之弟子申先生欲南
遊請於師師曰逢虞即止無雪即開申遂渡江至是山

徘徊瞻眺久之問於人曰虞山也即築庵居焉然患無
水一日大雪唯山坳不積浚之得美泉至今雖旱不竭
庵成一日申公不知所往繼之者累加增葺今堂宇煥
麗林木茂鬱遂成壯觀紹興丁卯中道士喻抱元增築
改名招真庵見康舉之記淳熙間邑人以致道舊額乾
元宮之名請於郡改今名宮門之外有一亭名極目極
雄偉邑令何充所創面勢寬閑平野一望數十里姑蘇
崑山無錫諸山屏列又有兩湖居其左右實為一邑勝
槩之冠初山路犖确躋攀艱險道者胡道堅募緣自教
場西山趾以輓甃砌直達宮門路始夷坦登陟便之遐
望如白練界山善風水者顧謂弗宜嘉泰壬戌有邑民

挾鬼神事走白集撰趙公豫於是度材鳩工卽山腰跨路立亭厭勝之自有碑記載始末

清真觀在縣治西一百五十步梁普通四年建舊爲女冠之居今廢

真武道院在許浦鎮乾道間都統馮湛建嘉定丁丑都統吳英徹而新之

崇真道院在許浦鎮紹熙三年都統劉震建未幾江潮浸齧嘉定十年丁丑都統制吳英卜基於舊址之南重新

初造嘉定十七年甲申陞爲洞晨觀

至和道院在縣治西二百步宋咸淳辛未天台高士應梅所初建

棲真道院在縣東北七十里許浦鎮宋嘉定五年壬申高士周智靜建

延真道院在縣東南一百二十里塗菘市宋嘉定十六年癸未前平江府檢察宗室尊長趙伯建

頤真館在梅里鎮南申道人煉丹之地有煉丹井與虞山招真福山潛真爲三真云

潛真館在福山鎮亦申道人煉丹之地

黃香墓在梅里鎮黃香字文彊江夏安陵人性至孝詳具

東漢本傳乾道初梅里有蘇忠翊直上葬得古冢乃黃

香墓碑刻皆隸字首兩句八字中二字不可識延陵慈

博羸孟光貞其碑陰乃會稽東部都尉張紘誄又有薛

綜修祠日月題刻其可辨者八字子瓊孫琬蘇氏挈歸

于家夜有光怪昇棄崑承湖中

瞿硎先生墓慶元志云在直塘市市有寺曰廣安一日浚

塘得古冢墓塋稱瞿硎先生字鵲子廣川人隱居不仕

葬于東陵武丘寺重堀之原武安蓋廣安舊額今其地

尚多瞿姓晉書隱逸傳瞿硎先生者不得姓名亦不知

何許人也太和末常居宣城郡界文脊山中山有瞿硎

因以為名焉大司馬桓溫嘗往造之既至見先生被鹿

裘坐于石室神無忤色溫及僚佐數十人皆莫測之乃

命伏滔為之銘贊竟卒於山中此正猶孫叔敖史失其

名得其碑乃知名饒叔敖之名由此以著瞿硎亦近此

蕭天子墓慶元志寶嚴寺之東丁家灣之西故老相傳云

蕭天子墓墓上有古木樵牧不敢近不知何帝也按江

陰志蕭天子墓在長信鄉有大土封號倉堆相傳為蕭

天子墓又按梁史梁敬華為江陰王殂蕭季卿嗣陳大

建二年除侍中淳于氏就季卿買梁陵中樹皆坐免即

此觀之墓亦有自矣或謂蕭天子墓不應在此按唐史

等皆執弟子禮號蕭夫子存嘗為常熟縣主簿其父死

或葬於此地不可知恐是蕭夫子墓訛夫字作天字耳

然文謂顯士客死汝南又未知果葬於此否也姑備所聞以俟博識

李墓在縣東南四十五里慶元志云父老相傳吳越錢王

遣將梅世忠李開山屯梅里今開山卒葬於其旁十八

里故曰李墓今土人或請之李王墓其土堅緻如石斷

之有聲

陸丞相墓在開元鄉岡下村墓左有涇曰大墓浜昔村民

浚涇嘗得朱漆板古刀錢錢牌未知丞相為誰也

命其墓之說皆受卒於山中其五餘餘味味史夫其
因以為名大后與對墓者其說之謂至其地始

重修琴川志卷第十一

叙文

文以紀述詩以賦詠而實事賴以詔後垂遠者蓋於此有攷焉
常熟為縣自梁碑揭於招真唐詩題於破山而鴻筆麗藻之士
繼踵而作實昉於此殆不可以不錄也故作叙文

碑記

常熟縣宰題名記

常熟為縣其來久矣舊為毗陵郡南沙至梁改為常熟自梁歷
唐迄于偽吳幾數百年前尹是邑者姓名莫或紀錄故不得而
考宋太平興國中錢氏以圖籍歸于京師始於縣令蔣文懌至
元豐初知縣宣德郎劉拯求得其姓名凡四十二人列之板榜

置於廳壁自此來尹者至則書之觀其間相繼登金門上玉堂羽儀臺閣正位樞極蓋翩翩焉未見其止余因承乏慮版榜不足以及於是命工鑄之于石立于廳之左闕者補之庶為不朽之傳宜觀名列以勸方來俾尹是邑者知夫儒之效愷悌及民延福百里庶幾乎刊石而無愧也紹興二十一年九月魯國公曾慎記

續題名記

上方駐蹕臨安於時吳門視周畿內漢三輔唐同華我舊京之陳鄭也衣冠之所鱗集甲兵之所雲萃一都之會五方之聚上腴沃壤占籍者衆雖前代與全盛時猶不可同年語府邑之事宜其倍稱況府庫之出納獄市之浩穰蓋不待較而知者環府

之邑五而常熟居其望焉時主客以戶計者八千九百七十有二今五萬一千三十八夏賦金錢為緡二千八百其幣帛疋合萬二千六百而奇弗詳秋租穀粟七萬六千餘斛乃今折帛為緡者十萬二千三百而斛財損其舊二千邑之事其倍稱何如哉今其邑從事於民者如是而邑復瀕海道直故疆沂密登萊全齊在望刺利規恢舟師所宿則實居今日之要害風檣連林夜嚴震海資糧鉅萬以日饋給營繕百項以時調度苟有不至貴且乏興若民兵之事又如重以府所倚集版籍輸委風雨寒暑不踰比為令者材若不濟負罪投劾而去者頂背相望也則壁記之不列何以自警朝夕庸少惰乎映不佞爰來亦既年所事定得聞始閱次中興以來為令者至映之名氏授受月而

日之鏡石壁端以告來者噫令秩北京寺月奉逾二萬廩逾四斛歲入圭田直過六百石其顧一己之利害去就而不思其責之塞將不特能禍其身千室之邑亦必有受其弊者而映其敢墮哉今吾邑之人或知映不敢墮也率以淳厚簡孚交相爲治倘如是愒日庶乎列名下方其無辱若夫邑之望則有巫咸所止之山秦伯所葬之墟言偃所居之里龔景材所表之間其風俗之美猶可概見而邑之升置凡附於府者有職方氏在故不記記其今昔之同異云淳熙元年邑令陳映記龔頤正代

縣丞題名記

琴川吳郡之劇邑也民賦之庶戶口之繁非他邑比以累政大夫數更易而貳令者類不得少休旣再轉而丞茲邑又適多事

之秋攝事幾年所謂松竹佳趣乃變爲鞭笞之地庭槐無存廳宇壞漏俱未暇過而問焉茲幸令尹葉君來此年餘百廢具舉政平事簡僚佐得以少安遂可留心悉與葺理皆成綸緒獨不見有題名記心竊疑焉因灑掃書齋得二斷板於塵埃間拂拭視之乃其記也歲久字泯漫不可覽殊失所以重前賢之意易以琬琰而刊前後賢者之芳字予亦得以託不朽顧不幸與嘉定改元歲在戊辰首夏望日錫山張漑記

主簿題名記

邑令丞而次有簿古職員令也掌凡邑之簿籍勾稽之事糾正縣內之治外此無責職若其簡然豈知戶籍有升降產稅有去留悉關筆削一或不謹則墮吏奸民且受病矧琴川繁劇甲於

中吳去臺府纔三舍遠財賦分督牒訴委洪檄命驅馳靡日不
殷職亦未爲簡也汝邨冒承茲乏汲汲抹過自惟無足以傳後
惡有所謂光於前者試求前人之名氏稽其行事以質其窮通
而壁記闕然漫不可尋究訪之故老僅得今尚書蕭公而下十
有三人焉前乎此者莫知也將立石以紀之或乃謂人材短長
政事臧否民言士論足可以印惡用是爲哉余應之曰公議誠
足信然閱歲滋久名且不著實將安存故知今之所訪已若此
余恐後之訪今蓋不如今之訪昔也奚以詔方來僉曰然迺鑿
諸石嘉定戊寅十一月初三日雲間趙汝邨記

縣尉題名記

縣有尉居丞簿下然號劇曹而縣令埒歷代選用常艱其人疆

者作聰明苛察操切以擾吾民弱者不勝任縱奸長惡以害吾
民其當官以威惠稱職聞者異時以之宰邑刺史司察一道皆
可判然迎刃而解常熟爲浙右壯縣地鉅事叢吏猾民奸並江
濱海而東界爲盜藪古有二尉分治長老傳聞廢置歲月無攷
爰自合并以來舊矣雖仕于此者材名文士往往間見然未聞
有卓然超越爲當世聞人者用是奔走巡徼日不暇給率弗遑
問其遠者大者此壁記所以不立而前事之師後事之鑑來者
泯無觀焉今尉黃君應酉建安奇士也繇始莅職洎茲垂滿寬
而栗威而不猛加惠黔庶艾鉏豪強黜吏束手受制所隸弓兵
不寒而慄部內賊發輒搜捕得其主名遠鄉隣境藉其威聲巨
奸大盜漸以屏息今茲盜賞踰格將換京秩行且飛黃騰蹋脫

迹泥蟠而强弩之末猶賈餘勇植志夔邈去如始至大懼題名
未創無以傳後自我作古勒茲堅珉余見其材諳之華政事之
美嘉其替之迫而請之堅也於是乎書奉議郎知常熟縣事徐
次鐸嘉定元年記

社壇壁記

有民人焉有社稷焉民爲貴社稷次之臨民所重莫先於社稷
也常熟之爲邑亦古子男之國於邑之西所寄以奉社稷之祀
皆頽垣敗屋壇壝墮圯任古至官之初會春祀莫遑展俎豆之
事以薦此誠念何以報神休而答陰貺越歲方鳩工而治之其
所費不謀于公帑不假之民力亦取其有罪眚而不麗於法者
命贖之壯者獻其力富者助其資卒無異詞始于今年之孟秋

報成於冬初其壇壝垣屋爲之一新雖無華麗亦使邑人知社
稷之重察邑官之所存焉紹興甲戌冬十月縣令陶任古記

修社壇記

昔人語爲宰以謂有民人焉有社稷焉先民人後社稷以見二
者俱重而其序不可易爲宰者先民後神固有次第而治民事
神又自吾身始蓋繇身以及民由民以及神本末相貫初無二
理故身正而民治民治而神立于以修祠壇嚴祀典廼其所也
淳熙庚子冬陳君來宰常熟其始至也胥吏眊然按牘紛然
民情繭然色色頽弊待我糾剔窮日之力猶恐不迨何暇及于
他事然而陳君不然區處數月皆有條理民且就蘇陳君曰事
無不可爲在人耳次年夏淫雨不止農畝告病以謂開闢之權

神實司之顧典祀之重莫若社稷今其壇壝不葺門宇不全神且皇顧民將焉於福是輟經費僦工徒督治之不旬日間圯壞者以固欹折者以整圻墁堦闕者以飾旋旋然一還舊觀人心忻快以爲不圖復見此以是知壘薦有所寓祈報有所歸其厚于神乃所以庇於民也然而陳君繇身以及民繇民以及神誠得設施之本知先後之叙者也予稔聞盛舉嘉陳君之政表裏兼濟自有次第未易以淺淺窺測用紀其實以詒將來俾得稽考云是歲秋七月二日朝奉大夫尚書吏部郎中詹儀之記

修社稷壇記

開禧三年春常熟縣令闕雲川葉侯凱奉辟命來宰是邑始至有事于社稷侯徃與祭顧壇壝之隳圯屋宇之荒蕪慨然語諸

僚曰昔言爲宰有民人焉有社稷焉二者俱不可無也今祈報之祀廢而弗舉神將焉依民不受福坐視其廢而弗葺可乎前人不相與相是役者何僚曰侯未之知爾常熟爲吳會劇邑前乎縮縣章未幾而去者踵相接也或以財賦不辦去或以獄訟不理去或智及之力不能勝之又以廢事去惴惴道責猶不能免奚暇他及侯以爲不然天下事未嘗無興廢人實爲之夫有邑則有民有民則有社豈有宰堂堂之邑先畏其難不爲之計乎於是莅事以勤行己以潔聽訟以公待人以恕利民者興害民者除始若悶悶不快人意侯守之不惑居數月果以政報上下晏安百廢具興社稷之事似可以次第舉而侯猶以爲未也先是縣有學歲以繕治不時傾闕欲壓乃命諸執事者諭以民

爲貴社稷次之之意予欲先修學以訓民諸君盍相率以董成
焉蠲吉鳩工不戒而踰月而殿廡增麗丹陽公之舊室湫溢無
容膝地又從而廣其居學校爲之一新又明年始議所修以社
稷嗟夫社稷之初立其來遠矣記載不存歲月無所尋究修於
紹興二十四年之冬十月至淳熙八年又修之以迄于今者三
十載而侯又修之凡物之有興替固不偶然獨侯所謂人實爲
之信不誣矣侯以儒術飾吏事尤通於世務是役也斷斷規模
宜惟素定不陋不奢悠久是圖不亟不遲恬安是務舊趾築土
爲壇旁上皆甃也雪霜風雨之餘易以動拔於是更以石寸竹
之椽若將壓焉悉命以木易之垣分中外低者高之墁者飾之
靡罅弗補靡隙弗周煥乎偉哉觀者駭目經始於嘉定二年秋

八月告成於冬十月旣落囑應酉爲記應酉何人哉弗敢謝不
能君子謂是舉也有可書者三方其始至講明農祀不忘本也
一宜書及其欲修首及鄉校不先神也二宜書迄于已成費捐
公贏不及民也三宜書春秋之法有一善必書舉而三善備焉
得不書於是乎書十月二十五日乙卯迪功郎平江府常熟縣
尉巡捉私茶鹽礬兼催綱黃應酉記

社壇記

端平更化之歲山陰王君燾來宰常熟始至召邑之故老而問
政焉曰久矣此邦之不獲乎上下也故老則曰前宰孫應時後
皆有以自取也君愀然作色曰是吾邑化未始更也乃新學宮
飾教令謂子游邑人也別爲宇爲像祀之收言氏諸孫於農圃

而教焉招四方之士若邑之秀子弟而學焉士風以變民聽以
聳而以為猶未也昔太伯之有國於此也禮遜之俗推重天下
今渡江百年授田無法制賦無藝民無常產則無常心宜也乃
通邑而經界之以倡五邑而猶以為未也有田必有役而役莫
便於義合公私高下為之十餘年不止仁聲義氣充塞一同大
綱小紀具在方冊比及三年教化興而賦役簡士歌於學民舞
於塗今日之事有大於是者乎設壇以祀社稷而風雷雨附焉
皆本於朱文公鄂州社稷記俾來以圖請於郡太守曰予至之
三日檢視壇壝之不如法者命有司修飾畢具又去淫巫之幻
以惑衆者暮年之間人用安業歲以大熟餘非不樂此而不為
也祀典之不恭而老佛是徇民義之不務而巫覡是虔余甚不

便於此乃掃地而更新之以莫春庀具季夏乃畢將以八月中
辛集吏行事俾民與觀焉子其誌之遂雖以不文為解然心許
之會聖上不以為不治易郡甬東還家未幾則令已被命升帑
轄而進諸朝徵余文益力余惟文公所記一本政和新儀而類
禮有書始自通典終於嘉定新禮往往詳於裸獻陟降而畧於
壇壝而嚮有所謂社東稷西風雨少却皆北嚮者有所謂同壇
而共牲者於圖疑未合而未有以證也抑聞之禮曰郊社所以
事上帝也又曰社者所以神地道也意者吾先聖王郊所以祀
天人君用之社以祭地諸侯用之惟天子為能祀郊故得望祭
百神若諸侯則止於社稷故勾龍棄以功配風雷雨師以其陰
陽晦明及百物者因類而致之上不敢擬於太社王社之制下

不與群姓立社齒其樽罍有數牲幣有式至於車服之微因其
尊卑小大咸有科級報本反始禮之至也而別嫌明微於禮之
中又有禮焉誠能積精致感於肝鬲之間則於天乎不僭何憂
乎釋老盡心竭力於襮襍之務則於神乎無諂何憂乎巫覡自
是以往風俗成而氣習厚有以他道惑民者鮮矣子曰明乎郊
社之禮禘嘗之義治國其如示諸掌乎令之為此庶乎其善治
國矣故特書之以示更化善治之本恤民祀神之務而於祀典
禮經因有攷云是歲十月朝散大夫煥章閣待制前知平江府
王遂記

重修琴川志卷第十一

重修琴川志卷第十二
學

丹陽公祠堂記

平江府常熟縣學丹陽公祠者孔門高第弟子言偃子游之祀
也按太史公記孔門諸子多東州之士獨公爲吳人而此縣有
巷名子游橋名文學相傳至今圖經又言公之故宅在縣西北
而舊井存焉今則雖不復可見而公爲此縣之人蓋不誣矣然
自孔子之沒以至於今千有六百餘年郡縣之學通祀先聖公
雖以列得從餼食而其鄉邑乃未有能表其事而出之者慶元
三年七月知縣事通直郎會稽孫應時乃始即其學宮講堂之
東偏作爲此堂以奉祠事是歲中冬長日之至躬率邑人學士

大云及其子弟奠爵釋菜以妥其靈而以書來曰願有記也熹
惟三代之前帝王之興率在中土以故德行道藝之教其行於
近者著而人之觀感服習以入焉者深若夫句吳之墟則在虞
夏五服是爲要荒之外爰自太伯采藥荆蠻始得其民而端委
以臨之然亦僅沒其身而虞仲之後相傳累世乃能有以自通
於上國其俗蓋亦朴鄙而不文矣公生其間乃能獨悅周公仲
尼之道而北學於中國身通受業遂因文學以得聖人之一體
豈不可謂豪傑之士哉今以論語考其語言類皆簡易踈通高
暢宏達其曰本之則無者雖若見誦於子夏然要爲知有本也
則其所爲文學固宜有以異乎今世之文學矣旣又考其行事
則武城之政不小其邑而必以詩書禮樂爲先務其視有勇足



民之效蓋有不足爲者至使聖師爲之莞爾而笑則其與之之意
豈淺淺哉及其取人則又以二事之細而得滅明之賢亦其意
氣之感默有以相契者以故近世論者意其爲人必當敏於聞
道而不滯於形器豈所謂南方之學得其精華者乃自古而已
然也耶矧今全吳通爲畿輔文物之盛絕異曩時孫君於此又
能舉千載之闕遺稽古崇德以勵其學者則武城弦歌之意於
是乎在故熹喜聞其事而樂爲之書至於孔門設科之法與公
之言所謂本所謂道及其所以取人者願諸生相與勉焉以進
其實使此邑之人百世之下復有如公者出而又有以一洒夫
媮懦憚事無廉耻而者飲食之譏焉是則孫君之志而亦熹之
願也公之追爵自唐開元始封吳侯我朝政和禮書已號丹陽

公而紹興御贊猶有唐封至淳熙間所盼位次又改稱吳公云
五年六月甲申朝奉大夫致仕婺源縣開國男食邑三百戶賜
紫金魚袋朱熹記

常熟縣重建學宮記

常熟縣學之始圖乘放失僅有屋梁書至和紀年餘無所考慶
元三年縣令孫應時以言游里人也始祠于學新安朱子既為
證其事寶慶元年祠遷于學之左而孔堂闕壞弗不加治今令
會稽王爚始至大懼無以崇化善俗約縮浮蠹踰年更而正之
屬邑士胡洽胡淳庀其役以孔廟居左廟之南為大門北為言
游之祠又東北為本朝周子張子二程子朱文公張宣公之祠
以明倫居右東西為齋廬四以館士為塾二東以儲書凡祭器

祭服藏焉西以居言氏之裔通為屋二百有二十楹而為垣以宮
之且增田四百畝有奇歲助公養之費凡言氏之裔官為衣食
而延師以教之別為田五百畝以給其費白于郡于部使者為
廩以貯之經始於端平之二年之冬竣事於明年之秋迺八月
丁亥釋奠于新宮屬郡人葉輔之叙其役以求記於了翁竊惟
朱子嘗記子游之祠矣如魯論所載二三事皆發揮無餘藐茲
孤陋安敢復措一辭然嘗讀禮書而竊有見焉因記廟學之成
併附其說夫檀弓不知何人所作而一篇之書獨於子游極其
稱譽雖於孔門諸子率多譏評又以言曾並列其是言而非曾
者非一幾若偏於抑揚然即其書以攷之大抵當典禮訛闕無
所考訂之時人之有疑弗決者以質諸子游故前後典禮所關

者十有四皆以游一言爲可否亦足以見其爲時人之耳目雖
汰哉叔氏一語若譏之而實尊之然則游以習禮列于文學茲
其爲文爲學蓋三代典章之遺賴游以有存者嗚呼信其爲豪
傑之士矣昔柳宗元謂論語所載弟子必以字惟曾子有子不
字遂謂是書出於曾門蓋字與子皆得兼稱如門人之於孔子
進而稱子不敢氏退而稱仲尼不言子其次亦有旣子且字如
閔子之等不一二人或子或字者又數人然淵弓至游夏最號
高第字而不能子也有子曾子子而不得字也就二者而論則
字爲尊蓋子雖有師道之稱係于氏者不過男子之美稱耳故
孝經字仲尼而子曾子禮運字仲尼而名言偃至於子思字其
祖孟子字其師之祖相傳至今人之字仲尼者無敢以爲疑仲

尼作春秋二百四十二年間字而不名者僅十有二人而游夏
諸子之門人亦各字其師相承至于漢初猶未敢輕以字許之
即是而觀則子游以句吳孤遠之士遂得字而不子以列于高
第之目此又豈易易然者今吳門密邇行都而常熟爲壯縣有
如游之北學洙泗遂以習禮輩行顏閔寥寥千載間豈終無其
人耶或者徇於習俗未有以自振我朱子旣嘗表其事以風厲
之子又何言獨惟山川風氣古今猶夫人也誦先聖之書服先
賢之訓嗚呼其必有聞風興起以無負建學尊賢之意者士其
勉之端平三年十月戊戌資政殿學士通議大夫提舉臨安府
洞霄宮臨邛郡開國侯食邑一千五百戶實封三百戶魏了翁
記

教育言氏子孫記

按琴川圖志言偃字子游舊宅在縣治之西唐開元追爵吳侯本朝升爲公慶元間令孫應時即學宮建祠于明倫堂東偏後令遷其祠祀事弗飭有識嗟惋今邑大夫王燭移書諭余曰聖道綦蕪心甚愧之今且一新矣東廟西學前殿後祠莫薦攸序既順且嚴嘗訪公裔孫則降在編氓罕修儒業由是即新學西齋扁曰象賢聚言族子弟其中縣給贍養之資買書延師朝夕訓導擇齒長者主公祠宇又慮歲月寢遠美意難繼則爲之節冗費得緡錢六千三百買田以畝計者四百有五十歲收米以斛計者三百有八十庶貽永久願有記焉余歎息曰是舉也可謂知禮矣禮天之經地之義人道之所由立而國家所以恃爲元氣

也昔者夫子與於蜡賓實有感於魯喟然發嘆子游遂問禮而夫子歷言上古中古與後世之變而斷以禮之廢興子游凡三問而夫子三答皆所以極言禮也異時燕居從容子游子張子貢侍縱言至於禮而子游又發領惡全好之問夫子然之攷諸檀弓所載以曾子之任道尚推子游爲習禮其禘襲一節則曾子慊然自知其過與他所論禮皆精入毫髮獨聖人之傳至於論子游之門人則謂僅可當洒掃應對進退之末而本之則無然則知本斯可謂知禮此正夫子所以大林放之問而未可以子夏之論小之也且子游吳人也太伯端委以治周禮其源流有自來矣而况講習於洙泗之間巍然在四科之列武城弦歌之風回視斷髮文身羸以爲飾者其氣象果何如故子游之言

曰直情徑行者戎狄之道也禮道則不然品節斯湏之謂禮嗚呼一日無禮則淪入於夷狄甚可懼也故始之創祠知禮也後之遷祠廢禮也今王君大修學宮祠先賢而教養其後裔於是乎能復禮而言氏子孫藏修其間者又能夙夜服習則禮之興也其庶矣乎傳曰禮不明則上下昏何以長世然則斯舉也於國祚亦有關焉是不可以無述廼爲之書嘉熙改元四月癸未朝散大夫試中書舍人賜紫金魚袋表甫記

役

歸政鄉義役記

役以義名美意也古者百里有宰比衆寡治政令實惟下士不爲居之榮人仰之且尊厥後井牧廢官爲限田之豐嗇而別貴

賤定賦之登降而等貧富量役之久近而均勞佚法猶去古未遠自豪民挾詐猾吏舞文寄名竄籍並緣爲奸一經代更百計規免事力雄者以役近告歲月遠者以產簿辭課訐粉然互角已勝甚而閭門不相愛宗族不遑恤况鄰里鄉黨乎且役非不義而民至不樂爲如避讎怨吁可嘆已雖然其來有繇也里有水火盜賊之變上於正縣有供億科配之煩下於正正一身尸數責力且弗逮其費可知視昔豈不戛乎難哉吾里正久闕人往往坐此將領葛君號鄉望族慨然倡爲義役甚盛舉也於是載盟凡一十七人得田四百三十有八畝歲計所收三百斛捐產者計其貲受輸者董其事以歲之入贍歲之費使里無闕政家無失業人無競心行之當時而公施之後日而便蓋一舉而

美具抑義矣夫廼移書於攀爲我誌之攀聞而喜曰舍傍有此
義事是烏可亡紀竊惟天下之事難於成而易於毀興於暫而
隳於久勢使然也矧在令甲助役雖聽民便一有詞焉法即沮
格葛君行及瓜茲役成義達于鄉伊經始之力若夫期之悠久
可行又在乎同盟相與維持勿替初意葛君名觀字利用云嘉
定三年二月初二日朝奉郎監登聞鼓院張攀記

義役記

孟子曰仁政必自經界始斯言也爲分田制祿言之也後世經
界不正利害所關抑有出於井地不均穀祿不平之外者非役法
云乎哉古者地有上中下之分而可任也者以是爲差又家毋
過一人歲不過三日是故力役公而民不憚司徒之職廢大東

之詩作役之病民也久矣蓋自經界紊而兼并興於是乎產有
貧富力有強弱長民者惟知役民之力以奉乎己不知計民之
產以均其役富者強者徃徃幸免而貧且弱者莫或遑息仁政
吾不得而見之矣若義役之利力公於衆而不弊於偏事定於
豫而不失之驟行之以不忍人之心其庶乎然非接乎經界之
後則貧富之不失其平而強弱之莫究其實雖欲行之不可得
已平江爲東南會府常熟爲平江壯邑物衆地大吏黠賦殷政
以是厖山陰王君始至會郡太守右文殿修撰張公嗣古取嘉
定經界成例盼諸邑君以未施信於民難之越明年乃始奉命
釐其舊而新是圖旣巨室無詭寄之欺小民無抑納之患貧富
弱強瞭然在自乃遠稽乾道之詔近述寶慶之旨都爲義役奉

遠尊以倡其始諭比屋而和其衷傭間民之無職事者以服其
役役之大者曰保正以式法受政令而賦于下役之小者曰苗
長稅長視歲時之宜督租稅以奉其上保正則歲一人及除而
代苗稅長則歲各二人或一人其都之甚大者什之率義田以
供役之費建義莊以儲田之入田有砧基莊有規約選屬都之
賢者能者曰措置以提其綱曰機察以糾其弊稽凡費之入于
邑者幾何而使吏不得縱給凡田之係于板帳者幾何而使官
不得逞貴戚之家毋以聲勢免佛老之役毋以香火辭產業所
隸毋得以室廬而占護經始於端平丙申之四月竣事於嘉熙
丁酉之仲夏合縣之都凡五十田以畝計凡四萬九千五百九
十有奇地以畝計凡九百二十有奇歲入米麥以石計凡二萬



四千九百九十有奇又贏田八百餘畝歲入米六百餘石積之
慧日寺屬之寓公以補歉歲之不足而猶以爲未也斟酌畝役
之久近權衡物力之低昂斷自丁酉年次第其役之先後十載
上于臺若府又轉而聞于朝勅書尋下以君修復經界義役職
事修舉特贈秩于旌異仍下臺府及縣永遠遵守且申嚴黠吏
斲民破壞之禁於是君之成規可以永保而惠斯邑者因漸被
於無窮矣君旣繇縣最進轄帑事以書訪余漫塘上曰願有述
余自杜門經紀一二義役於先墓所多歷年而始潰于成閱君
所示二編蓋事集於朞月之間利周於百里之廣然後知余智
之不逮也又張公與余同年繼張公者煥章閣待制王公遂與
余同里皆重所許可而第屬令以君稱首余故喜爲之書抑余

聞之經界之與義役可以相因而行亦易以相因而廢異時經界不正而驟止之君固懼其難經界之正未幾而義役之事繼舉有不爲一爲而二利以興王君殆知所先後者歟其自于今思義役之成之難而敗之易盍亦反其本矣否則吏斲或售牒訴紛如經界壞而義役隨之是田在官者不可復而役之病民者且如故吾爲此懼於十年乎何居雖然其或繼王君者百世可知也君名燭字伯晦登庚辰進士第今官承議郎提轄行在左藏東西庫云嘉熙二年正月旣望朝散郎直顯謨閣王管成都府王局觀劉宰記

常熟縣端平經界記

淞右多大縣常熟田賦殆與他小郡等紹興經界迨今未百年

舊額僅存籍之在官者漫不可攷胥吏餒口腹養妻子其間朝竄暮易蠹弊百出田而不賦者有之賦而無田者有之重以濱江水嚙與夫抵罪而没于宅司者日侵月廣故昔之田以畝計者二百三十一萬爲苗七萬二百石爲稅若和買錢九萬四千緡今督于官者僅三之二而又多取之白納取之斛面取之點合利擅豪貴細戶禁抑莫訴下困上迫令率以不善去來者睨不敢前端平初元秋八月王君燭實領是邑間民疾苦皆愀然感頰以賦役不均告會府檄修復經界王君深念之曰籍壤滋久新之實宜矧上有命何敢不力顧余始至民志未孚懼弗從也弗從而強之則舛矣乃搜剔宿蠹蠲弛苛斂孜孜凭按日與父老相唯阿于庭居數月信浹意親民相與語令字我非厲我

者王君聞之喜曰可以就茲役矣於是攷舊額選衆役按紹興成法參以朱文公漳州所著條目隨土俗損益之銀式以徇禮鄉都之受役者詳爲開說俾之通曉無疑然後出令爲期衆皆歡然率田若地標氏名畝步于膝間驗其實者因而書之否則量而會之準紹興成數一無求贏者闢地爲田以田爲地者書實業昔之逋賦匿契與詭挾之弊釋勿問而申禁其不悛者常平田安邊田學田圭田與沒官之田別爲籍文書之費悉從官給士民之赴期會以僕隸者聽鄉井間吏一跡不到也由是官民一家小大競勸如順子弟之與父兄不待督而從縣五十都都十保其履畝而書也保次其號爲覈田簿號模其形爲魚鱗圖而又稗官民產業于保爲類姓簿類都保鄉于縣爲物力簿



經始於端平二年之夏訖事於是年之冬圖籍既定則又均其折色之偏重者蠲其征繇之加斂者裁定其田與賦高下之不均者通一縣之田計二百四十萬畝有奇除二十萬爲官田賦入隸諸司餘民田得苗六萬六千二百石有奇稅折錢九萬三千三百緡有奇載諸戶版垣然明白民以實產受常賦爲砧基簿印于縣而藏之家有出入則執諸有司書之強無幸免弱無重困雖惇發幼孤皆知其自有之業與當輸之賦污吏猾胥不得加尺寸升合以擾之其視前之紛錯厖乱若改邑而祭殊之也於是常熟始以佳地稱於浙右他大郡莫儷焉向之睨不敢前者將競趨之唯恐後矣王君以書來求誌曰爚不避冒領巖邑而又舉此重繁之務幸邑人不我貳相與叶力以躋于成授

代有期皆邑人之賜也扶植之俾勿壞為邑人他日賜於無窮者不賴後之人猶之水也澄而清之雖難撓而濁之易耳吾懼其弗永于清將復為民病也願子與我誌之以告來者余曩嘗督斯役于烏傷矣畝量步會閱三歲而後成旁視他邑猶有窘步其後者今君成百年之曠於數月之間上下帖然相安若未嘗有所興作者余固不足以語其能也鄭子產非能者耶其始執政也民怨其伍我田疇謗讟並興遲以三年而復頌歌之君乃致速若是方且切切焉引慮却顧為經久之圖以利斯邑然則君其可謂能而仁矣余何敢不為邑人志之繼自今令之來斯邑也按斯籍也披斯圖也毋玩其成而易之也毋耻於隨而焚之也毋付之吏手而蠹毀決壞之也則官無虧賦民無橫輸

上佚下熙俾常熟永為淞右佳地而焜耀言游舊里於千載之下顧不休哉君少登儒科有志當世施於邑政寬猛有則不震不悚載籍頓清迺創義役以息訟修廟學以明教一邑之內百廢具舉耳目煥新蓋疾病既去精神必復衣冠儼然可整也然吾聞賦役之不均者十邑而九今有意于民求君之所以易于成者倣行之則是役不患其難百姓庶乎有瘳矣然則予之誌也豈徒為常熟邑人而已哉嘉熙二年秋八月朝奉郎右文殿修撰新知寧國府杜範記

宣風樓記

樓以宣風名紀政也易於異其象為風其位為東南其時為長養萬物有虞氏得之以阜民財於是有薰兮之歌尹吉甫得之

以美大臣於是有穆如之誦罪無輕重功無小大使言偃弦歌
之化當太平有道之國雍雍乎和可知矣常熟古南沙也今爲
姑蘇望邑土博賦行民繁事劇縮銅章者每難其人紹興之二
十年政五六易規矩準繩莫一所守冬十有二月乙卯今曾大
夫以王命來智足以知勇足以行御史如西門之治鄴愛民如
子產之治鄭指顧之間政以善聞邑人宜之凡廢未舉斬一新
焉先是直縣治之坤隅民居有架崇庑於上其左蓋闕如也相
其陰陽厥有低昂非有對治之勢爲未寧士庶雅有創樓議矣
至是以請大夫曰止止吾至未幾遑急爾耶衆曰我食我力我
木我石無費于公以慰我私大夫奚以辭爲乃命卜筮乃經乃
理乃徹其庫乃圮其址巧者環斧壯者攢杵無煩貳約其來不

可禦也蓋庑材於二十一年之夏四月至五月己巳工以畢告
近遠少長奔走瞻望惟時歎暑泠泠之風自橋而下咸用忻快
迺有皤皤然被黃髮者歌而過田風之仁兮物之春兮風之德
兮物之殖兮誰其布宣大夫賢兮繫大夫賢樂堯天兮衆鼓舞
和之因撫其辭以名斯樓且告鄉人王伯廣請文于石以係他
日甘棠之思者大夫名構字叔重清源人大丞相宣靖魯國公
魯孫其爲政蓋有家法云

大唐蘇州新開常熟塘碑銘并序

吳之藪曰具區郡之大惟蘇州商爲貨居農實邦本錫貢多品
厥田上中土宜在民地利手水常熟塘按圖經云南北之路自
城而遙百有餘里旁引湖水下通江潮支連脈分近委遐輸左

右惟强家大族疇接壤制動涉千頃年登萬箱豈伊汾沂之功

灌溉之利故縣取常熟歲無青焉泊貞元以來時屬大旱

繇是填淤荐為塗泥而淪胥怨咨殖物痛矣郡守隴西李王

居中字人原始覩弊則曰在穿導之遂聞於本道廉使吏部尚

書韓公公秉文惟 德惠人發 為適觀風悅隨人無間言

言我得從政攝令吳縣王簿李仲方稟其成規請事䟽鑿於是

參井邑之役則經費其力而長洲當三之一焉縣宰李暎復善

供命乃計功量日候隙庀徒為利涉之宜菽反壤之害詢蓄洩

之勢增遠近之防人不告勞事為永逸先期而望表繩直不日

而終朝子來塘開地中 泉土山澤作氣江湖發源積為長

流實自新淞舟楫鱗集農商景從春秋有施水旱斯備嗟乎塘

之堙鬱也久矣何壅之無慮而啓之有時非體仁弘多應用高

朗曷以越前所未暇逮今而行其志哉則史之決渠書之滌源

以流其惡 彼稻田況山川襟帶之廣林鹽沃饒之資規同九

州殷列七縣其提封底績固良二千石之 惟 敏於直方

精在損益為信安未半歲而吳郡餘一年焉政猶風行惠與時

至文學脩令清 豐財五行因之順下致理之實不

其偉歟去歲朱方構患而郡邑連陷公毆白徒以捍狂寇挺拔

凶黨修復城池皇帝聞而嘉之俾金章 給誥垂美必將

大闡王度紹休朝廷豈惟 分憂是塘之為政也彼人士以

允文在公之守備詳其事請刻于石庶祠之可復銘曰 瞻彼

塘矣昔之所闢物利乘舟土膏其澤歲有堙塞時罔䟽滌誰為

澄流變為廣瀉降是良牧猗歟隴西揆日爰鑿經旬洞開湖水
南迤江源北來旁分溝洫潛畜風雷政可施利役無勞止力均
二邑功逾百里舟楫攸往田疇所視義實通方智俾經始濬自
高岸豈云隨山人歡在路魚樂于泉伊此化遠矧夫事宣立石
川上維無窮焉元和四年一月十八日將仕郎前左威衛錄事
參軍劉允文撰

常熟重開支川記

天地間物之利於人者水為大濬畎距川治遂達澮等級繩繩
聖人為利民計其詳如此後代因之河渠有書溝洫有志咸以
利舟楫沃膏腴有不可一日廢者漸居東南隘水踰于地引以
為田厥土衍沃姑蘇產甲兩淞枝邑常熟復甲姑蘇即名可知已

有湖昆承江浦發源也分為支川橫實于中挾呂東鷺周涇團
塘白茆浦李王涇咸匯焉南渡前居毗占冒脈絡弗宣乾弗克
瀦溢弗克洩為眈晦大棘百數十年間鄉耆豪右咸思開治竟
怵異議淳祐癸卯陶唐侯升班過里憫然嘆曰是川與諸涇交
會為湖海喉衿田里命脉湮閼破絕乃尔詎可因循顧忌憚於
疏鑿俾穡夫束手無計乎爰咨于衆髦倪貴賤聞言曲踊謂非
侯不可於是揆延袤眈窳隆準事物經始于甲辰中春之七日
弗抑弗彊群農至因地順勢塹高隄下一指顧頃荷鍤雲如
鼓袂風動侯表衆勞來飲饁腆嘉咸勇于力甫一月竣事長四
千尋廣一丈深倍廣之數凡用工六千糜泉粟若干侯以為已
任而營綜之曩据川之址靳弗退聽者侯一不校割已產迂道

代之繇是醜引泉流灌輸千頃堰岸雄固遠邇混融遂為海峽
永永利自非侯材幹公敏襟宇恢拓疇克有成矧此川西北有
鳳皇涇者侯之高祖名節朝請府君故廬也二子曰擴曰振聯
危科躋膺仕蟬媽弗絕淳熙間其孫天台史君之嫌以祖母言
宜人丘壠在焉念河道壅淤銳於疏導不果逮公凡三世先是
學竺乾氏者將浚長涇有老力止曰時法未可三十年後自
有地位中人來辨君子謂茲舉嗣先志侈後基孚衆願三者備
矣是役也樂於欣助者三蘭若明因褒親永福是皆可書呂
詔于後庶千載間弗至陵塞侯名察字任道府君五代孫也今
為通直郎舒城邑大夫淳祐己酉孟春滄洲程公許記

常熟新建順民倉記

治平二年河內向侯作新倉成嘗語予其始終曰吾至之初見
太守潁川陳侯席未煖陳侯曰常熟大縣也考其民版之數至
四萬戶歲輸之粟至八萬石有倉汙庳迫窄纔容四分之一濱
江之民遠者百里水浮陸走相載而至倉或既盈則累數夕
而不能輸輸于州又病其遠此一不便職是歲常散蓄于浮屠
之居廊廡皆滿蓋藏弗謹塗墜弗完得無有以誨盜哉此二不
便蓋遲君之來也久矣君其圖之吾退而自惟倉廩蓋今天下
郡縣之先務京師兵儲祿廩之出入一皆仰給於東南蘇又為
東南之劇歲入之粟侘郡莫加厚焉吾邑雖不腆其敢後其所
先務耶矧其弊又如此宜陳侯有以告吾也及吾視事之日見
吏民間其故尤為不便者凡幾然而獻計者又不出陳侯之議

也於是訪縣之北得隙地數十畝以營築焉始召民而諭其所
以作之之意民既病此而已久莫不奔走以聽命咸願治材于
家請期日合而成之既而至期倉遂以成予謂二侯皆能以材
名于世所至莫不著見風迹至興利去害便民皆其所素蓄沛
然而有餘夫以沛然有餘之材相與叶謀治其因民願欲之役
故其成也宜不勞而功多其榜曰順民蓋得之矣若夫世之從
政者利害較然居前畏謗忌讒認認然不肯一日出其力則又
諉曰愛民斯不遠哉夫愛民莫如古人古之人有為豈天作地
生斯亦出於民而已耳姑視利害如之何豈顧可為而不為延
曰愛民哉此大不然昔者子產嘗以乘輿濟人溱洧孟子謂之
惠而不知為政凡以此也而侯亦以予言為然因刻之于石碑

來者有考云時熙寧元年三月十一日將仕郎前守沂州臨沂
令郎淑記

顧逕左軍記

姑蘇之東枕江而戍者曰許浦許浦之東百有餘里港與浦應
而險阨逾之者曰顧逕寶慶元年十一月陞顧逕為許浦左軍
從都統吳公英之請也國家駐驛吳會與六朝都壤不同其備
禦亦異隨勢緩急非豪傑稔於世故者不足以知之議者沮曰
守江至於許浦則無復遺策也不知藩牆門屏迭護堂奧愈切
愈密故由秣陵而視則淮為急而大江次之由錢塘而觀則江
為急而長淮次之矧江會于海而海道所通者其經涉最廣今
日之事備江所以備海也詎宜畧哉公之言曰顧逕與黃魚塚

相望轉料角越沙窖迤邐抵山東海界此實咽喉之地今但差
兵探望動息而已卒有警急何以制之遂上建屯之策請條陳
利害指述便宜皆灼然實意夫許浦置樓船之師自節使馮公
湛移部定海距今七十年矣而顧逕止爲斥候之地聚尖底艍
留甲士五百則淳熙間陳緒擒王駱所肇建也其後增五百人
以正將涖之又增千人以統領轄之雖續有建明然率半歲而
更脩去忽來僑處而戍散居露止卒非服習器非便利雖得地
形而人無固志甚失漢人兵體三章之要公請始募諳海道之
人視舊戍倍增其數使二千人爲正五百人爲奇正者皆閩浙
猛毅舟用巨艦蔽日屯雲屹若喬嶽縱有衝突蟠踞不動奇者
皆東廣驍銳舟用多槳厲波溯濤疾若飄風平視渺茫出沒疑

神又翼之以引強蹶張之技濟之以火攻水戰之具朝訓夕練
巖若對壘而器與人旣精矣創新寨二千屋裨校有麻毬射有
場易更戍以就屯人得安處損道頓之勞忘室家之念而人與
地始相得焉是宜朝旨賜俞璽寶加獎而卒底厥績也初公爲
蘄黃之役帥舟師西邁虜聞風宵遁餘黨勦平統制張裕亦與
有勞至是舉裕爲左軍統制委以經理未幾權改中軍士志悅
附戎政修整兩屯相望精卒逾萬熊踞虎視雄于江許焉余嘗
竊觀國史謂長江之險雖敵我共之而一善用其險者勢固在
我而不在敵也方逆兇渝盟襲劉豫故計大治戰艘欲睥睨海
湖高廟赫然震怒召李寶授以北討之畧由許浦進發卒奏膠
西之捷然則備禦之與進取固非二途也今許浦旣宿重兵而

得顧逕爲之持角以公之忠亮沉鷲奪其威畧直搗犬羊之穴
迅掃鯨鯢之根奇勳偉績將有出於竹帛所不能載者皆郁超
知謝元於履屐之材各得其任因料淮淝之功必成余頃簿領
定海公適主定海軍見其度策揆謀動中機要余固心服之矣
今將吏以置軍本末來諭子方斯公異日而欲自附於知言者
故樂爲之書紹定三年七月既望奉議郎新通判信州兼管內
勸農營田事戴栩記

琴川志卷第十二

琴川志卷第十三
道

虞山招真治碑

梁昭明太子製

夫東瀛涿水三變得田西嶽靈桃千年未子尚以星起牽牛部
首迢遞律生甲子氣數杳冥况復上遊玉清損之又損高排金
闕玄之又玄豈言象之能詮非時節之所辯海虞縣者則虞農
都尉太康置其宰境有虞山越絕書云巫咸之所出也高崑鬱
起帶青雲而作峯瀑水懸流雜天河而俱會吳門採藥之地楚
望槐椒之歌湯反流沙之魂錦飾汾陰之鼎無以諭焉其峯則
有石城石門虛峴自然不度句吳之馬神功挺起豈似峒陵之
畫魏后冰城夜陣權息長安慈石浴鐵暫流較跡比期優劣斯

遠道士沛郡張君諱道裕字弘真卽漢朝天師陵十二代孫天
監二年來至此岫道十有餘載夜忽夢見聖祖云峯下之地面
勢閑寂宜立館宇可以卜居裕師潘洪隱始寧四明山無何有
人耳長髮短云從虞山招真治來言訖忽然不見潘馳信報君
君因辭山舊居而以夢中所指峯下之地卽以爲治故號招真
高臺迴立有類玉臺之山長廊宛轉還如步廊之岫柱削芳桂
豈俟開陽木飛材選海檀無勞豫章神拔黃庭司命之府有類
玲瓏朱陵赤后之觀同符弘敞遠望仲雍則高墳蕭瑟旁臨齊
女則哀壠蒼茫鱗尋十仞之木氣叶星晷華飛五香之草形圖
宮室帷葉綬花卷舒蹊逕陽桃侯棗榮落岩崖樹息金烏簷依
銀鳥鳳將九子應吹能歌鶴生七歲逐節成舞旭日晨臨同迎

若華之色夕陽斜影俱承拂鏡之暉玉礎微潤應山雲於高牖
鳴籟徐響引和風於空谷方當專氣致柔入無爲之境周行不
殆窮混成之致茅子筭歸輟轡無已魏姬宴罷留駕不歸何止
持節變淮南之金傳符蔣北鍾之稻明月蛟龍之騎驅之使闢
四銖七子之鏡引以成刀散季齊之羽起雄鳴之霧而已哉乃
爲銘曰

玉龜二始金書八會道浹地心功浮天外故常可小惟真
能大德起同塵善生塞兌物寶自然入符交泰掩映綠蘿
穹崇紫蓋仙治之美此焉爲最雄柱千步陽臺百丈水均
下屬山逾高掌野寂雲興琴繁山響斗虹夕西豐雷朝上
元陽作石竹龍成杖書藏玉匣藥蘊銀銅燒鈆雜鯉折桂

和葱羽衣可服雲駢易通芥柯雖朽碑石無窮

乾元宮新建紫微殿記

粵夫璿霄肇覆神明於是位焉生齒賦形禍福由茲職矣雖無
方而可驗豁爾杳冥暨有感以咸伸幾乎影響所以吉凶可見
陰隲下民俾列像以惟嚴庶舒衷而有自必也敬之珍館儼彼
粹儀貴觀相以善萌必應期而福介者也常熟縣乾元宮者即
梁天監二年之所建也誌石詳焉星籙遷繇基址髣髴頽墮腐
桷鼠鏽蠹耕春草秋蓬蟲營蛇據唯三清前殿巋然僅存丁潦
東之始歸尚嗟如故秦武陵之再訪堪嘆無覩宮之執事者目
茲圯壞若炙于心歎檀信之門莫有不移之諾顧寂寥之跡彌
堅如在之恭徒懷必葺之勤豈逮布新之力有日即今縣尹司

田外郎胡公晏因得鳴絃之暇來訪祈靈之場憩繁樾以釋煩
陟層臺而瞰迴叢峯筍拔碧藏日暮之雲暗溜枝分雅雜風中
之弄俯視熬波之海旁窺曳練之門清音一來俗態俱去而乃
環顧隳址爰發善因謂其道衆曰前之尊殿雖繪塑靡完而瞻
仰不怠宮之所闕者惟北極殿焉今則欲議隆興須求幹集乃
召監宮崇虛大師李維簡令以常住田園歲之入者權其所羨
聚而營之所以上贊瑤圖下福氓隸者也於是材積梗桷匠求
鄔郢界基礎直面勢箕張暨消吉以上梁忽中程而授夢絳衣
戩弁依稀對仙介之容辨色遲明煒燁獲靈芝之瑞雖成邃宇
尚闕靈儀忽本邑南沙有編戶張及者夙植善緣早承儒訓謂
月規之寶相既久藏家仰雲屋之重椽猶虛正座願心彌確喜

捨不回然勝事之欲彰抑冥契之所會是以具威儀而交錯抵鄉墅以前迎屬以盾日輝威箕風瘁物芳疇雨絕徒勞御史之巡軒積派塵生更擁宓神之渡戰衆心猶豫以方切一夕滂沱而不期玉女電鮮方對東皇之笑阿香雷響豈必南山之聲翌日涸澤皆涵方舟修濟暨迎奉既旋於震邑而宵晨連霈於畢霖年瑞有期食天無爽得不謂群誠仰屬而冥貺昭格者也故使邑人目一勝事遞口成響家率戶辦猶恐居後及縣尹司田首塑本命星官一尊逮殿主潘惟信勸化衆戶各塑星神侍從一尊以實其殿也衣冠濟濟金碧煌煌真從翼分宛同於星拱檀龕寶錯若狀於帝車復有本邑歸政鄉陸杲捨錢五萬爲砌階之資刻玉鏤瓊鄙陶侃之運甓峻基宏址得給孤之布金且

觀夫使人爲善司田之始謀也絜已集事殿主之化緣也今也民易化緣易成政在其中矣豈不由善教所被而道心自然耶忽日殿主自常熟來蕪城訪予閑居語其建殿之始末懇以鄙文見須既不獲遜乃直書其事以誌歲時爾皇宋天聖四年五月二十一日朝奉郎檢校尚書考功員外郎充潁州團練副使上柱國馬莊記

乾元宮興造記

姑蘇之北有大邑焉曰常熟山長而水遠泉甘而土肥民富物庶人樂其業予嘗縱遊觀覽勝地遂登虞山之巔臨尚湖之濱得乾岡之勢重山複嶺松竹交映隆然祠宇金碧相照躊躇四顧恍若洞府適有人焉黃冠而羽衣紅顏而鸞髮杖藜倚梧謂

予曰昔漢之天師張君道陵之孫凡十有二代曰道裕修真之地也鍊丹於此積功飛昇靈跡宛然至梁天監中始建是宮遂號乾元歲月綿遠棟宇欹側榛蕪湮沒荒廢寔久吾嘉禾人也生七歲出家學道于崇福宮年十二試經業預選爲道士後三年習醫術將以救人之疾苦二十有五乃遊名山尋勝境慶曆中過姑蘇至邑下慨然有卜居之志至和之初都官員外郎桑君澥出宰是邑因命住特然宮之廊廡皆圮獨三清殿僅存梁棟顛危不可支持吾方以醫術濟衆人皆以金帛施之哀其醜設之美餘田園之所積增修大殿及遊巡二十有四間軒廡十有六楹嘉祐郡人試將作監主簿曹君仲言施錢二百萬塑三清聖像及真人十有五軀吾復建北極殿于北列道院于東治

平元年起三門及東西廡各五間二年造三門之東軒凡三間三年造三門之西軒凡三間次第創立艱難僅成豈一日之力哉自是宮宇復全壯麗輪奐邑人得以歲時祈福焉吾嘗於熙寧閒建崇道宮於秀州修太和宮於蘇州興造常熟僧尼寺三所大橋四所立夫菟廟于縣之西立句踐廟于縣之北至於一邑之橋梁街道以便人之往來者莫不興修焉時或施與以濟貧民蓋不可盡記吾今老矣得以優遊山林以盡其天年何其幸耶予壯其言乃知興造之本末因問其姓氏曰姓李氏名則正蒙恩賜紫衣今年八十三歲矣是宮也李君之功爲多自非有志於道經營矧制不憚其勞安能若是哉因以書之告諸後人崇寧五年歲次丙戌正月望日吳郡沈炯記

乾元宮半山亭記

公豫嘗聞怪力亂神先聖所不語然天下之事涉於幽怪恍惚之閒若不可信苟利於人者又惡得不信而錄之歲在壬戌公豫假守當塗秋八月閱訟牒次有吉明起不書一字若今所謂投白紙就而詰之乃琴川北門劉莊備奔走之隸附口以書其大略今年四月七日因賭博輸敗羞見妻子遂往虞山乾元宮後自經於叢木繩斷墜地昏迷之際若覩神人衣朱衣美鬚髯叱云宮路衝縣治將不利於寓公汝可往太平州白郡守趙大卿於山路中閒築基初亭仍書官銜以鎮之明起既甦甚惑焉且素不識大卿顏面其何敢前至七月因家人染疾復覩神人責問曰汝何為不行明起遽應曰諾妻子親戚皆不知之密訪

道里遠近稱貸裹糧遂至庭下可否唯命公豫竊謂神者人之依也安敢少有慢心且常熟士夫林藪俱不以告而不遠千里獨以見囑者是豈無意歟詳觀吉生一愚夫爾似非有覬覦乃厚遣而歸仍諭幹者度材鳩工涓日建造深惟山路填壘基址費力適諸姪在家為董其事吉生亦絕跡不至閱三月畢所費約千緡公豫次年冬丐祠得歸甲子之春嘗一登陟規撫適中左右顧瞻心目開豁携杖山閒者亦得以少憩意其必可悠久已囑宮中時加檢括損即隨葺知宮王冲一又植松萬餘株前後掩映共為不朽然向之所見朱衣而多髯者竟不知其為何神也姑為書其本末云開禧元年歲次乙丑四月吉日中大夫充集英殿修撰提舉建寧府武夷山冲佑觀祥符縣開國男食

邑三百戶賜紫金魚袋趙公豫記

招真庵記

自姑蘇出齊門泐西北望山形如巨鰲橫巨原野蓋常熟縣之海虞山也山之東瞰萬戶治劇邑邑去江不及程陂湖畎澮之積自南至者傾馳會于江江河既應則迅瀾倒流逆于市橋之下二水相制移時而不能去山無奇谷惟荒墟白草醜石散亂坡陀迤邐而西有脩林橫抹隱見于兩峯之間其中為招真庵元祐中道人姓申氏泰陵徐處士高弟也基營于此嘗語人曰吾求為後人計庵成亟去不知所終松竹森茂庭宇簡寂如隱君子之居通川道士喻抱元增治之而介特有守勵其徒嚴闡其業供施不求而至庵去平地無五百弓而步虛鐘磬之音時

從雲霄閒來凡聞之者知其為練形學仙之徒旦勤而暮勉也舊名竹林抱元更以招真其有意乎抱元請記于僕乃歌招真之辭以系之庶幾異時屢滿戶外僕亦有緣其間也其辭曰

白鸞巢兮丹井空蓬山香兮煙靄濛濛陵谷變兮今古木葉下兮秋風飛僊去兮朝太微黃冠野服兮以遨以嬉餐霞卧月兮世不我違與世滌殃兮天門可馳蒼龍嗥兮雲漫扉石泉冽兮山芋肥俯仰宇宙兮日月蔽虧靈秀回薄兮野芳呈姿山中之樂兮萬化莫移仙人不來兮隱者曷歸紹興丁卯歲仲春前二日中嶽康舉之記

釋

寶嚴院新建佛殿記

近代儒家流以韓退之擠釋老賢與不賢皆欲隨而去之未熟
思之甚矣夫受天命者莫大於君中國其閒哲后辟王治亂興
亡之運接迹而不可勝數至於治而興者則諸儒必曰非人事
也天之曆數輔治世而興者也亂而亡者則諸儒亦曰非人事
也天之曆數厭亂德而亡者也夫如是則治亂興亡之運莫不
推之於天韓退之有唐之鉅儒也以堯舜禹湯文武周孔之道
不行於當世而釋氏之教獨盛於中國故力排而擠之若原道
篇佛骨表皆著辭深切痛疾時君奉之太過者也其所以然者
誠欲抑之揀其寔盛未始不為釋氏福殆弗納而黜之彼得益
其惑遂有會昌之旤豈非道隆則汙物盛則衰之效歟天意若
曰蠹中國害生民則使大中履會昌之迹如韓文公之比者佐

而輔之固當拔本塞源矣豈會昌廢之未數年而大中復之易
如走丸疾如反掌得非天之未厭其教哉噫大道喪而有仁義
仁義衰而尚權詐故堯舜禹湯文武周孔之道塞於時雜於霸
金僊氏之說其有不興乎由是源於漢流於魏波於晉宋齊梁
閒與吾儒老子之教鼎峙於中國若夫本空寂破迷妄以出生
入死之說為興善滅惡之筌蚩蚩之氓從而遠罪則如來真意
深乎救世者也而時君奉之或多立寺宇以徼福或廣度僧尼
以崇教上焉者佞之下焉者化之如之何不為後世弊蓋崇之
者反於其道耳文中子曰齋戒修而梁國亡非釋迦之罪此誠
得之我國家四聖御寓燭知化源寺觀泐舊而存率禁其初置
僧道限年而入必試以行能故天下名山勝槩或有所旌異者

非道存乎人孰能與於此哉姑蘇北走有邑曰常熟邑之西偏有佛宇曰寶嚴卽梁天監中所建也倚山面湖繡若屏幃嘗有希辯禪師者心悟大乘是焉棲處錢氏霸國時以名聞召歸餘杭普門寺目爲慧智禪師及錢氏獻土隨召請見賜紫方袍號曰慧明大師繼時厭居京國歸隱舊刹錢氏以師入境俱勝復施金五百兩建七級浮圖一所淳化中太宗皇帝召賜急就章逍遙詠祕藏詮太平聖惠方凡一百四十三卷獎高風旌善地也院舊名延福天禧中邑尹胡公順之飛章上請帝可其奏改賜今額焉院有佛殿者積其歲月了無尺椽明道中武陵龔顯始發信心崇修妙果次有東京禪慧院僧清鑒浮杯至止苦行自修謀茲勝緣有若符合復有邑人諸葛頓李仁壽樊福僉悅

所聞贊成其事且曰仁祠之興爲我福地今紺宇不立粹容無覩則吾儕何所起信哉由是捐厚施買良材兀徒僦工審曲面勢卽其舊址隆以新創經始於景祐之丙子落成於慶曆之乙酉凡數年而能事畢矣觀其壯而不華嚴而不陋巍乎中者其宇一所以納高廣之座而宅乎毫相也翼其旁者其舍二所以容儀衛之位而列乎寶供也遠而望之若太微之凝帝宇聳在雲端迫而察之猶列漢之立僊宮來從方外其爲功德殊勝可思議哉武陵公帑無多藏屋無餘潤獨以興弊補廢皇皇於佛事人所難能矣若夫辯師興之前鑒公繼之後事有冥契豈誣也哉絳里人也因熟於茲山之遊目擊諸公之善以文見記得以直書時聖宋慶曆六年歲在閏茂王正月一日將仕郎守真

州楊子縣令陸絳記

勝法禪寺新十方記

天以一氣生萬物故散而為四時儒以一道成萬民故散而為五教釋氏以一法通萬行故散而為禪律要其歸去邪以從正避惡而趨善此其大約也若夫道根乎心理源乎性則在此不在彼吾知其禪耶律耶是亦名焉而已矣勝法寺唐元和中閻將軍捐已宅而為之處邑境之隅直闔闔之北山岡環然林木秀出凡居人信施之歸目之福地先是其徒星居謂之律寺至和初有寺僧以稔惡刃人於其閒敗焉致之于理邑宰中都桑公病其他習以為常始議十方之名請更于郡郡守大卿呂公然其為即符于邑從民欲也會今長老深公脫屣潤之甘露棲

止于蘇二公協心命以交疏一之日重門洞然二之日群居埽然法堂中巖繚垣外固雲集方來之侶日熏香積之供里人聚而瞻之曰昔狡宄而今道場昔濁流而今淨土茲可尚矣異日燈燈相繼源源不絕則以深公為之首也非夫道韻之優業履之峻上以贊廟社延鴻之慶次以資郡邑順成之福均是法雨露吾義鄉則後之視今亦猶今之視昔云爾時嘉祐三年九月十九日承奉郎守尚書屯田員外郎知開封府雍丘縣同簽署兵馬司公事騎都尉借緋陸絳記

東靈寺天台教院莊田記

壽聖東靈寺天台教院者肇修於熙寧六年涉二紀而告備焉基自講師光瑞而成於今閣黎梵崇佛舍中巖講室後邃齋宿

之房庖福之宇布列兩序代有名人四遠學徒聞風而至者無慮百數歲比不登邑民艱食崇師患無以贍學徒則每推施利之應已有者悉歸之衆猶不能給也然而人皆知崇師之能導矣於是僧道賢率諸檀信等買田二百一十畝永為常住供崇師感檀越之厚施也則欲鐫石刻其名銜而屬予為之記予謂吾儒言人情者聖王之田而以修禮陳義講學本仁為耕耨播殖之諭至於佛說福田亦不過種諸善根而已合而言之其理一也夫方寸之地人皆有之果能竭精進之力以致穠蔭芟欲惡之萌以絕荏葦則信善之生焉可已也充信善之心無施而不可則所以為利益者廣矣且衆生以愛故入生死由於愛境有逆有順而生喜怒造種種業則所謂情田福田者於此荒蕪

矣展轉六趣至千萬劫本所從來惟有一愛更無餘病佛大醫王對病為藥唯有一捨更無餘藥常以此藥而治此病如水救火應手當滅故當世導師必破人愛欲之萌而起人喜捨之意使之皆知情田福田之說而內自得焉則彼區區在外者何足靳耶况夫檀則能施而越則能度生死是諸檀越充信善之心以捨施則將絕愛境而脫生死矣予故言情田福田之利益而歸之於導師之救病也大觀二年九月旦日吳郡陸徽之撰

勝法寺轉輪藏

佛法自漢入中國即與其言皆來然未嘗若是侈也至晉宋周隋之閒鳩摩羅什之徒出更相傳譯轉相付授於是其書之至者日以廣源流既遠往往失其本梁武帝時始有言心灑者一

切以洞然無我為宗不立文字佛氏之學遂判為禪律兩歧其
後更數百年學心法者雖益盛然其書未嘗卒廢自隋開皇至
唐開元正元以來凡列於目者曰大乘小乘曰律曰論部分甲
乙鱗次櫛比雖假託疑似謬妄之辭苟不叛其說亦莫不具在
其傳至于今不絕昔吾儒者之言僅出於中國其道在天下昭
然若揭日月而一遭秦火雖六經不得為全書殘編斷簡得於
屋壁丘墟之餘與一時遺老所誦習雖幸而獲存然顛倒錯謬
固已不勝其弊其他諸子百家各以其藝自名於時者近數十
年遠或百年皆已堙滅無聞而佛氏去中國數萬里其言率一
譯再譯而後見乃全而有之愈久而益著何也豈其言皆足以
示後行遠使人欲廢而不可歟蓋為之學者皆知信其所習而

尊其所聞相與謹守嚴奉手傳口誦而不敢慢非有意於借資
取便階梯所欲嘗探而忽忘之者然也常熟姑蘇別邑梅里鎮
又在邑之東北海上有寺曰勝法故無藏經崇寧二年長老道
綱始募衆緣為之綱強力明果學心法者也居勝法二十年與
始至之日無異工既成見余雪上曰竝海之民不耕而漁其習
以多殺為事而不畏罪與之言吾理則惑教以其書則怠惟轉
輪藏備極雕刻綵繪之觀以致其莊嚴之意可使凡徼福悔過
者一皆效誠於此吹蠡伐鼓機發軸運象設駭於目而音聲接
於耳不待發函展卷而其心固已有所嚮矣然邑民瘠而艱施
歲且多潦有欲成吾事者而屈於力其力足以及之者而窘於
歲蓋竭吾勤而後能成不有記其略無以慰此意也因請余文

至再三不已夫物之盛衰存亡固不可皆以力致然未有不存乎人者服儒衣冠者徧天下不能盡有其傳而佛氏獨能持久若此是必有當其責者因推其所以然書以遺之非特嘉綱之勤而已也時政和五年六月十日縉雲葉夢得記并書信安程俱題額

淨慧禪院看經寮記

昔法達禪師誦法華經及三千部而不悟佛知見智通禪師誦楞伽經約十餘遍而不會三身四智又江西志徹南海志道禪師自從出家以來皆覽涅槃經而不曉有常無常之義彼四禪者初未嘗有所開悟持誦既久上見六祖則於言下豁然意解如夢者覺如醉者醒如迷塗失道之人不知所向一旦得出邪

徑而由正路大抵經意分明人自迷背况人人性中本有此經諸佛如來因以文字垂示後學雖非卽此以悟入亦非捨此而後有得然則寺院看經寮豈可無哉淨慧禪院在常熟練塘市距鄒氏所居百餘步其初施地創立院宇繼而抄大藏經建藏殿藏院三門兩廡皆鄒氏先世之力逮愬伯仲造水陸功德堂以續其後紹興初慨然復以大殿頽敝爲慮且先世嘗欲新之未暇廼相與出力斥而大之成於五年七月余頃寓居練塘親覩茲事嘗作文誌其歲月矣然獨未有衆僧看經之所爲闕典憲念諸昆蚤世無與爲力者十九年二月己未惻然興懷又獨力爲寮及兩序共二十餘間於藏殿之後明窓斐几煥然一新使其徒朝夕宴處於其閒展讀諷誦曠然見性明心他日不下

四禪者其為利益一切豈淺淺哉比者又得信公禪伯來主是刹四方學者聞風奔湊席下凡數百人遂為一大叢林邦人信嚮設伊蒲塞盛饌無虛日亦一時盛事豈不韙哉嘗聞唐宣宗問弘辯禪師有人持經念佛如何對曰如來種種開讀皆為最上一乘如百川眾流莫不朝宗于海又問師既會祖意還禮佛轉經否對曰沙門釋子禮佛轉經蓋是任持常法夫經者徑也不可一日無於天下也審矣憲作斯寮為沙門釋子之利豈徒為遮眼計未成之日以書見告既成併以圖來示丐余文以傳以遠余嘉憲之用心教子姪皆入太學又推其餘以及其鄰僧余衰也以矣廢棄筆硯不復為文今日披圖喜而為書其本末以告來者是年九月十五日左朝請郎主管台州崇道觀夏之

文記

吳塘接待院莊田記

姑蘇距常熟百五里介于中曰吳塘建炎間有顯師者造浮圖七級不克備而亡歲久且剝蝕乾道初有諸氏發大勇猛裂塵網以為僧曰懷果因其舊址崇飾塔廟薙草萊以迄于成一椽一瓦皆手自矧慨然念曰吾徒之往來者無所共其困乏始議所以為接待院以居焉慶元丁巳不幸以沒有嗣正妙以精進心而為佛事視師有加焉今居像有廬說法有堂合徒有室鳴鐘有樓函經于藏崇啓對峙金碧絢爛寢寢大備矣雖然物之興也有時當果師之造始也無粒粟以資其徒於是有戴氏崇者割膏腴以胚胎之其子宣又以克大先人之志未幾而沈氏

華氏復相與助成其美以濟其不逮然則是剝之興起也其機緣幸會豈偶然邪噫人之情夫豈相遠或者休于樹餓于道有饋一漿餉一簞隱然猶不敢沒其德况日莫途遠當風雨霜露百舍重趼之際其至如歸飲食牀第不移而具當是時也何止一壺千金哉宜夫中夜以思以何因緣承彼恩力一至於使如負笈西竺問津臺山換去柴柵以求曠徹之地是則師之心而戴之志也苟謀之道路某處而飲饌豐美某處而居處便適憧憧往來老死而不悟者吾獨柰何哉是可悲也正妙又將闢其址益增大之而人之有以戴氏爲志捐夫田以續食者則附之左方以傳不朽有宋慶元五年四月初吉都梁周甫記

勝法寺佛像記

去常熟東北兩舍而遠有大蘭若曰勝法正宇佛像一日不觸自什寔慶元三年四月也得其識迺石晉天福間所造蓋歲久而後墮無足怪者時妙喜嫡嗣紹南主其席蔚然有道譽一方實宗仰之踵不及門而施者雲集有嗣寶蓮慨以自任爲之出力幹盡會得傑手曰僧淨慧意匠夙成出相妙好一歲而羸與繪飾之功暫然以訖事告矣今觀大雄如來巍處正座迦葉阿難拱侍左右普賢文殊以次導旁二大神厲色禦侮尊者一十八列坐其次觀大自在湧出後堵金珠閒錯丹碧輝晃香華浮空幡幢羅樹緇侶旋繞梵唄清暢鐘磬時奏殿廡肅然是爲大道場甲於南沙於是一邑若少若艾奔走作禮起敬起慕嗚呼此豈人力強之哉嘗觀佛之有像猶吾學校夫子之設佛者有

大營締雖累鉅萬指期而集至於其徒甘心服役精苦自厲雖至老死亦不叛去是豈宗主其師之教日夜灌漬其心挺及吾民之故歟及觀天下郡縣學校敞麗嚴邃固不能一如佛者之居春秋祭祀一切取具臨時以應故事正旦月朔間一會于庭旁者唱曰訖儀以就位俯伏而退意鄉之間邈弗相屬又非若佛者之於其師懇切深到方且從事簿書期會敲朴之末以爲大故及立一事出一令而必貴其先意以承何哉夫儒之道豈不盡善冒天地育萬物鳶魚天淵莫不適從况民乎使夫如其徒之於其師其效可勝量哉今不責之躬反以尤夫人曰是安取諸彼及其欲勝之也又將曰夷狄之教以害吾道也如此人其人火其書廬其居其說哆然而四出矣豈不甚悖矣哉吾因

是益有感而歎息於斯故併以書之云嘉泰元年正月望都梁周甫記

大慈寺鐘樓記

千鈞之鏞不梁百尺之高而箕虛之則停輪息苦警昏導迷何所妄冀寒山夜半聲到客船非衲子明宗則詩人得句昧者往往以爲迂闊不切殆弗知美教化移風俗王者先務而心花發明亦豈細事大慈爲福山望梁天監中初長江橫陳五峯擁環古木夾道腫腫如幢寺昔中微木日就槁及其再振木則重茂大鐘橫撞僅在平地厥聲弗鉉不足以發人狂醒醉夢深省文遠欲樓未幾而寂其徒如瑤了此緒續不日而成落之於嘉定九年三月旣望翬蜚半天遐眺無際寺與樓稱費幾萬緡遠初

欲市田爲山家經常計幡然而作曰市田非比丘凜則又反諸檀施施者不受願聽所欲爲至是舉以權輿其事餘出於父母昆弟走蜚來北礪求記歲月余語之曰昭默大士云身爲比丘不導父母於佛法中曰不孝是役也于以繼志而起父母昆弟施心一舉而兩得雖然曩見子擔簦負笈問天台之旨於諸老今復見冠冕領衆於古靈山晉進不止至於厭滿心初流通所學以壽佛祖夫如是又豈特孝於其父母哉萬緡之費土木之事耳吾所紀者在彼而不在此嘉定九年孟夏旣望潼川北礪居簡記

慧日寺修造記

梁僧慧嚮造大寺三在淮南曰慧照在崑山曰慧聚在常熟曰

慧日環常熟之境他佛廬無慮數十所或背岡巒而深穩或面江湖而舒曠其得勝槩固宜獨慧日在縣西稍北九十步臺殿屹立檜栢總翠當闌闔中乃有山林瀟灑意鐘磬石鼓之音時徹縣齊爲令者藉以少清曾次爲不易得也院從昔名重甲諸刹栴檀林率贍二千指非但爲展鉢計頗知相勉參請或在定累日無少懈怠以故主席者必當世龍象然後其徒心悅而誠服嘉定丙子夏五比丘子幸以少師樞使大丞相魯公之命來任茲上始至之日早蝗積逋舍宇就弊緇袍稍稍雲散幸與佛爲謀奮空拳而一新之凡所得施利悉以助修設毫髮無私焉居無何甑中之塵銷而戶外之屨滿矣於是首興造事聞者響答富室至捐百金其婁人子亦分錐刀若法堂若庫院若浴室

若衆寮若華嚴閣若水陸殿既次第補葺復製幡幢二十四首以嚴冥陽之儀躬經函六百餘枚以足大藏之數三門兩廡舊爲賈區卜肆喧啾冗雜亟聞諸公而盡斥之塗以丹雘輝如也繼此來者欵門而容改升堂而意消使人折不善之萌者固多謂佛法無益世教不厚誣哉珽竭來試邑既喜與蘭若鄰壁故因其求記而有考焉自天監初院爲十方禪林幾千載于此矣中更鬱攸碑碣無有老宿或謂三錫勅額曰壽聖曰晏安曰慧日亦口相傳以熟爾乾道閒僧宜意建佛殿淳熙閒僧宗璉建法堂嘉泰閒僧祖印慧光又建寢堂丈室皆未就去閒關至今乃迄于成是必有數存乎其閒斷非偶然之故也抑嘗誦須菩提經云菩提莊嚴佛土不不也世尊何以故莊嚴佛土者卽非

莊嚴是名莊嚴夫靈山六年鵲頂蘆膝佛自處也金碧光耀十二由旬人奉佛也二者並行初不相悖今慧日奉佛之道至矣若夫離相莊嚴則在比丘反求而自得之嘉定十二年解夏日宣教郎知平江府常熟縣主管勸農公事兼兵馬監押龍泉張珽記

甃頂山路記

常熟縣與海濱而地無大山縣依山之陽是爲隅山以瀕海之隅也又名虞山以昔人虞治於此也山北行九里是爲破山以鬪龍破山而爲澗也又北行九里是爲頂山又北行六七里是爲小山山之南北相距纔三四十里而名已不一矣又合而名之或曰烏目山也縣人行還以舟航爲安而視道路無不勞苦

者故自縣至破山卽有興福寺又至頂山卽有頂山寺其路隨山而山之形勢皆沙石雖去山稍開而徑田之塍又亦境埆而人跡不頻則榛卉爲之莽雲雨暴至則泥潦爲之塗人愈勞之也昔之僧於興福者悼其如此於是出其身有之財而累輒以甃之然自縣之北門以至興福之寺門而已因仍持以未有以動心者今頂山中峯庵主懷素大師圓於學佛而明朴於遇人而信願以甄石自破山之雙塔砌而甃之以抵頂山之寺門迺勤身以先人而訪人以許可昔之惡榛卉者果欲芟而夷之昔之病境埆者果欲砥而平之昔之傷塗潦者果欲堅而實之其財可謂易求其力可謂易致歲嘗大凶人嘗大疫而於此未嘗不悅者其費錢百萬其役工數百兆於熙寧八年之孟春成於



元豐二年之季夏雖以堅爲之心感易化之人而必更五年方卽成功豈徐或疾之銳或挫之皆命於天耶若未久而戚已成而休乃人之情也則天又烏能使之齊耶今夫奔車驟馬可以連轅並轡而無復異時之境埆也春遊晚步可以携歌執笑而無復異時之榛莽也輕任重負可以鐘行星歸而無復異時之塗潦也是則因其廢興而有休戚乘其幾會而能變通果在人也古之治曰澮上有道川上有路而道路不除又責於任事者至於徒杠輿梁又各期以時月之成故行旅合散而人不病濟後世亡此而佛老之徒得於其門遂資以爲功雖州縣之吏時有銳意臨之而後或無繼者亦又有其意時不得自任以爲責者今懷素非徒能甃其路而已又能建雙石塔以鎮文衢之衝

還以表溝閼也開四石橋以濟往來之阻還以表溝閼也是能
為縣官之未為者而以佐縣官之不逮者吾其可以無書耶元
豐三年三月初一日文林郎試祕書省校書郎守縣尉兼管句
河塘溝洫陳于記

頂山瑞石庵記

夫生齒蕃息地据要劇水陸之會貨商寶路之所自出必有窮
巖絕境龍怪之窟宅以為一方之福遇其人善持事之應誠禱
而輒收報效者其有益於民豈少也哉頂山之巔直上絕險怪
篁鯁木陰森鬱翠之中有瑞石峭拔不可窮極而龍母之冢神
龍之池環窟其旁邑民禱禳水旱曾不告召而千里畢至明道
紀元之初浮圖守常者能默誦妙法蓮華經邑民陳氏浩滌相

詔出泉二百萬屋其下為庵召守常者持事之自是禳禱輒應
而福在一方守常死庵其下者不遇其人則禳禱不效水旱相
仍嘉生不降邑民以為甚患迨今治平丙午縣大夫向侯因民
之願欲命滌陽紫衣僧慧安拯廢起墜益廣其旁以廊以軒以
垣以甃以飯四方之來者相與講解佛事以起民人歲時祈禱
之誠信夫窮巖絕境龍怪之窟宅足以為一方之福遇人而興
其信誠之應效蓋不可誣以神之為靈嘗陰寂無形不可得詰
而若依人以為報其能不逆民之心以嚴香火之地以致誠於
陰寂不可詰之間而為民取福善之應蓋亦賢於無所用心而
欺闇以悖人者之為也丁未春正月甲子承奉郎守尚書祠部
員外郎充祕閣校理通判秀州軍州兼管內堤堰橋道勸農河

塘溝洫事騎都尉借緋錢藻記

明因寺改禪院記

常熟縣七十里有雙鳳鄉有村支塘而寺其間曰明因方中國知有佛僅餘千年而是鄉為南徐時嘗曰永昌世俗近淺畏佛為高明而毀擯之寺輒廢於乾元至咸通閒始復向信而知過去佛在彼又已證真矣見在佛在我不可以不永證也欲證在我又不可以不尊彼於是佛道重光寺亦興焉遂名再昌至皇宋祥符改元始易今額至熙寧六年遂為禪寺土不變壞人不更聚而名目之不齊者時異事異實亦尊佛而已佛以一無冒一切有以一真破一切妄一切法是有我何使之無我本無無今安得有一切法是妄我使之真我自非真今安得妄一有一

妄為有情故一無一真為無情故此禪律所由判也東西分祖南北異宗以攝戒名律以見理名禪此禪所由盛也夫律衣漸禪衣頓而為之徒者以禪受十方以律傳父子因而反戈自伐與俗同污其不見繆於世者無幾蓋律徒之弊也初僧文曉由是與流輩有不平者以自至有司遂攘臂鼓衆二十有一願更律為禪自今日始縣為聞府府下僧籍蒐可為領導者衆薦今禪師紹瞻而府可之師至其徒有不悅者豫空其室以遁而頽垣壞壁蕭然如無人之墟師不以介情收拊遺衆繕葺故廬鳴鐘擊鼓晨唱夕和欣欣如也規範僅舉徒衆僅安歲輒大凶而水且旱百里蕪其八人輒大疫而逋且逃十室虛其九嚴不轉之心奉一實之事根無利鈍應病用藥其徒以此親施無厚薄

示福田相鄉人以此敬行八年於今而門之外導長涇以利衆
至涇之上營石橋以便行堂室龕殿雖未及美而小亦備矣嘗
以爲佛之興無棟宇之安無未碧之華或卽山與園或棲林與
樹而徒衆羅列人天森填不以爲陋者願得法而已及夫祖佛
不可見見其相而瞻親之足矣所以侈宮殿而非僭道師不可
得得其人而歸依之足矣所以麗室處而非過際無前後應運
者昌法無正末叶真者隆居不必壯苟葺苟完以至於美而不
慊者逢其適故卽大瀉是已徒不必繁或十或百以盛於千而
不憚者會其緣故卽象骨是已由故以觀今則寺之興廢可見
由今人以觀故人則師之操履可知因師請識之而論次如此
若門未革殿未紺而文室未壯必有待於他日余不得而書也

元豐四年五月十五日前蘇州常熟縣尉陳于記

破山光明庵記

佛說金光明經是經莫知所始莫究所終杳無形聲廣無邊際
最尊最上衆經中王類名曰金不可沮壞之體也現前日用光
明之實相也雖天地之大萬物之多幽明之異死生之隔皆不
出是經含洪徧覆之無外也廣矣大矣不入二乘之論浩然寂
然未離三界之中樂著是經則入起滅輪趣向是經則示懺悔
法由懺悔法故能拂樂著之心無樂著心故能達菩薩之本有
大沙門名曰海素以曩故行願愛樂是經出入是經受用是經
得是經三昧安樂贊嘆之不已又思一切衆生同入道場供養
是經行懺悔法去一切罪垢與人天四衆得清淨果究意了義

入無生法忍安住如如復次香火之地不無擇焉乃相視此山西南頂有奇峯裂澗可以隔塵凡有長松茂竹可以庇經像燕坐屏息歸者悅來者遂以熙寧辛亥歲經始訖紹聖丙子年建立凡三十餘間得東南之絕境擬化成之髣髴背望遼海而鏡空一天前臨上湖則澄光百里於是擊大金鼓出大音聲諸有聞者合手而至稱曰某甲等以宿昔緣隋塵色界煩惱障難願盡懺除素公乃爲整威儀良久而大衆恍然有先瞿然有得悲啼懇切告謝而去往問之則曰所失者煩惱妄相向來覺知今已斷滅所得者口耳不及使余何言仲殊身隱光明跡涉懺悔聞此殊勝書以自警公命勒于石以示四衆云耳紹聖四年正月十五日雲遊比丘仲殊記

神祠

破山龍堂記

禮山林川谷丘陵能出雲爲風雨見怪物皆曰神若然春龍亦能爲風雨見怪物則其澤也在民厚矣神而祀之又宜矣常熟澤國也風雨怪物日作于民在有其地者苟祀之至民被其利祀之不至民受其禍汝南周君爲令之初夏且旱禱其神于破山之潭上果雨以應君曰受其賜徒禱以報不可也於是命工以土木介其象爲寶宮以蔭之著之於典其潔其祀於是風雨時怪物止水旱不爲厲民經大荒連歲以穰其神之澤乎君之祀乎凡雩者春秋之道皆書之勤民之祀也君爲其祠已乞文其事日休佳其之爲也在民故從之咸通十三年二月十九日

襄陽皮日休記

頂山白龍祠記

常熟縣之頂山世傳梁天監元年有村姥居其東孕而生白龍失所往三日龍歸若就乳姥怖而死其家卽所居葬之旣七日大雷雨冢遷于山腹泉池泓演木無棲禽歲之五月龍率來省或見形山閒始至必甚風雨旣留則一境爲之寒邑人以此候之唐正觀十年龍嘗鬪異龍于海虞山之東山破水泉出其下有破山寺今興福寺是也邑人因像事龍母子于寺西澗旁水旱禱焉本朝太平興國四年蔣文懌爲縣令苦雨祈龍而霽令爲之增埤冢封濬治故池旣又卜遷其像歸諸頂山寺是日有白氣離故地而龍見旣至舍其像佛殿西偏而大治其祠宇結

構之三日龍復見尾冢而首祠繼日雲氣光色錯雜遠近見之祠成文懌爲之記迄今禱請多應其興起年世與變異事跡舊碑實云大觀三年五月六日餘杭陸韶之記

煥靈宣惠侯廟記

政和二年漕臺以常熟白龍祠祈禱感應之實聞于朝越明年制曰可宜賜煥靈廟爲額邑人以煥靈之惠著在一方而爵號未崇無以昭神貺後二年縣以狀列于府府言于部刺史遂復保奏焉制曰可封宣惠侯於是縣大夫率佐官祇奉休命宣于祠下而邑之士雲集將退咸告于丞魯詹曰侯之廟宇君與縣大夫謀之侯之封秩君與縣大夫請之今堂宇將畢而綸誥適班邑人鼓舞胥慶盍記之以侈其事且俾流于遠詹應之曰茲

不敢辭惟侯之祠舊在破山興福之澗上父老相傳其誕育之
異肇自梁武初我宋龍興妙選守令爲民師帥太平興國中蔣
侯文懌來宰是邑距天監幾五百歲矣時積潦泛漲躬禱於侯
不移晷雲歛雨霽歲則大獲乃迎侯與聖母之像歸于頂山壽
聖之西偏是日白龍之見盤旋乎冢上彩雲之瑞焜耀乎山間
迄今又幾一百有四十載矣邑人乃相與作廟于山腰龍池之
上侯之仙壟在焉經歷若是之久始克有成茲豈偶然哉佳城
峩峩方沼豔豔峯巒疊秀回抱如翼長江浩蕩沃野曼衍左則
福嶺狼崑右則虎丘崑玉遙岑寸碧列岫橫翠雲煙之祥疑在
於仙島氣象之偉實冠於吳中觀侯之初以神力遷葬而陰陽
家流咸謂勝地今新廟奕奕實下瞰焉庸詎知其非侯之意哉

政和五年十一月庚辰既望侯之告下十二月朔廟前後殿成
若門墉廊廡蓋將有待於來者焉續其事以考之詹旣書其槩
矣復繫之以辭遺邑人歌以祀侯辭曰

白龍之峯巖巖兮白龍之泉潺潺侯之煥靈兮祥發兮茲
山侯之宣惠兮澤霈乎人寰若歲大旱兮曰雨而雨天作
靈潦兮曰暘而暘上恩之厯兮載渙乎龍章民報之篤兮
締創乎斯堂淵潛而雲飛兮克相昊天五風而十雨兮賚
我豐年千秋萬歲兮擊壤千耦萬箱兮大田文林郎知平
江府常熟縣丞魯詹記

修白龍祠記

海虞彌望平疇有山突然自西北走東南左股盤紆前趾直踞

崇岡隱起於腹脅間顛有池焉叢木會蔚白龍宅之祠宇久不葺不稱神居金華葉君知幾貳烏程有聲諸司能之以其狀聞諸朝移使令海虞既視事謁祠下儼然若有感於中者自是水旱則禱之曰雨曰暘如響荅聲穀用以成民用以寧他邑歲飢而海虞之人不以瘠告既三年矣君曰神之福吾民至矣吾朝夕去邑而神之居若是吾顏覲焉乃鳩工合材易其腐敗而赭堊其故暗廟貌煥然爲之一新惟神基迹於梁赫靈於唐以旣我國家雖以上下天地把握陰陽爲功然非人無愧於神則神亦何有於人也今神之福吾民如此是殆令君有以契神意哉葺其祠以荅神之休也固宜良請書其事於石又爲之詞以附著其後使邑人之祀神者歌之以樂神詞曰

雲油油兮靈之升風颯颯兮靈之下雨暘以時兮靈之豐
我稼棟橈壁摧兮靈何依葺敝以新兮祈報則宜千秋萬
歲兮靈無我違時有宗慶元丙辰四月初吉丞昭武傅良
記

龍湫亭記

頂山祠宮爲白龍祝嚴所肇於梁天監顯於唐正觀而助順著
耀於我宋者也雩禱之應咸通中皮日休述之誕育之異太平
興國中蔣文懌紀之政和二年始賜廟曰煥靈後二年封侯曰
宣惠自是禱水旱則響荅制詔封秩累八字矣祠之側踰百步
有上方院院有湫泓水清可鑑旱澇不爲之縮盈舊傳嘗見白
鰻于中故俗稱白鰻池實龍之棲也吾宗趙君崇忘嘉定乙亥

來爲縣大夫明年丙子蝗繼有自江北蔽天而入境者君率僚
貳走祠下潔齋禳禳少焉龍見于天風雨驟至是夕蝗悉隕于
江以斃秋告旱君卽湫乞水禱焉則辱居浴院下腐渠汙積謂
神龍窟宅而若此沮洳無乃非耶默與龍約雨若應祈當爲龍
作亭以蔽湫之上且撤彼浴室前爲軒楹言未旣風色慘變片
雲布濩隆隆獵獵若有驅導然隨車而雨遂彌百里罔不周飮
沆成農扈穡事畢廼鳩石工廼命梓人以甃以削始創一亭而
湫其四周巍然而覆翼之尋闢深垢之地日南至縣大夫相攸
築址白龍復見蜿如矯如近橫兩山之巔漏下十一二刻而藏
冬而龍見非時也邑人故以爲異於是士夫民庶謂宜假以光
靈增其封爵策書申命以詔亡極廼上其事于郡于部刺史次



第聞于朝事下禮部太常合議條奏龍侯自靈澤宣惠通濟孚
應而爲廣利公龍母夫人自靈順慈懿顯佑而加普應且易懿
以穆詔禮官議是鄉貢進士陶元善者克奔走倡厥事會鄉貴
在朝路又從而侯趣之告下神人驩喜予以荅昭貺侈神功也
惟軒楹未就顧縣帑常在元枵之次是邦有寓公獨慨然捐錢
以助其費君輔之私財一椽一瓦不以調民民抑不知有斯役
戊寅秋七月建屋三楹棟題美奐如翬斯飛繚以垣墻氣象閎
敞前馬帥周公虎作龍湫二大字爲扁榜趙君詒書求時侃記
顛末時侃旣樂道禱祈之孚遂復于君曰余嘗讀易而得雲從
龍之文及質諸韓文公而得其說夫雲者以龍之噓氣而成龍
乘茫洋之氣薄日月召雲電然後以雲爲靈是龍之能使雲非

雲之所能使龍也子思氏著中庸一經有言水一勺之多及其不測蛟龍生焉蓋不測之水自一勺而致孰能謂龍之時潛不在宮沼間此左氏載深山大澤實生龍蛇之語豈不為怪逮夫起陸變化雲霧滃然而從瞬息四海茲其所以龍之靈審如是不加敬於龍湫可乎歐陽文忠公為乾德令祭五龍之文云百里之地一時不雨則民被其災凡山川能出雲為雨者皆有神以主之以節豐凶而為民之司命余觀趙君龍湫之事其得歐陽公為令之心歟心與龍通雨暘時若以是三載無水旱之害行將待去猶拳拳於軒楹之建封爵之加去如始至是不可不記也君字安伯登紹熙龍飛第今官奉議郎其操心也誠其律已也廉為政無愧於顯幽云嘉定十一年九月朝散大夫主管

亳州明道宮趙時侃記

福山東嶽廟記

惟我宋真宗皇帝東幸泰山告功于天大修封禪禮泰山之神顯膺褒嘉位號崇隆得非衛社稷福生靈運功烈於冥冥之際宜有所報稱歟是故四方萬里不以道塗為勞往奉祠事有加無已且復用其至而思所以竭力於神者往往規模岱嶽以營基稱立為別廟多矣然未有盛於姑蘇之福山也福山廟經始於至和之初先時草創類皆陜隘拓地增廣屢見改作智者獻謀巧者效工富者輸財貧者出力為斧斤為畚築為陶旂與夫黜堊丹腹之飾其用不貲垂六十年樓殿門廊并諸從舍巍然而輪奐時既久如此其盛猶弗休工而停役資信施於一方未

必能爾也然而江淮閩粵水浮陸行各摯其所有以輸歲時來
享之誠者上祝天子萬壽且以祈豐年而後保其家凡有求必
禱焉率以類至號曰社會簫鼓之音相屬于道曾不知幾千萬
人不及之乎泰山則之福山而已非靈貺感召有是乎福山臨
江海上巋然翁鬱岡巒回環殆亦勝地父老云肇祀之日有幅
盡乘潮水至乃嶽神像居民得之欽事而加信焉隱顯之情相
與符合如此嘗考山之隸於吳城曰覆釜蓋因其形似後易名
福山今廟據其上遂爲遠近祈福之地豈偶然也哉於戲畏禍
而悅福人之常情能畏禍者鮮有不畏刑爲不善也明則刑及
之幽則禍及之且惟福是祈而敢不爲善者幾希廟貌嚴飾則
人之設心亦可見矣固宜有述以爲來者勸况以祝聖祈年爲

先務庸可以不書乎衆謂邦哲寓居之久頗詳其事求文以爲
記在位者助之請不得而辭政和七年八月乙亥鄉貢進士崑
山魏邦哲記

重修福山嶽廟記

宋有天下垂二百年海虞人安憲度修舉人繁物庶拓地日滋
文恬武熙寘民太平和氣中至老死不聞軍旅之事鼓卧不鳴
邊境少弛遠夷欺天犯順乘不測之勢虵豕長驅犬羊無厭異
時雄藩鉅鎮金壁奧區游騎所經略無遺燼平江蓋吳都會而
重兵所守也一日姦人欺賣蛇去無戶限之託一夫一婦一絲
一粒蕩然爲空常熟距城百里揚鞭可至而夷人逡巡遁去不
敢回顧神相之矣何以知其然常熟於縣爲望富家潤屋百貨

之所藏平原沃野九穀之所利達官貴仕遠商大賈樂寓其境
殆危時險塗盜賊之所垂涎者今舍弗取又地當南北之衝俯
瞰長江對峙通泰於是大軍旁午悉仰是爲傳舍絡繹不斷累
年于茲無或閒言脫有貪人暴客包藏禍心存爲不利旣而彌
縫調伏姦宄自銷驩然請行莫敢竊發者以故齊民安堵居不
告擾耕食鑿飲往往滋盛曩時豈盡天幸哉神相之也東嶽離
宮初於至和崇大於元符實相斯民而治于福山福山南去縣
四十里北壓江口卽古之覆釜唐之金鳳山也一邑之走望在
焉老弱疾病歲年豐凶以至於旦莫之所經求冀如意而蒙福
者惟神是依越是以來遠邇加信歲率以莫春大會四方來者
于廟之廷祈者禳者訴者謝者獻技能者輸工力者若貴若賤

若小若大咸各有施投簪珥薦琛貝輦貨泉篚布帛廷實充塞
紹興癸丑知縣事施公剛明清慎至誠有格樂與民基福田神
施實德于民而報之不可虛拘宜卽其廟弊者新之圯者更之
無者建之已經始者成之知鎮事趙公敏惠簡廉遇事輒辦曰
惟爾有神質之在旁敢怠斯役因會所入披圖創規將侈其觀
顧護國西齊王殿營治歲久宏麗及是命工度材一新輪奐楹
丹桷刻耀映日星旣八月績用告備明宮齊廬壇壝之屬凡昔
所未具與夫故制卑隘不足以揭虔妥靈者今悉章章顯設無
不盡美肆然神居高明靖深洞洞屬屬應如影響以福一方蓋
未艾也西成有祈耆老將率邑之子弟慶于祠下命子記其事
因爲之歌以侑酒且致所欲禱者詞曰

妖氛塞路兮乾端坤倪獨保茲土兮初如弗知念我福兮
惟神其依欲報之德兮曷知其歸用宏茲賁兮聊伸我私
神其昭假兮克大靈威恢清宇宙兮太平以基與國咸休
兮振古如茲紹興三年十月十日福唐李薰撰

琴川志卷第十三

琴川志卷第十四

題詠

破山寺

唐常建

清晨入古寺初日明高林竹徑通幽處禪房花木深山光悅鳥
性潭影空人心萬籟此都寂但餘鐘磬音

同

唐僧皎然

雙峯百戰後真界滿塵埃蔓草緣空壁悲風起古臺野花寒更
發山月暝還來何事池中水東流獨不迴

同

秋風落葉滿空山古殿殘燈石壁間昔日經行人去盡寒雲夜
夜自飛還

破山山居八詠

唐僧常達

身閑依祖寺志僻性多慵
少室遺真旨層樓起莫鐘
啜茶思好水對月數諸峯
有問山中趣庭前是古松

晚望立虛庭心心見祖情
煙開分嶽色雨霽減泉聲
遠樹猿長嘯層巖日乍明
更堪論的旨林下筍新生

一室塵埃外翛然祇麼常
睡來開寢帳鐘動下禪床
溪浸山光冷秋凋木葉黃
時提諸祖意欹石看斜陽

西來真祖意祇在見聞中
寒鴈一聲過踈林幾葉空
心閑憐水石身老怯霜風
為報參玄者山山月色同

真性寂無機塵塵祖佛師
日明庭砌暖霜苦藥苗衰
汲水和烟酌栽松帶雪移
好聽玄旨處猿嘯嶺南枝

古寺凭欄危時聞舉妙機
庭空月色淨夜迫磬聲稀
漏轉寒更急燈殘冷燄微
太虛同萬像相謂話玄微

胡僧論的旨物物唱圓成
踈柳春來翠幽窓日漸明
禪心親石室蝶翅覆花英
好聽譚玄處喬松鶴數聲

祖祖唯心旨春融日漸長
霜輕莎草綠風細藥苗香
月滿真如淨花開覺樹芳
谷前鶯囀處時聽話圓常

烏目山五題

并序

祕書丞李堪

余被物役塗污故羈於人務
網於吏位誠此身為官府有
也今四十加六年始覺老非
欲而已至病不期而自來生
何常而本空死如歸而共寂
由是登水木之虛室遇霞月
之美夜聞經梵之清韻覽香
花之寶會則心悅以情動目

爽以言發綺靡以文著冰釋以意達前月中隨漕輓牒治
金穀事至常熟縣過烏目山其山左右前後僧居佛宇者
有五因而成五題皆率爾所作非高妙也大中祥符三年
四月五日序

興福寺

雲門十里長殿塔明朝陽半夜風雨至滿山松桂香清猿嘯遠
壑好鳥鳴虛廊塵土斯可濯胡爲語滄浪

延福院

蘭桂遶禪關半春香滿山風移金磬遠雲伴玉龍閑樹暗猿吟
外花開僧定間塵心自然洗流水日潺潺

淨居院

入門松桂深清氣生人心霞影迷窻綺花光照地金微風起層
閣初月升高林終夜魂自健滿堂鐘磬音

永慶寺

巖扉開早涼谷鳥紛遠翔花氣濕幽徑磬聲清上方雲生松澗
底泉落蘚池傍我有遺榮意移時坐石牀

龍院

林下金僊坊苔門掩夕陽花飛殿塔頂地照雲霞光松老鶴亦
在洞枯龍已翔中宵動清衆一磬發虛堂

破山八詠

元豐元年蘇州常熟縣沙門思雅謁余言曰海虞之勝鍾
於破山然林泉之勢游觀之繁無近與遠傳之盛矣自倪

柳州捨宅為寺數百年間僧人奇士徃徃間出而人知者願有以發明之余因請而詠其可道者俾靈蹤異跡不掩於山水之勝云元豐五年四月旦日宣德郎知蘇州常熟縣劉拯序

興福寺

齊柳州刺史倪德光捨宅為寺號大慈邑梁大中改為興福

峩峩烏目山曾臨貴侯宅重房昔珠翠峻宇換金碧泉激晨霞明松搖暮雲白宜爾山中入日輪自朝夕

文舉塔

唐高僧常達字文舉通涅槃經莊老書隱跡此山雖王侯詣門莫得而見塔在寺之東南三百步

圓昔探雙林巵言發南華萬里歸一空誰云正非邪門影搖青松曾迴貴侯車猶遺數層塔岌岌凌飛霞

救虎閣

朱梁高僧彥偁嘗一夜有虎中箭投伏寺閣偁閱之下拔箭其虎舐血顧偁而去閣基在三門之東偏

三昧遊深慈結宇依蒼崖猛虎伏巍閣拔箭非忘骸窮獸雖覆車危雀猶投懷况我見已忘而彼猶其儕

龍鬪澗

唐正觀中老嫗生白龍與一龍鬪于此而成澗

白龍鬪巍峯長澗落千尺靈泉應奇蹤高連莫雲碧寒影凌蒼崖清流動危石八月苗正枯猶能變甘澤

體如塔

高僧懷述字體如學涅槃伊字沙門遭武宗沙汰至大中中仍復僧服始終無瑕塔在文舉塔之東北

妙理悟三伊巍巍抗奇節千尺巖下松蕭然獨凌雪珠影雖青黃月輪豈圓闕危石揚寒泉至今伴清絕

宗教院

雍熙中高僧晤思通天台
教持于此在三門之西偏

妙義傳天台迷雲淨如掃初終雖五時脩短自三草結隱非此
峯獲藏亦真寶秋來月正圓獨照松已老

空心潭

常建詩云山光悅鳥性潭影
空人心在殿之東北九十步

碧潭發幽石瀟灑無纖塵寒光湛秋月有物難比倫離鈞况無
魚千尺徒垂綸到此心已空何用濯吾纓

御賜鐘

唐懿宗咸通六年賜

大聲扣洪鐘萬里來彤庭鳥閑棲影重星淡雲氣清餘響遠巖
壑林葉如迴驚有客發深省塵耳非謾傾

破山

尚書莫儔

久聞勝地有蓮宮乘興來遊杖瘦筇庭老樛枝翠瓔珞池生並

蒂玉芙蓉飛仙何意來題柱開澗當年想鬪龍歸騎回看樓閣
處雲深隱隱度疎鐘

同

李莊簡公光

時為令

招提清絕冠諸方溪繞山圍勝氣藏好在池塘存舊址依然花
木隱禪房風生殿閣元無暑雨後松篁自有香日暮不教清興
盡更登絕頂瞰微茫

同

陳簡齋

不到龍門十載強斷崖依舊掛斜陽金銀佛地浮佳氣花木禪
房接上方羸馬暫來還竟去流鶯多處最難忘老僧不作留人
意看水看山白髮長

破山光明庵

僧仲殊

身是光明懂語是光明經光明聚不散妙有成真形示現三界
前何勞問丹青坐斷龍鬪山寶月孤亭亭

同

吳郡陸曦

檻外琅玕山外山三峯橫碧有無間塵埃莫便市廛去斜日秋
風更倚欄

虞山登眺

令孫應時

長嘯虞山迥天開風氣清南窺五湖近北覽大江橫歷歷三吳
地悠悠萬古情雄觀有如此聊復記平生

乾元宮

令孫應時

塵囂咫尺愧山林勝日追隨得共臨千里江湖堪送目一窻松
竹更論心清風政爾生秋意小酌何妨到夕陰歸路踟躕獨悵

悵強須倚卷一微吟

望湖亭

僧仲殊

凝華浮藻五雲間下壓凌虛萬象閑湖水際天天欲盡落霞照
出洞庭山

極目亭

舊名望湖

令徐次鐸

幾點歸舟破暮煙數行鴈字落霞邊世間安得王摩詰為寫琴
川作輞川

頂山寺

直集賢院知蘇州

梅詢

蚌株碧樹插雲立一綫紅泉透石飛童子怕寒爭閉戶夜深風
雨有龍歸

秋晨至頂山

令孫應時

散目秋郊赴曉涼
纖雲不點鏡天長
杉松沐露連天碧
杭稻眠風萬頃黃
可惜文書妨勝日
又還時節近重陽
小山叢桂相撩
得故故隨人作陣香

秋晚有懷頂山

今孫應時

小山搖落故淒涼
想象登臨野興長
萬里晴空初鴈入
一年好景又橙黃
極須痛飲償秋節
生怕踈鐘報夕陽
搔首故園歸未
得籬邊寒菊爲誰香

留題頂山上

范文正公仲淹

時知蘇州

平湖數百里
隱然一山起
中有白龍泉
可洗人間耳
吾師仁智
心愛茲山水
音結茅三十年
不道歲月深
笑我名未已
來問無爲理
却指嶺邊雲
斯焉贈君子

同

令程準

雨歇黃梅後
秋生麥熟前
偶同金馬客
來訪玉龍泉
竹葉一樽
酒榴花五月
天不妨扶杖
行到白雲邊

慶元丙辰中夏獨遊上方

令孫應時

澗水有奇觀
山蟬發清歌
穹林翠光合
深谷涼風多
孤遊轉寂
歷佇立以婆娑
吾生政須此
欲去意如何

戊午六月宿山禱晴

鵲爲晚晴喜
山如秋夜涼
蟬聲起竽瑟
雲影散牛羊
神理應難
昧民憂敢自康
平生靜中趣
未厭宿僧房

詰旦喜晴

一壑有幽意
三年幾獨來
龍鱗松薜荔
翠羽石莓苔
潤喜朝光

動清知嵐氣開山前迎父老同作笑顏回

頂山栗

教授王伯廣

黃離抱中實紫苞發外彩寄蹤蜂窠垂藏頭蝟皮隘詎堪鼯鼠
竊更復猿狖採心憐使民畏時須徇兒愛荆山破金璞驪珠掩
微類續密文自保滋味身乃碎筠籠貢厥珍不在粗梨外羅籩
加其儀顧與菱芡對易飽屏膏肉餘功益肝肺懸風當令堅致
濕忍使敗晉地棗非偶宣城蜜嘉配誰知麝香囊可居天下最

中峯

令劉拯

躡徑登高亭天遠不敢局疎簾捲危簷百里在舉目江橫縞帶
明山隱螺髻綠啼鳥破長煙飛泉漱寒玉雲回猛虎嘯清風繞
巖谷颼颼入青松古淡琴一曲倚欄更凝望斜陽上脩竹欲去

還遲遲勝槩那可足

同

和靖處士林逋

中峯一徑分盤折上幽雲夕照全村見秋濤隔巔聞長松含古
翠衰葉尚微薰自愛蘇門嘯懷賢事不羣

同

僧仲殊

聚遠最高亭登臨喜倍增貪陪青眼客不見白頭僧閉戶三十
載壓雲千萬層龍珠彈落處一點白蓮燈

瑞石庵

令孫應時

修碧竹萬箇清甘泉一泓拂石可偶坐携茶聊自烹林深人迹
絕日永山蟬鳴出門不忍去却立聽溪聲

寶嚴寺

教授王伯廣

平湖鏡淨中背貼青峯巒去郭二十里金碧輝波瀾是日寶華
鏡萬象鬱以盤壯哉宰堵坡一瞰天地寬誰懷墮塵鞅幾欲招
飛鸞我生渺何能山水情所安扁舟幾來斯不爲開愁端意到
自行樂樽酒那追歡何如結青蓮超適心外觀塵迹身兩忘浩
然天地間

同

中丞姚愈

浮圖插雲表列障環古刹平湖眇澄波萬態天光發我來陟層
巔秀氣助毫末扁舟返明月萬頃玻璃滑

同

陸曦

出屋蕭蕭數百竿入門襟袖便生寒相期更待梅英發醉棹短
篷來細看

光祿亭杏花

少卿陳揆

西郊見說春事濃杏花香發眠東風主人未解此花意小槽溜
溜盃猶空勸君斂灑蒲萄綠好看枝頭紅映肉莫令風雨遣花
飛徒唱人間斷腸曲

勝法寺

贈綱師

李莊簡公光

時爲令

舍南舍北竹千竿鏡淨無塵碧玉寒中有老人清似水晚來相
對倚闌干

遊勝法寺兼簡深公

尚書屯田員外郎

陸

道旁有古寺巋然聳梅林邇來衣褐徒包禍歲月深埋伏狡兔
穴嘯聚惡木陰安得智慧劍力斬姦邪心吾師曹溪流所在人
依欽郡邑兩交疏來發雲雷音初如碎瓦礫乃見真球琳瞽者

破其瞽瘖者披其瘖有若鸞鳳巢無復鳴鴉禽曉子因吏役海岸宜投簪扁舟叩禪戶清風滿衣襟高論松桂間為師揮玉琴

嘉祐三年

同

令孫應時

古刹精廬隱茂林斷雲疎雨正秋陰黃花又是一年事枯木依然千歲心病酒未能收獨酌懷人無與共清吟僧窓夢覺鐘魚靜聽徹寒蛩語夜深

遊智林寺

政和戊戌

李莊簡公光時為令

扁舟來訪小叢林花木通幽院落深旋拂胡床成午夢閑持貝葉動秋吟竹聲瑟瑟生虛籟山意峩峩入素琴更喜老綱能會事手携爐鉢自相尋

鳳凰山

郎中温革

慣作山林客聊遊戲劇場栗花收作燭栢子採為香且放高情適都無俗事妨人間正擾擾只得扣空王

題常熟

楊備

遠逼江垠傍海壖落帆多是往來船縣庭無訟鄉閭富歲歲多收常熟田

送常熟錢尉

范文正公

仲淹

姑蘇臺下水如藍天賜仙鄉奉旨甘梅淡柳黃春尚淺王孫歸思滿江南

送安公歸頂山瑞石庵

侍郎王琪

談空二紀餘重此訪閑居身是汾陽嗣囊惟郭璞書公侯倒屣

後泉石結茅初山頂杖榛栗經秋信莫踈

送燕明仲歸常熟

李鼎

東南江海郡瘴霧腥蛟螭土俗異鄉縣客子懷歸思歸思何從
返遠道傷百危干戈久未定一水分華夷壯士爭挽強覓爵唾
手期而我癡絕甚尚復事毛錐三年行在所短褐風霜欺生理
寄茅棟不飽藿與藜苦辛攻積憂欲語聽者誰賴有燕公子好
事頗見奇鄰壻肯相過情話肝膽披君才駉駉不受塵埃羈
驥首志千里躡踏風雲垂乃翁名世將先朝補邦基殊勲鼎彝
在勁節不少虧後昆德澤盛衮衮固未衰

贈常熟賀公叔隱士

錢塘周邦彥

懷珠崖不枯韞玉山有輝隱翳不言德人自知神奇公叔季真

後不爲世網縻浮沉里閭間身晦道固肥弓旌搜俊良圭衡略
無遺難偕集雍鷺寧作曳尾龜慈仁蓋天性惠澤施鰥嫠倒困
食流冗死葬病有醫人今泣遺愛若見峴首碑肯構有材子修
德亦庶幾高風自茲顯豈病知者稀

寄常熟鍾子充隱居

錢厚

倦倚吳門思沈寥懷人清致詩滿瓢池塘芳草夢初斷風雨落
梅魂正銷一百五日寒食節二十四浦春江潮遙知藥圃曉經
斷舍後藤蕪添綠苗

題龍山

菊磴高九萬

古滄浪外精籃縹緲間木枯曾閱世龍老解分山烏道秋迷
跡禪房書掩關詩成遊子去流水自潺潺

遊龍山

浦城章康

名山久相望今日為著屐到寺第一義古松互蟠屈一一龍蛇
形風雷氣蕭瑟纓絡檜兩株皆數百年物佛燈耿青燐像設暗
金碧空廊極徘徊老屋共崢兀僧房小槃礴西原訪泉石於其
最幽絕似可便築室因而思古人多有愛山癖要之亦何為一
賞事已畢上方不及登尚或俟他日無非會心處妙同箭鋒直
山靈謂何如移文茲不必作詩留山中併可告來轍

破山雙頭白蓮

少卿陳揆

湘南夜永風露清明月耿耿波益平嬋娟有人步羅襪瓊瑤玉
珮雙娉婷可憐玉骨埋藏久腸斷人間無復有豈知化作蘭若
蓮宿契未忘猶並首想應快意洗塵緣不向謝池爭取妍玻璃

槃中淨土頌一心稽首西方仙請君以圖獻天子當與嘉禾並
周史毋令寂寞墮空山泣月悲風清夜殘

詩送張安道僑朝散赴闕

趙清獻公抃

君數過予澌水邊從容不覺歲華遷同年契有二千石郡守大

最厚釐務官成三百篇安道在官著詩盈集兩縣子庭俱戲綵是行開化德

一州僚館競鋪筵郡官餞席彌旬到應禁闥新秋近喜對威顏咫尺天

安道作詩慶國鎮高退輒依元韻奉和

里人迎候巷居稀未老先休世所奇兩頰朱顏君退速君年方

滿頭霜髮我歸遲七年已優游豈顧千鍾祿收拾如終一局碁

飲食節調資壽社願同山下有雷顛二詩縣人張氏家藏墨

琴川志卷第十五

拾遺

石室

在常熟縣海虞山石室凡十所相傳太公避紂居之孟子太公避紂居東海之濱常熟去海近或是

載吳郡志

文學橋銘

壺山黃士毅

魯鄒而降道爲絕學千五百年起濂續洛寥寥閩派以幾復絕再起滄洲教修日揭無極二五在人一源故不同地時生聖賢吳通上國公卽遊魯胡然歷世莫踵公武覩迹亦昧吁方肇祠是用作記意嚴灑譏哂予小子世閩產吳敢誦所自滄洲之徒登橋而思刻銘述記期我同心如水洊至能令後學本末易明

僞行不作踵公自今

偽行不作踵公自今

吳直上國公明

再訪...

魯...

文學...

壺山...

...


...

...

...

...

陶君聲甫携其景元手鈔琴川志相示云此元廬鎮志本也自明清迄今五百餘載屢經劫火刊本已不多觀惟瞿氏鐵琴銅劍屢所藏景元鈔視為祕籍聲甫假而繕寫閱數月而書成聲甫嗜學好古工書善畫而於金石圖籍尤精鑒別收藏亦富平居摩挲一室別無他好所與交游皆一時者碩高雅之士其人品已可概見今雨中罕有其匹余老矣既矣於文字無能為役而聲甫不以余為老既不文索而記之因自忘其謏陋援筆而書其崖略如此至琴川志之巔末前諸序中已詳載茲不復贅將來此本當與瞿氏所藏本並重於世焉可操左券余得以附名卷末亦與有



禁也已

第三行鈔字下脫一本字

民國三十年古曆辛巳百花生日暇老人王慶芝識
時年七十有八

